

**PNG Bible Resources**

# **Efesus** sapta **1**

Oi wanwan tok bilong kliaim tingting bilong yumi na bilong strongim yumi i bilipim na trastim feifful wok bilong Jisas long diwai kros

Dispela Pes i no gat Toktok.

# Efesus sapta 1

## Painim ol wanwan tok

<b>Efesus 1:1-3</b>	God i givim olgeta blesim bilong heven long yumi i bilong Krai.	<b>Pes 2</b>
<b>Efesus 1:4</b>	God i bin makim yumi na pasim yumi long Krai.	<b>Pes 8</b>
<b>Efesus 1:5-6</b>	God i bin makim yumi bilong adoptim yumi.	<b>Pes 15</b>
<b>Efesus 1:7</b>	Krai, long blut bilong Em, Em i baim pe bilong sin bilong yumi.	<b>Pes 21</b>
<b>Efesus 1:7-8</b>	God i kapsaitim grasia bilong Em moa moa long yumi.	<b>Pes 26</b>
<b>Efesus 1:9-10</b>	God i soim yumi as bilong plen bilong Em.	<b>Pes 32</b>
<b>Efesus 1:11-13</b>	Sios i stap bilong apim nem bilong God i bikpela na gutpela tumas.	<b>Pes 37</b>
<b>Efesus 1:13</b>	God i givim Holi Spirit long yumi bilong soim olsem Em i bin pasim yumi long Krai.	<b>Pes 42</b>
<b>Efesus 1:14</b>	Holi Spirit Em i diposit bilong olgeta samting Krai i bin kisim bilong yumi na bihain yumi bai lukim.	<b>Pes 48</b>
<b>Efesus 1:15-16</b>	Trupela bilip wantaim pasin bilong lavim tru ol manmeri bilong God em i nambawan.	<b>Pes 54</b>
<b>Efesus 1:17</b>	God i laik yumi mas save long Em moa yet.	<b>Pes 60</b>
<b>Efesus 1:18-20</b>	God i ken i givim lait long tingting na bel bilong yumi.	<b>Pes 65</b>
<b>Efesus 1:21-23</b>	God i mekim Krai i stap het tru bilong olgeta samting.	<b>Pes 71</b>

# God i givim olgeta blesim bilong heven long yumi i bilong Krai.

---

## Efesus 1:1-3.

---

Mi laik askim yupela wanpela askim pastaim na yumi skelim. God i save blesim olgeta manmeri long dispela graun o Em i save blesim ol manmeri i tanim bel tasol na i bilipim na trastim Jisas tasol? Yu gat wanem tingting?

Yu save, taim God i salim gutpela ren, orait dispela ren i save pundaun long gaden bilong ol manmeri i tanim bel, na em i pundaun long gaden bilong ol manmeri i givim baksait long God tu. Ren em i wanpela gutpela blesim bilong God na God i ken i tilim dispela blesim long olgeta manmeri maski ol i givim baksait long Em o nogat.

Na God i bin givim planti gutpela blesim bilong Em long yumi olgeta manmeri bilong PNG. Yu tingim. God i givim gutpela graun long yumi, na gutpela kaikai long yumi, na gutpela san long yumi, na gutpela bus long yumi. Na Em i bin givim kopi long yumi bilong kamapim sop mani na mani bilong helpim ol femili bilong yumi. Yu save, ol dispela samting em i gutpela blesim bilong God, na God i bin tilim ol dispela kain blesim long olgeta manmeri bilong PNG maski ol i tanim bel na bilipim na trastim Jisas o nogat. God i bin tilim ol dispela kain blesim long olgeta manmeri wantaim.

Tasol, dispela i no minim olsem God i save givim **olgeta** blesim bilong Em long olgeta manmeri. Nogat. I gat sampela blesim God i no inap givim ol manmeri i givim baksait long Em na i givim baksait long PIKININI bilong Em.

Buk Efesus em i wanpela pas aposel Pol i bin raitim na i salim i go long ol manmeri bilong God i stap long taun Efesus. Na long dispela pas Pol i tok olsem, God i save givim olgeta blesim bilong heven long yumi i bilong Krai. God i no givim olgeta blesim bilong heven long olgeta manmeri. Nogat. Em i givim olgeta blesim bilong heven long manmeri i pas long Jisas Krai.

Olsem na, dispela em i fes toktok nau moning mi laik tokim yupela. Mi gat 3-pela toktok mi laik givim yupela, na dispela em i fes toktok....

### 1. Olgeta blesim bilong heven em bilong manmeri i pas long Krai tasol.

Yumi tok pinis, God i ken i tilim ren na san na ol kain samting olsem long olgeta manmeri. Dispela em i tru. Tasol, Em i no inap givim *olgeta blesim bilong heven* long olgeta manmeri. Nogat tru. Em i givim *olgeta*

*blesim bilong heven, olgeta blesim long sait bilong heven long ol manmeri i pas long Krai tasol. Em i givim olgeta blesim bilong heven long ol manmeri i bilong Krai tasol.*

**Lukim lain 3.**

Olgeta blesim bilong heven em bilong ol manmeri i bilong Jisas tasol – em bilong ol manmeri i pas long Jisas – em bilong ol manmeri i tanim bel na i bilipim na trastim feifful wok bilong Jisas na i bihainim Jisas tasol. Yes, God i ken i givim ol wanwan blesim bilong *dispela graun*, olsem san na ren, long olgeta manmeri. Tasol, Em i no inap givim olgeta blesim bilong *heven* long ol. Nogat tru. Olgeta blesim bilong heven em bilong ol manmeri i pas long Krai tasol.

Sapos yu bin tanim bel na yu bilipim na trastim feifful wok bilong Jisas na yu wok long bihainim Jisas, orait em olsem yu pas long Jisas, em olsem yu bilong Jisas nau. Olsem na, sapos yu bin tanim bel na yu bilipim na trastim Jisas na yu wok long bihainim Jisas, orait olgeta blesim bilong heven em bilong yu. Aposel Pol i tok, God i tok, long lain 3, *“Litimapim nem bilong God, Papa bilong BIKPELA bilong yumi Jisas Krai. Em i bin givim olgeta blesim bilong heven long yumi i bilong Krai.”*

**Sapos yu bin tanim bel na yu bilipim na trastim feifful wok bilong Jisas na yu stap aninit long Jisas na Jisas Em i BIKPELA bilong yu, orait olgeta blesim bilong heven em bilong yu – Em bilong yu!**

Tasol, yumi mas klia olsem, sapos yu no bilong Jisas, sapos yu no laik tanim bel, na yu no laik bilipim na trastim Jisas, na yu no laik i stap aninit long Jisas na bihainim Em, orait wanpela liklik blesim bilong heven i no bilong yu. Sapos yu givim baksait long Jisas, orait wanpela liklik blesim bilong heven i no bilong yu.

Ating sampela manmeri long sios i save tingim olsem, *“Sapos mi pas long sios bilong waitman, orait bai mi lukim ol blesim bilong heven.”* Sampela manmeri i tingim olsem, *“Sapos mi harim lotu na mi bihainim ol misin pasin na mi baptais na mi kisim Lordsapa na mi stap gutpela man na mi lavim ol manmeri, orait bai mi lukim olgeta blesim bilong heven.”*

Tasol, ol i rong. Olgeta blesim bilong heven i no bilong dispela kain manmeri. Nogat tru. Olgeta blesim bilong heven em bilong manmeri i pas long Krai. Em bilong manmeri i bilipim na trastim feifful wok bilong Krai na i bihainim Krai.

Yumi mas klia olsem, sapos yu no pas long Krai, orait yu pas yet long Adam. Yu save long Adam – em i pinga bilong yumi na em i bin pundaunim yumi olgeta insait long sin na dai.

Harim tok i stap long **Rom 5:15-18**. Bai mi kisim wanwan nek tasol long ol dispela lain. Lain 15. *“Dispela wanpela man Adam i putim mipela planti manmeri insait long dai.”* Na lain 16. *“Bikpela kot i kamap bihain long wanpela sin Adam i mekim, na dispela kot i save daunim ol manmeri.”* Na lain 17. *“Dispela wanpela man Adam em i bin mekim wanpela sin, na long dispela rot dai em i kamap na dai i save stap i go i go.”* Na lain 18. *“Orait, wanpela sin em i bin daunim olgeta manmeri na putim ol insait long dai.”*

Olsem na, yu mas klia olsem, sapos yu no bilong Krai, sapos yu no tanim bel na yu no bilipim na trastim Jisas na yu no bihainim Jisas, orait ol dispela hevi em bilong yu bikos yu pas yet long Adam tasol. Olsem na, bikpela kot long bihain em bilong yu. Na dai em bilong yu. Na bel hat bilong God em bilong yu. Na hel em

bilang yu. Yu bai lukim na pilim ol dispela kain samting tasol. Na wanpela blesim bilang heven yu no inap lukim.

Lukim **Efesus 2: 12-13**. Sapos yu no tanim bel na bilipim na trastim feitful wok bilang Jisas, orait yu stap *separet* long Kraim na yu stap *outsait* long olgeta blesim bilang heven, na yu no inap lukim wanpela gutpela samting i laik kamap bihain – yu no inap lukim wanpela gutpela blesim bilang heven.

Yu mas klia olsem, olgeta blesim bilang heven em bilang manmeri i pas long Jisas tasol. Na sapos yu no pas long Jisas, orait em olsem yu pas long Adam, na olgeta pen na hevi bilang hel em bilang yu tasol.

Olgeta blesim bilang heven em bilang manmeri i pas long Kraim tasol - em bilang manmeri i tanim bel na i bilipim na trastim wok bilang Jisas na i bihainim Em. Kraim i bin rausim olgeta trabel sin i bin kamapim na Em i putim yumi i pas long Em insait long olgeta blesim bilang heven.

Yumi i pas pinis long Jisas yumi mas klia olsem, olgeta blesim bilang heven em bilang yumi nau. Em i no gat kwesten mak long dispela. Sampela taim yumi tubel na yumi tingting planti, tasol yumi no ken i mekim olsem. Nogat. God i tok pinis long tok bilang Em, “Mi givim olgeta blesim bilang heven long yupela i bilang Jisas.”

Sampela blesim bilang heven yumi save lukim nau na sampela bai yumi lukim long heven. Tasol olgeta blesim bilang heven em bilang yumi i pas long Kraim.

Orait, em wanpela samting. Nau yumi skelim narapela toktok.

## **2. Yumi i pas long Kraim yumi no nidim narapela samting.**

Yumi bin toktok planti long olgeta blesim bilang heven, tasol ol dispela blesim bilang heven em i wanem samting?

Long **Efesus 1:4-14** aposel Pol i tokaut long ol wanwan blesim bilang heven. Yumi lukim na skelim.

- God i bin makim yumi na pasim yumi long Kraim bai yumi i stap holi na i no gat asua long ai bilang God. (Lain 4.) Yu save pinis olsem, yumi sin manmeri. Tasol, God i bin makim yumi na pasim yumi long Kraim na Kraim i bin mekim wok long diwai kros bilang stretim yumi long ai bilang God. Olsem na, nau yumi stap holi na i no gat asua long ai bilang God. Yumi no stretpela manmeri long laip bilang yumi, nogat. Tasol long ai bilang God yumi i pas long Kraim yumi stap holi na i no gat asua.
- Em i lavim yumi. (Lain 4.)
- Em i adoptim yumi na mekim yumi kamap pikinini bilang Em long wok Jisas Kraim i mekim. (Lain 5.) Em i putim yumi insait long femili bilang Em wantaim Jisas yet.

- Em i mekim grasia long yumi. (Lain 6.) Yu save pinis, grasia i no olsem marimari. Nogat. Marimari em i pasin we God Em i sori long yumi. Tasol, grasia em i narapela kain pasin. Yumi no gutpela manmeri we God i ken i tingting long mekim gutpela pasin long yumi, nogat. Tasol, stil God i mekim gutpela pasin long yumi. Dispela kain pasin em i grasia pasin. Olsem na, God i mekim grasia long yumi, na dispela grasia bilong Em i fri tasol. Yumi no inap mekim sampela wok na God i mekim gutpela pasin long yumi, nogat, em givim nating na Em i mekim gutpela pasin long yumi. Em i mekim grasia long yumi.
- Jisas i baim pe bilong sin bilong yumi na long dispela wei God i fogivim yumi long sin bilong yumi. (Lain 7-8.) Everi de God i save fogivim sin bilong yumi i pas long Jisas bikos Jisas i bin baim pe bilong sin bilong yumi.
- Em i givim trupela save na tingting bilong Em long yumi. (Lain 7-8.)
- Em i soim yumi as bilong plen bilong Em. (Lain 9.) Bipo yumi i no klia long wok bilong Jisas na yumi no klia long ol samting God i wokim long dai bilong Jisas bilong sevim yumi. Tasol nau yumi klia. Long wanem? God i bin opim ai bilong yumi na Em i opim ia bilong yumi na Em i opim bel bilong yumi na nau yumi klia long ol dispela wok bilong God na yumi tanim bel na bilip. I no wanpela man i kliaim tingting bilong yumi, nogat. God tasol i kliaim tingting bilong yumi. Em i yusim man, yes, tasol Em yet i givim dispela trupela save na tingting long yumi.
- Em i sevim yumi. (Lain 13.) Yumi lus manmeri tasol God i sevim yumi.
- Em i givim Holi Spirit bilong Em long yumi. (Lain 13-14.) Holi Spirit tasol i wok insait long laip bilong yumi na Em i givim bilip long yumi na yumi bilipim na trastim feitful wok bilong Jisas.
- Na Em i kisim bek yumi na yumi stap fri long pe bilong sin na dai wantaim Em. (Lain 14.) God i kisim bek yumi long wok Jisas i bin mekim na long dispela as yumi bai stap long heven wantaim Jisas.

Na yumi ken i joinim sampela toktok long dispela tok bilong Pol. Lukim **Rom 8:32**. *“God i no holim bek dispela wanpela PIKININI bilong Em. Nogat. Em i givim Em bilong helpim yumi olgeta (i pas long Em). Olsem na, yumi ken save, God Em i God bilong mekim grasia long yumi (i pas long Em), na Em bai givim ol narapela samting wantaim long yumi.”*

God i bin givim Krai long yumi na Krai i kisim ples bilong yumi na Em i kisim pe bilong sin bilong yumi na Em i dai. Long dispela wei God i bin givim Krai long yumi. Ol narapela samting em i liklik samting tumas. Bikpela samting Em i givim yumi pinis, em i Krai, olsem na, ol narapela samting wantaim Em bai givim yumi i pas long Krai.

Lukim tu long **Rom 8:17**. *“Na sapos yumi pikinini bilong God, orait ol samting God i laik givim Krai yumi tu bai kisim.”*

Yu harim? Olgeta samting God i laik givim Krai, yumi i pas long Krai yumi tu bai kisim. Olgeta samting Krai i kisim, yumi tu bai kisim – olgeta samting!

Yu save, long **Efesus 1:3** God i no tok olsem, “*Sampela* blesim bilong heven em bilong ol manmeri i pas long Jisas.” Nogat. Em i tok, “***Olgeta*** blesim bilong heven em bilong ol manmeri i pas long Jisas.” Yu harim? ***Olgeta*** blesim bilong heven em bilong ol.

*Olgeta* blesim bilong heven, *olgeta* samting bilong heven, *olgeta* samting long sait bilong heven, *olgeta* blesim bilong heven em bilong yumi i pas long Jisas, *olgeta* samting Jisas i kisim yumi tu bai kisim.

Tingim. Yumi manmeri nating tasol. Lukim hauslotu bilong yumi. Lukim klos bilong yumi. Yumi manmeri nating tumas. Tasol, God i givim *olgeta* blesim bilong heven long yumi i pas long Jisas.

Long dispela graun yumi no kisim *olgeta* samting long dispela graun long wanpela level. Nogat. Sampela manmeri i gat planti mani, narapela manmeri nogat. Sampela manmeri i gat gutpela gris long graun bilong ol, narapela manmeri nogat. Sampela manmeri i slip long gutpela haus, narapela manmeri nogat. Sampela manmeri i gat ka, narapela manmeri nogat. Yu save, long ol wanwan liklik blesim long dispela graun yumi no kisim long wanpela level. Nogat.

Tasol, bilong yumi i pas long Krai, yumi wanwan, maski yu blek skin o yu wait skin, maski yu save man o yu no save man, maski yu wanem kain man, sapos yu pas long Krai, orait *olgeta* blesim bilong heven em bilong yu. Mi no inap kisim moaten yu na yu no inap kisim moaten mi bikos yu kisim *olgeta* blesim bilong heven na mi tu mi kisim *olgeta* blesim bilong heven – yumi wantaim yumi kisim *olgeta* blesim bilong heven.

Yumi no save long wanem as God i givim planti kago bilong dispela graun long sampela manmeri na Em i givim liklik kago long narapela manmeri. Tasol, wanpela samting yumi klia long em, long sait bilong ol blesim bilong heven, God i givim *olgeta* blesim bilong heven long yu na Em i givim *olgeta* blesim bilong heven long *mi* – Em i givim *olgeta* blesim bilong heven long yu na mi i pas long Krai.

Yu save, yumi i pas long Krai, yumi no nidim wanpela samting moa bikos God i givim *olgeta* blesim bilong heven long yumi.

Ating, sampela bilong yumi i save tingting planti long ol bikpela misin na yumi laik i stap long bikpela misin bikos ol i gat nem na ol i gat gutpela haus lotu na ol i gat ol seket na paris samting na ol i gat mani bilong wokim skul na haus sik na ol kainkain samting olsem.

Tasol, ol dispela samting em i wanem samting? Bihain, ol dispela samting bai pinis. Bihain, ol dispela samting bai paia tasol taim Jisas i kam. Tasol, *olgeta* blesim bilong heven i no inap pinis. *Olgeta* blesim bilong heven i no inap paia taim Jisas i kam. Nogat tru. Harim. Yumi i pas long Jisas yumi gat *olgeta* blesim bilong heven na yumi no nidim ol samting bilong dispela graun tumas. Bai yumi stap liklik long hia long dispela graun na bihain yumi bai sindaun long heven i go i go i go *olgeta* oltaim oltaim na bai yumi amamas moa moa yet long *olgeta* blesim bilong heven God i givim yumi.

Harim, planti misin manmeri i gat planti samting bilong dispela graun, tasol, ol i no gat wanpela blesim bilong heven bikos ol i pas long misin pasin tasol na ol i no pas long Krai. Olsem na, yumi no ken i aigris long ol kago bilong ol. Maski. Yumi gat *olgeta* blesim bilong heven na dispela em inap long yumi – yumi no nidim moa.



Orait, las toktok mi laik givim yupela na em i liklik tok tasol na em olsem.....

### **3. Litimapim nem bilong God na tok tenkyu long Em.**

Lukim **lain 3** gen. Yumi mas litimapim nem bilong God na tok tenkyu long Em bikos Em i mekim gutpela gutpela samting long yumi. Em i no sotim yumi. Nogat. Em i givim *olgeta* blesim bilong heven long yumi i bilong Krai.

Ating yumi save komplem tumas. Olgeta taim yumi gat sampela komplem long sampela samting. Na jelas tu i save stap namel long yumi. Planti taim yumi save komplem na jelas long ol sampela samting bikos yumi tingting tumas long olgeta samting bilong dispela graun na yumi no holim tingting long olgeta blesim bilong heven God i givim yumi.

God i givim olgeta blesim bilong heven long yumi olgeta i pas long Krai, olsem na, i no gat as long yumi komplem na i no gat as long yumi jelas long narapela manmeri.

Plis harim. Mobeta yumi stap olsem aposel Pol na yumi litimapim nem bilong God tasol, na yumi amamas tasol long God, na yumi tok tenkyu long God.

**Olsem na, pulimapim tingting bilong yu long olgeta blesim bilong heven God i givim yu. Lukim na skelim dispela tok i stap long Efesus 1:1-14 – pulimapim tingting bilong yumi long ol dispela toktok – lainim gut na holim tingting long ol dispela toktok – na larim bel bilong yu i kisim bikpela amamas na bikpela tenkyu long God.**

God i bin givim olgeta blesim bilong heven long yumi i pas long Krai. Yumi i tanim bel na i bilipim na trastim feifful wok bilong Jisas long diwai kros na i bihainim Jisas, yumi i pas long Jisas, yumi no nidim narapela samting. Nogat. Yumi i pas long Jisas God i bin givim olgeta blesim bilong heven long yumi. Olsem na, yumi litimapim nem bilong God na tok tenkyu long Em long mekim ol dispela samting long yumi.

Em tasol.

# God i bin makim yumi na pasim yumi long Krai.

---

## Efesus 1:4.

---

Taim aposel Pol i raitim dispela pas, em i raitim na salim i go long husat? Lukim lain 1. Pol i tok olsem, *“Mi salim dispela pas long yupela, ol manmeri bilong God i stap long taun Efesus. Yupela manmeri i bihainim tru Krai Jisas.”* Pol i bin salim dispela pas i go long *“ol manmeri bilong God.”* Em i salim dispela pas i go long *“Yupela manmeri i bihainim tru Krai Jisas.”*

Olsem na, yumi ken i save olsem, olgeta toktok i stap insait long dispela pas yumi kolim *“Efesus”*, olgeta tok i stap insait long dispela pas, em bilong ol manmeri i bihainim tru Krai Jisas – em bilong ol manmeri bilong God tasol. Taim Pol i tok *“yumi”* em i no minim yumi *olgeta* manmeri. Nogat. Em i minim yumi manmeri *bilong God* – em i minim yumi manmeri *i bihainim tru Krai Jisas* – em i minim yumi manmeri *i tanim bel na i bilipim na trastim feifful wok Jisas Krai i bin mekim* – em i minim yumi manmeri *i pas long Jisas*.

Long sios bilong mipela hia long ples i gat sampela manmeri i bin tanim bel na i bilipim na trastim feifful wok Jisas i bin mekim - i gat sampela manmeri i pas long Jisas. Na i gat sampela manmeri i no tanim bel na i no laik pas long Jisas na i no laik bilipim na trastim na bihainim Jisas. Olsem na, toktok God i mekim long dispela pas Efesus em i no bilong *yumi olgeta*. Nogat. Em bilong *yumi i pas long Jisas*.

Long Efesus 1:1-3 yumi bin skelim lain 3 we aposel Pol i tokim yumi olsem, *“Em (God) i bin givim olgeta blesim bilong heven long.....”* husat? *“....yumi i bilong Krai.”* Olsem na, yumi klia olsem, olgeta blesim bilong heven i no bilong *olgeta* manmeri, i no bilong *yumi olgeta*. Nogat. Olgeta blesim bilong heven em bilong *yumi i bilong Krai*, em bilong *yumi i pas long Krai*, em bilong *yumi i tanim bel na i bilipim na trastim wok bilong Jisas Krai long diwai kros*.

Na ol dispela blesim bilong heven em i wanem samting? Long lain 4 i go daun long lain 14 aposel Pol i tokaut long ol wanwan blesim God i givim yumi. Nau moning bai yumi skelim lain 4 tasol. Na fes blesim Pol i tokaut long em na God i bin givim yumi em i olsem, God i bin makim yumi. Olsem na, fes toktok mi laik tokim yupela nau dispela moning i olsem.....

### 1. God i bin makim yumi.

Dispela em i wanpela blesim God i bin mekim long yumi – Em i bin makim yumi. Lukim **lain 4.** *“Long bipo, taim God i no kamapim dispela graun yet, Em i bin makim yumi....”*

Na yu save long pasin bilong makim. Taim papa i laik kukim wanpela kaukau na givim mi, orait em i *makim* wanpela bilong mi na kukim. Em olsem em i *pikim* wanpela bilong mi. Em i gat planti kaukau i stap long bilum, tasol em i *makim* wanpela, em i *pikim* wanpela bilong kukim na givim long mi.



dispela manmeri Em i makim ol i mas lavim Jisas na bihainim Em na tok tenkyu long Em long ol dispela samting Em i bin mekim.

Olsem na, long bipo, taim dispela graun i no kamap yet, God i bin makim na pikim husat Em bai kamautim long sin na dai na putim ol i go insait long olgeta gutpela blesim bilong Em. Na tu, Em i bin wokim disisen long *hau* Em bai kamautim ol long sin na dai na *hau* Em bai putim ol i go insait long olgeta gutpela blesim bilong Em. Olsem na, Em i makim Jisas tasol long mekim wok bilong kamautim ol long sin na dai na putim ol i go insait long olgeta gutpela blesim bilong God. God i bin wokim disisen bilong salim Holi Spirit i go long ol dispela manmeri Em i bin makim bilong mekim wok insait long laip bilong ol na bai ol i luksave na tanim bel na bilipim na trastim na lavim na bihainim Jisas Kraus.

**Olsem na, yu tingim** - yumi i tanim bel na i bilipim na trastim wok bilong Jisas na i laik bihainim Jisas, long wanem as yumi tanim bel? Long wanem as yumi bilipim na trastim Jisas? Long wanem as yumi lavim Jisas? Long wanem as yumi wok nau long bihainim Jisas?

Yumi tanim bel na bilipim na trastim na lavim na bihainim Jisas bikos long bipo, taim God i no bin kamapim dispela graun yet, God i bin makim yumi, God i bin pikim yumi bilong putim yumi i go insait long olgeta gutpela blesim bilong heven. Em i bin makim yumi na pikim yumi, na Jisas i bin mekim wok bilong kamautim yumi long sin na dai na putim yumi i go insait long olgeta gutpela blesim bilong heven, na Holi Spirit i bin kam long yumi na kamapim bilip long bel bilong yumi. Long dispela as tasol, yumi tanim bel na yumi bilipim na trastim na lavim na bihainim Jisas nau.

Long bipo, taim Em i no kamapim dispela graun yet, God i bin wokim disisen bilong kisim bek yumi na putim yumi insait long laip. Em i bin makim yumi bilong ol dispela samting na Em i mekim wok insait long laip bilong yumi na long dispela as nau yumi tanim bel na bilipim na trastim na lavim na bihainim Jisas.

Na sapos God i no bin wokim disisen olsem na makim yumi bilong kamautim yumi long sin na dai, orait bai yumi stap olsem wanem? Bai yumi stap insait yet long sin na dai. Bai yumi stap yet wantaim olgeta manmeri insait long sin na dai. Na bai yumi lus long hel tasol wantaim olgeta manmeri.

Yumi bai lukim olgeta blesim bilong heven bikos long bipo God i bin makim na pikim yumi bilong kamautim yumi long sin na dai na bilong putim yumi i go insait long olgeta blesim bilong God.

Yumi i tanim bel na i bilipim na trastim Jisas na bihainim Jisas, yumi stap olsem bikos God i bin makim yumi long bipo tasol na Em i bin givim bilip long yumi. Em i bin makim yumi bilong putim yumi i go long ol dispela samting, na long dispela as Em i opim ai bilong yumi na Em i givim bilip long yumi.

God i bin makim yumi bikos Em i laik kisim bek yumi na putim yumi insait long olgeta gutpela blesim bilong Em. Na wantaim dispela Em i salim Jisas i kam dai long yumi na Em i salim Holi Spirit i kam na Em i kamapim bilip long yumi. Long dispela as nau yumi bilipim na trastim na lavim na bihainim Jisas. Yumi bilip nau bikos long bipo God i bin mekim yumi bilong givim ol dispela samting long yumi.

**Na mi laik stretim wanpela paul tingting....** God i no skelim pasin bilong yumi pastaim na Em i makim yumi. Nogat. Long wanem taim God i bin makim yumi? Long bipo, taim yumi no kamap yet, taim yumi no bon yet, taim yumi no mekim wanpela pasin yet, long dispela bipo taim God i bin makim yumi. Olsem na, yumi

mas klia olsem, God i no lukim gutpela pasin bilong yumi pastaim na makim yumi. Nogat. Em i bin makim yumi long bipo tasol. Em i bin makim yumi nating tasol. God, long laik bilong Em yet, Em i makim na pikim yumi bilong kisim bek yumi na putim yumi insait long ol gutpela blesim bilong God.

Sampela man i tok olsem, “God i save makim ol gutpela manmeri na kisim bek ol.” Tasol dispela tok em i paul tok bikos God i bin makim yumi long bipo, taim yumi no kamap yet na yumi no wokim wanpela samting yet. Na tu, sapos God i save makim ol gutpela manmeri, orait ating Em i no inap makim wanpela manmeri. Long wanem, wanpela gutpela manmeri i no stap – olgeta i pundaun pinis insait long sin na sin i karamapim olgeta manmeri. (Yu ken i lukim **Rom 3:9-12.**)

Olsem na, yumi no ken i paul long dispela toktok. Long bipo, taim dispela graun i no kamap yet, taim yumi no bon yet, God, long laik bilong Em yet, Em i bin makim na pikim yumi nating bilong kamautim yumi long sin na dai na bilong putim yumi insait long olgeta blesim bilong Em.

Long dispela as yumi ken i amamas. Yumi sin manmeri tasol na yumi pundaun pinis insait long sin na dai. Tasol God i bin makim na pikim yumi nating bilong givim olgeta blesim bilong heven long yu na mi. Dispela samting em i wok God i mekim “long stat tu pinis”. Wanpela liklik wok yumi no mekim. Nogat. Yumi bin i stap insait long sin na dai. Tasol God yet i bin makim na pikim yumi na Em i mekim olgeta wok bilong kamautim yumi long sin na dai na putim yumi insait long olgeta blesim bilong Em.

Na bai yumi tok wanem? Yumi mas mekim wankain tok olsem aposel Pol – “Litimapim nem bilong God, Papa bilong Bikpela bilong yumi Jisas Krai bikos God yet, long laik bilong Em yet, Em i pikim yumi na putim yumi insait long olgeta blesim bilong heven.”

Orait, dispela em i fes blesim God i bin givim yumi. Tasol lain 4 i tokaut long narapela blesim na dispela blesim i olsem.....

## **2. God i bin pasim yumi long Krai.**

Lukim **lain 4 gen.** *“Long bipo, taim God i no kamapim dispela graun yet, Em i bin makim yumi na pasim yumi long Krai.”* Taim God i bin makim na pikim yumi, Em i bin pasim yumi long Krai. Em i bin joinim yumi long Krai. Em i putim yumi wantaim Krai. Em i sanapim yumi wantaim Krai. Em i bin pasim yumi long Krai.

Long bipo, taim God i no kamapim dispela graun yet, Em i bin pasim yumi long Krai. Em i no nau tasol Em i pasim yumi long Krai. Nogat. Em i no pasim yumi long Krai taim yumi bilip. Nogat. Long bipo, taim God i no kamapim dispela graun yet, Em i bin pasim yumi long Krai. Long bipo, taim Em i makim na pikim yumi, long dispela taim Em i pasim yumi, Em i joinim yumi, Em i putim yumi, Em i sanapim yumi, Em i pasim yumi long Krai.

Olsem na, long tingting bilong God, long ai bilong God, yumi wanwan manmeri God i bin makim na pikim, yumi no stap wanpis. Nogat. God i bin pasim yumi long Krai na long ai bilong God yumi na Krai i stap wantaim.

Yu tingim. Taim God i lukim yu, Em i no lukim yu tasol. Nogat. Em i lukim yu na Em i lukim Krai wantaim. Olgeta taim God i save lukim yu na Krai wantaim. Em i no save lukim Krai tasol. Nogat. Na Em i no save lukim yu tasol. Nogat. Olgeta taim God i save lukim yu na Krai wantaim bikos long bipo God i bin makim na pikim yu na pasim yu long Krai.

Harim wanpela tok bilong Jisas yet – Em i tok piksa na tokaut long dispela samting. Lukim **Jon 10:14-15 na 27-29**.

Ol sipsip ol i husat? Sipsip em i ol manmeri God i bin makim na pasim long Krai. God i givim ol long Krai (lukim gen lain 29), na Krai i save mekim wok bilong lukautim ol. God i pasim ol long Krai na Krai i lusim laip bilong Em bilong kamautim ol long sin na dai na putim ol i go insait long olgeta gutpela gutpela blesim bilong God. Wasman bilong sipsip i lusim laip bilong Em bilong putim ol sipsip bilong Em i go insait long laip i stap gut oltaim oltaim – insait long olgeta blesim bilong heven!

Na wanpela sipsip God i bin makim na pikim na i givim Krai, wanpela i no inap lus. Nogat tru. God i save long ol wanwan, na Jisas i save long ol wanwan, na Em i mekim wok bilong lukautim ol wanwan. Ol i no inap lus bikos Jisas i lusim laip bilong Em bilong kamautim ol wanwan long sin na dai na putim ol wanwan i go insait long olgeta gutpela blesim bilong God. God Em i pasim ol sipsip long Krai na Krai i mekim wok bilong sevim ol. Olsem na, hau na bai wanpela i lus? I no inap tru.

Ating sampela bilong yumi, yumi i bin tanim bel na i bilipim na trastim na lavim na bihainim Jisas, ating sampela taim yumi tubel liklik na yumi wari liklik long laip bilong yumi. Sampela taim yumi kisim tingting olsem, “Bai mi go long heven o nogat, bai God i kisim mi o nogat, ating mi no save, God yet Em i save.” Olsem na, sampela taim bilip bilong yumi em i seksek liklik. Yumi klia pinis long wok Jisas i bin mekim bilong kamautim yumi long sin na dai na bilong putim yumi insait long laip, tasol stil, wanwan taim, yumi kisim liklik tubel long tingting bilong yumi na yumi wari na tingting planti long “bai God i kisim yumi o nogat?”

Tasol yumi, yumi no ken i wari na tingting planti olsem bikos long bipo, God i bin makim na pikim yumi na pasim yumi pinis long Krai, na long dispela as yumi no inap lus. God i no inap lukim wok bilong yumi na lukim gutpela pasin o nogut pasin yumi i mekim. Nogat. Em bai lukim Krai tasol. Em bai lukim wok Krai i bin mekim na Em bai lukim stretpela pasin Krai i bin mekim, na Em bai lukim yumi Em yet i pasim long Krai – Em i bin pasim yumi long Krai – em i no yumi yet i pasim yumi long Krai – Nogat – God i pasim yumi long Krai. Olsem na, taim God i lukim yumi, Em bai lukim Krai na Em bai lukim yumi *Em yet* i pasim long Krai, na Em bai welkamim yumi i kam insait long heven wantaim Krai.

Mi givim wanpela tok piksa.....Ating yupela save long pasin bilong stoa bilong SIL – taim yu laik go insait long stoa bilong SIL yu mas holim kad na yu ken i go insait. Na sapos yu no gat kad, orait wanpela man bai stopim yu long i go insait.

Tasol, sapos mi pasim yu long mi na yumi laik go insait long stoa, orait ol bai welkamim yu bikos mi gat kad na mi pasim yu long mi. Ol bai lukim mi na kad bilong mi na long dispela as ol bai welkamim yu na bai yu go insait long stoa. Yu ken i go insait bikos mi pasim yu long mi. Tasol, sapos wanpela man i giaman na i tokim ol sikuriti olsem, “Mi pas wantaim waitman,” mi laik go insait long stoa, orait ol sikuriti bai askim mi, tasol mi bai tok “Nogat, em i no pas wantaim mi.” Na ol sikuriti bai rausim dispela man na em i no inap i go insait

long stoa. Olsem na, mi tok pinis, sapos *mi* pasim yu long mi, orait bai yu go insait long stoa wantaim mi bikos mi gat kad na mi bin pasim yu long mi.

Na wankain olsem, God bai lukim Krai na Em bai welkamim yumi wantaim Krai bikos God yet i bin pasim yumi long Krai na Krai Em i gat “kad.” Na kad bilong Jisas Em i wanem samting? Kad bilong Jisas em i hul i stap long han bilong Em na lek bilong Em na hul i stap long banis bilong Em we ol i sutim em long naip – kad bilong Jisas em i ol mak bilong dai bilong Em. God bai lukim ol dispela “kad” bilong Jisas na Em bai welkamim yumi i kam insait long heven bikos Jisas i bin mekim olgeta wok long diwai kros inap pinis na dispela wok bilong Jisas long diwai kros i kamautim yumi long sin na dai na putim yumi insait long olgeta blesim bilong God.

Olsem na, taim God i makim yumi na pasim yumi long Krai Em i bin wokim gutpela samting tru long yumi na yumi ken i amamas moa moa yet long dispela gutpela gutpela wok bilong dispela gutpela gutpela God. Yumi no ken i tubel bikos God i bin pasim yumi long Krai longtaim pinis na Krai i bin mekim wok longtaim pinis bilong kamautim yumi long sin na dai na bilong putim yumi insait long olgeta gutpela blesim bilong God.

Orait, nau yumi bin skelim tupela blesim God i mekim long yumi. Tasol long lain 4 Pol i tokaut long narapela blesim, na dispela blesim i olsem.....

### **3. God i bin mekim yumi stap holi na i no gat asua long ai bilong Em.**

Lukim **lain 4 gen.** *“Long bipo, taim God i no kamapim dispela graun yet, Em i bin makim yumi na pasim yumi long Krai bai yumi i stap holi na i no gat asua long ai bilong Em.”*

Yumi klia pinis olsem, long laip bilong yumi, yumi no holi. Nogat. Yumi gat asua - yumi gat planti asua! Tasol, long ai bilong God yumi stap holi na yumi no gat asua. Long wanem? Yumi bin tok pinis - God i bin transferim olgeta sin bilong yumi i go long Krai, na Krai i givim stretpela pasin bilong Em long yumi. Olsem na, God i save lukim ol dispela samting, na long ol dispela samting tasol yumi stap holi long ai bilong God na yumi no gat asua long ai bilong God.

God i bin pasim yumi long Krai bikos Krai tasol bai mekim olgeta wok bilong mekim yumi holi long ai bilong God na bilong rausim olgeta asua bilong yumi. God i pasim yumi long Krai bikos Jisas tasol i ken i mekim yumi holi long ai bilong God na yumi no gat asua. God i givim dispela wok i go long han bilong Krai tasol. Olsem na, Em i pasim yumi long Krai bai Krai i mekim wok na mekim yumi stap holi na i no gat asua long ai bilong God.

Na dispela i gutpela bikos yumi no inap i stap holi long strong bilong yumi, na yumi no inap rausim asua bilong yumi long strong bilong yumi. Na sapos yumi no holi na yumi i gat asua, orait bai God i sanapim yumi long kot tasol na sentisim yumi i go long hel.

Tasol, God i bin makim yumi na pasim yumi long Krai bai yumi ken i stap holi na i no gat asua long ai bilong Em. Yumi no gat asua long ai bilong God bikos Jisas i bin tekewe olgeta asua bilong yumi. Na yumi stap holi

long ai bilong God bikos Jisas yet i bin i stap holi na Em i givim dispela holi pasin bilong Em long yumi. Long dispela wei tasol God i kisim bek yumi na putim yumi insait long olgeta gutpela gutpela blesim bilong Em.

### **Las toktok.**

Long lain 4 aposel Pol i tok olsem, *“God i bin lavim yumi.”* Na mi laik askim yupela wanpela askim – *“Long wanem taim God i bin lavim yumi? God i lavim yumi pastaim o Em i lukim ol naispela pasin bilong yumi, olsem bilip pasin na lotu pasin, na Em i lavim yumi?”*

God Em i bin lavim yumi pastaim. Long bipo, taim God i no kamapim dispela graun, Em i bin lavim yumi na Em i makim yumi na pasim yumi long Krai bai yumi ken i stap holi na i no gat asua long ai bilong Em na Em i ken i kisim bek yumi na putim yumi insait long olgeta gutpela gutpela blesim bilong Em.

Olsem na, yumi no gat as long litimapim nem bilong yumi yet. Nogat. Bai yumi litimapim nem bilong God tasol na tok tenkyu long God tasol. Yumi mas litimapim nem bilong God na tok tenkyu long God long *maus* bilong yumi taim yumi prea na singim song na taim yumi toktok wantaim ol narapela manmeri.

Tasol tu, yumi mas litimapim nem bilong God na tok tenkyu long laip bilong yumi - long pasin bilong yumi. Sapos yu toktok na litimapim nem bilong God, tasol yu no bihainim Em long laip bilong yu, long pasin bilong yu, orait yu giaman na yu daunim nem bilong God tasol bikos yu toktok tasol na yu no laik bihainim Em. Tasol taim yumi bihainim God na yumi trai hat long bihainim olgeta pasin Em save laikim, em nau, yumi litimapim nem bilong Em. Em olsem yumi rispektim Em na yumi soim olsem, Em i BIKPELA bilong yumi. Em olsem yumi litimapim nem bilong Em.

Olsem na, litimapim nem bilong God, Papa bilong Bikpela bilong yumi, Jisas Krai. Long wanem? Em i bin makim yumi na pasim yumi long Krai bai yumi i ken stap holi na i no gat asua long ai bilong God, na long dispela wei God i kisim bek yumi na putim yumi insait long olgeta gutpela gutpela blesim bilong Em.

Em tasol.



## God i bin makim yumi bilong adoptim yumi.

---

### Efesus 1:5-6.

---

Yu save, femili bilong yumi em i wanpela bikpela samting stret bilong yumi, a? Ating yumi ken i tok olsem, femili em i nambawan samting bilong yumi olgeta manmeri. Yumi save laikim femili bilong yumi tumas.

Mi laik soim yupela wanpela toktok God i bin mekim long sait bilong femili. Lukim **Efesus 1:5-6** wantaim liklik hap i stap long **lain 4**.

**“Em i bin lavim yumi. Na long dispela as Em i bin makim yumi bilong *adoptim* yumi na mekim yumi kamap pikinini bilong Em.”**

God Em i makim yumi bilong *adoptim* yumi bikos Em i laik kisim yumi i kam insait long femili bilong Em. Em i adoptim yumi bilong mekim yumi pikinini bilong Em.

Na yumi save long pasin bilong *adoptim* pikinini. Sapos yu adoptim wanpela pikinini, orait dispela i minim olsem yu kisim em i kam insait long femili bilong yu yet, na bai yu lukautim em olsem yu yet yu bin karim em.

Long ples bilong mipela (ol wait) taim mipela laik adoptim pikinini mipela mas sainim ol pepa na adoptim pikinini. Na taim mipela sainim pepa pinis, orait nau pikinini em i pikinini bilong mipela stret, na wanpela manmeri i no inap kam kisim bek. Nogat. Pepa i tok pikinini i bilong mipela tasol.

Na God Em i adoptim yumi olsem yumi save adoptim pikinini o dispela tok long lain 5 i gat narapela minim bilong em i stap, a? Nau moning mi mas tokim yupela olsem, dispela tok i no gat narapela minim. Tru tumas, God i bin makim yumi bilong *adoptim* yumi na mekim yumi kamap *pikinini* bilong Em yet. Em i *adoptim* yumi na Em i mekim yumi kamap pikinini long *femili* bilong Em yet.

Na dispela tok em i no toktok nating tasol. Nogat. Tru tumas, God i bin *adoptim* yumi. Tru tumas, God i *mekim* yumi pikinini bilong Em yet. Dispela em i trupela samting God i bin mekim. God i bin *adoptim* yumi na mekim yumi pikinini bilong Em yet long femili bilong Em yet.

I olsem God i sainim olgeta pepa na Em i adoptim yumi. Em i adoptim yumi na *mekim* yumi pikinini bilong Em. Em i no kolim yumi “pikinini” tasol. Nogat. Em i *mekim* yumi pikinini bilong Em. Em i *mekim* yumi pikinini bilong Em taim Em i *adoptim* yumi. Wankain olsem yumi adoptim pikinini, em nau, God Em i adoptim yumi na Em i *mekim* yumi pikinini bilong Em.

**Na God Em i adoptim husat?**

God Em i adoptim ol dispela manmeri Em i bin makim na pasim long Krai. Long bipo, taim dispela graun i no kamap yet, God i bin makim na pikim ol sampela manmeri bilong kamautim ol long sin na dai na Em i bin pasim ol long Krai bai ol i stap holi na i no gat asua long ai bilong Em, God Em i adoptim ol dispela manmeri.

Em i adoptim yumi - *yumi* God i bin makim na pasim long Krai. Em i adoptim *yumi* Holi Spirit i bin mekim wok insait long bel bilong *yumi* na kamapim bilip long *yumi*. God i no adoptim olgeta manmeri. Nogat. Em i adoptim *yumi* – *yumi* manmeri God i bin makim na pasim long Krai na bihain Em i kamapim bilip long yumi na nau yumi bilipim na trastim feifful wok bilong Jisas na bihainim Em.

### **Na long wanem as God Em i adoptim yumi?**

Lukim **lain 5**. God Em i adoptim yumi na mekim yumi pikinini bilong Em bikos Em i laik mekim olsem. Em i bihainim amamas bilong Em yet na Em i adoptim yumi. Em i bihainim laik bilong Em yet na Em i adoptim yumi. God Em i adoptim yumi bikos Em amamas long adoptim yumi. Em i adoptim yumi bikos Em i laik adoptim yumi.

Harim. Em i no adoptim yumi bikos yumi tanim bel na bilip. Nogat. Em i no adoptim yumi bikos yumi naispela na gutpela manmeri. Nogat. God Em i makim yumi bilong adoptim yumi bikos Em laik adoptim yumi. As bilong dispela samting i stap long tingting na bel bilong God tasol. God yet i bihainim amamas na laik bilong Em yet na Em i makim yumi na Em i adoptim yumi na Em i mekim yumi kamap pikinini bilong Em.

### **Na dispela pasin bilong God em i soim yumi grasia bilong Em.**

Lukim **lain 6**. Na yupela save olsem, grasia em i no olsem marimari. Nogat. Marimari em i pasin we God Em i pilim sori long manmeri. Na sampela taim yumi tu yumi ken i marimari. Sampela taim yumi ken i sori long sampela manmeri na yumi helpim ol. Taim yu pilim sori long wanpela man na yu helpim em, em nau, yu marimari long em.

Tasol grasia em i narapela samting. Grasia em i pasin we God Em i wokim disisen na Em i mekim gutpela pasin long manmeri i no gutpela manmeri.

Yu save long pasin bilong yumi yet. Yumi ken i mekim gutpela pasin long manmeri i mekim gutpela pasin long yumi. Sapos wanpela man i mekim gutpela pasin long yumi, orait bai yumi bekim bek dispela gutpela pasin na bai yumi mekim gutpela pasin long em. Na manmeri i no mekim gutpela long yumi, orait yumi no inap mekim gutpela pasin long ol. Pasin bilong manmeri bilong dispela graun i olsem, ol i ken i mekim gutpela pasin long manmeri i mekim gutpela pasin long ol.

Tasol God i no mekim olsem long yumi. Nogat. Yu tingim. Yumi bin givim baksait long God. Yumi bin sakim tok bilong God. Yumi bin mekim pasin God i no save laikim. Yumi klia long tok bilong God tasol yumi no bihainim tok bilong Em. Yumi no lavim Em. Yumi no trastim Em. Yumi amamas long kisim na yusim ol gutpela samting bilong Em, tasol yumi no bin tok tenkyu long Em na yumi no tingting long bihainim Em. Yumi bikhet long Em na yumi les tru long i stap aninit long lek bilong Em.

Na *dispela* kain pasin Em inap kirapim bel hat bilong God. Dispela kain pasin Em inap mekim God i givim baksait long yumi. Dispela kain pasin em inap mekim God i les tru long helpim yumi. Dispela kain pasin em inap rausim amamas bilong God na mekim God i laik bekim bek na bagarapim yumi. Dispela kain pasin em inap mekim God i larim yumi i kisim hevi insait long hel.

Tasol God i mekim wanem long yumi? Em i mekim gutpela pasin long yumi. Em i adoptim yumi na mekim yumi pikinini bilong Em na mekim yumi kamap femili bilong Em. Em i no aipas long pasin nogut bilong yumi. Nogat. Em i lukim. Tasol, Em i wokim disisen olsem, “Bai Mi mekim gutpela pasin long ol. Bai Mi adoptim ol na kisim ol i kam insait long femili bilong Mi yet. Bai Mi lukautim ol olsem Mi yet i bin karim ol. Bai Mi givim femili nem bilong Mi long ol. Bai ol i kamap femili bilong Mi stret na bai ol i kisim olgeta gutpela gutpela samting bilong Mi.”

Yu mas klia olsem, dispela pasin em i grasia pasin. Olsem na, taim God Em i makim yumi na Em i adoptim yumi, orait grasia bilong Em i kamap ples klia. Yumi no gutpela manmeri na God i mekim gutpela pasin long yumi. Nogat. Yumi manmeri nogut tru, tasol God i mekim gutpela pasin long yumi. Dispela Em i *grasia* bilong God.

Na mi tokim yupela, yumi mas skelim gut dispela grasia bilong God, na yumi mas tok tenkyu moa moa yet long God.

Yu tingim. Taim yumi go pinis long heven bai yumi mekim wanem? Bai yumi litimapim nem bilong God na long Jisas i go i go i go bikos God Em i bin mekim grasia long yumi manmeri nogut na Em i bin pasim yumi long Kraim na Kraim Em i dai bilong mekim yumi holi na i no gat asua long ai bilong God, na God Em i bin adoptim yumi na mekim yumi kamap pikinini bilong Em na Em i putim yumi i go insait long femili bilong Em. Yumi mas klia long dispela - Long grasia bilong God tasol bai yumi sanap long heven long bihain.

### **Na God Em i wokim wanem na Em i adoptim yumi?**

Lukim **lain 5-6** gen. Em i adoptim yumi long wok bilong wanpela man Em i lavim tumas. Em i tok long husat? Em i tok long Jisas Kraim. Na long wanem as Pol i tok, “Wanpela man God i lavim tumas”? Long wanem as Pol i no tok “Jisas” tasol? I gat as long dispela na bai mi eksplenim.

Yu tingim. Jisas Em i mekim wankain pasin yumi bin mekim o nogat? Em i stap man nogut olsem yumi o nogat? Em i sakim tok bilong God olsem yumi mekim o nogat? Em i mekim pasin God i no save laikim olsem yumi mekim o nogat? Em i les long bihainim God olsem yumi les long bihainim God o nogat? Em i bihainim laik bilong Em yet olsem yumi bihainim laik bilong yumi yet o nogat? Em i bikhet long God na i stap aninit long lek bilong Em yet olsem yumi mekim o nogat?

Nogat nogat tru! Jisas Em i wanpela gutpela gutpela gutpela man tru na Em i lavim Papa bilong Em na Em i bihainim olgeta tok bilong Papa bilong Em, na Em i trastim Papa bilong Em na Em i stap gutpela tru aninit long lek bilong Papa bilong Em. Em i pas gutpela long Papa bilong Em. Olgeta taim Jisas i mekim pasin God i save laikim tumas.

Tasol, long plen bilong God na long laik bilong God, dispela wanpela gutpela Pikinini bilong Em i dai long diwai kros olsem Em i wanpela man nogut tru. Dispela em i wei bilong God i ken i adoptim yumi sin

manmeri na bringim yumi i kam insait long femili bilong Em. Jisas i kisim bagarap bilong pinisim pe bilong sin bikos Papa i laik adoptim yumi manmeri nogut na bringim yumi manmeri nogut i kam insait long femili bilong Em. Em olsem na, long wok bilong Jisas, God i mekim gutpela pasin long yumi manmeri nogut, na dispela em i grasia bilong God.

Na taim Jisas i karim sin bilong yumi long diwai kros na Em i dai, yu tingim olsem God Em i no kea, a? Yu tingim olsem God i no kisim hevi long dispela, a? Harim. Ating aiwara bilong God i no isi long dispela taim (mi tok piksa na mi tok “aiwara bilong God i no isi”). God i bin kisim bikpela hevi tru taim Jisas i bagarap long diwai kros. Na yumi mas holim tingting olgeta taim olsem, Jisas i bin i dai long diwai kros bilong God i ken i adoptim yumi sin manmeri. Dispela gutpela gutpela man God i lavim tumas i bin lusim laip bilong Em bilong God i ken i adoptim yumi manmeri nogut.

Em olsem na, Pol i yusim nek, “Wanpela man God i lavim tumas” bilong pulim tingting bilong yumi i kam long grasia bilong God. Nau yu gat wanem tingting long grasia bilong God? Yu save, grasia bilong God Em i bikpela na gutpela samting moa moa yet.

### **Na long wanem as God i tokim yumi long ol dispela samting?**

God Em i tokim yumi long ol dispela samting bikos Em i laik yumi mas save gut long Em. Lukim **Efesus 1: 17-18**. Aposel Pol i mekim prea na Em i prea long wanem samting?

Yumi mas klia gut long wanem samting God i kisim yumi i kam long em na long dispela wei bai yumi save gut long Papa bilong yumi na bai yumi amamas long Em na bai yumi litimapim nem bilong Em.

Yumi mas klia olsem, God i no laik yumi save gut long ol Baibel stori tasol. Nogat. Em i laik yumi save gut long Em yet. God i laik yumi mas save gut long Em i wanem kain Man – Em i wanem kain God – Em i save mekim wanem kain pasin – Em i gat wanem kain tingting – God i laik yumi mas save long Em yet.

Na yu gat wanem tingting? Ating bipo yupela no save gut long God, a? Bipo, ol man ol i no tokim yupela gut long olgeta samting God i mekim, a? Ating ol i bin skulim yupela long ol Baibel stori tasol, a? Olsem wanem? Ating ol i mekim olsem bikos ol yet ol i no save tumas long God.

Ol prens plis harim, God bilong yumi Em i dispela kain God nau yumi stori long Em. Yumi mas wok hat long kisim ol dispela toktok na long dispela wei bai yumi save gut long dispela gutpela gutpela God bilong yumi, na bai yumi lavim Em na litimapim nem bilong Em trutru na bihainim Em moa moa yet.

Mi laik yusim ol dispela toktok bilong sutim bel bilong yumi long 2-pela samting.

### **1. God Em i “Paps” bilong yumi, olsem na, yumi no ken i pret moa.**

Yu save, taim God Em i adoptim yumi, orait Em i bin mekim Em yet i kamap “Paps” bilong yumi. Em i mekim Em yet i kamap “Dadi” bilong yumi, Papa bilong yumi.

God Em i bikipela **Jas** bilong ol manmeri i givim baksait long Em na bihain God bai kotim ol na sentisim ol. Tasol, God Em i no Jas bilong yumi. Nogat. God Em i “Paps” bilong yumi.

God Em i “Paps” bilong yumi manmeri Em i bin adoptim na kisim i kam insait long femili bilong Em. Em i “Dadi” bilong yumi God i bin makim bilong adoptim. Yumi no ken i pret moa long bikipela kot bilong bihain bikos God Em i no Jas bilong yumi moa. Nogat. Nau Em i Paps bilong yumi, na long dispela as yumi no inap lukim kot.

Na tu, yumi no ken i pret moa long ol poisen man na ol man nogut na ol masalai samting. Long wanem? Paps bilong yumi Em i bos na oana bilong olgeta samting na Em tasol i save bosim na kontrolim olgeta samting. Na yu tingim olsem Paps bilong yumi bai larim wanpela samting i bagarapim yumi na rausim yumi long han bilong Em, a? Nogat tru!

Mi no tok olsem, trabel i no inap kamap long yumi. Nogat. Tasol, mi tok olsem, wanpela samting i no inap pundaunim yumi gen na putim yumi i go bek gen insait long sin na dai. Wanpela samting i no inap rausim yumi long han bilong Paps bilong yumi. Wanpela samting i no inap tru.

Lukim **Rom 8: 28-39** na mi ritim.

Na bai mi joinim wanem tok long dispela? Paps bilong yumi i toktok na yumi mas harim na bilipim na trastim Em tasol. Em i no giamanim yumi. Em i raitim dispela toktok bikos Em i laik yumi no ken i pret moa. Wanpela man i no inap kotim yumi. Wanpela samting i no inap bagarapim yumi na katim yumi long lavim bilong God – dispela lavim we Em i lavim yumi na makim yumi na Em i adoptim yumi na Em i mekim yumi kamap pikinini long femili bilong Em.

## **2. God Em i “Paps” bilong yumi, olsem na, yumi mas wok hat long kisim pasin bilong Em.**

Yumi no ken i bihainim moa ol pasin bilong ples bikos nau femili tru tru em i narapela samting na paps bilong yu Em i narapela “Paps.” Femili bilong yu em i no ol lain bilong ples. Paps bilong yupela em i no wanpela man bilong ples. Trupela femili bilong yu i no ol wanwan lain manmeri bilong ol wanwan ples. Nogat. Trupela femili bilong yu na trupela Paps bilong yu em i God tasol. Na yu tingim. Wok God i mekim long yu i winim wok wanpela man i mekim long yu o ol sampela paps long hauslain bilong yu i bin mekim.

Harim. God Em i no adoptim yu bilong yu ken i pas yet long olupela paps na olupela femili bilong yu. Nogat. Yu tingim. Sapos yu adoptim wanpela pikinini na yu mekim gutpela wok long em na yu baim skul fi bilong em na givim kopi long em na lukautim em gut, tasol em givim baksait long yu na em i hangre tumas long olupela paps na olupela femili bilong em, orait ating yu no inap amamas, a?

Na wankain olsem. God Em i bin adoptim yu na long dispela as yu mas tanim fes bilong yu i go long Em, Em i Paps bilong yu nau.

Lukim **Efesus 5:1**.

Plis harim. Yumi mas tingim ol dispela hat wok God i bin mekim bilong adoptim yumi na mekim yumi kamap pikinini long femili bilong Em. Yumi mas tingim dispela lavim bilong God. Lavim bilong God i antap

moa bikos Em i larim Jisas i karim sin bilong yumi – Em i larim Jisas i kisim dai bilong yumi bikos Em i laik adoptim yumi. Tingim ol dispela na yumi tanim fes bilong yumi i go long Em na yumi mekim pasin Paps i laikim – yumi mekim pasin Paps i laikim i kamap nambawan samting long laip bilong yumi.

**Las tok mi laik mekim bai i go long ol manmeri i no tanim bel yet.**

Yupela lukim na skelim ol dispela gutpela gutpela samting mipela i kam long em na mipela i kisim pinis.

Na mi askim yupela, long wanem as yupela no laik tanim bel na bilipim na trastim feifful wok bilong Jisas na bihainim Jisas na kam insait long ol dispela gutpela samting wantaim mipela?

Plis, yupela skelim na tingting, na yupela tanim bel nau.

Em tasol.

# Krais, long blut bilong Em, Em i baim pe bilong sin bilong yumi.

---

## Efesus 1:7.

---

Yu save pinis, nau olgeta samting i save *kostim* yumi mani. Yumi laik kisim liklik samting o yumi laik kisim bikpela samting, maski wanem samting yumi laik kisim, em save *kostim* yumi mani tasol. Yumi laik raun long taun, em bai *kostim* mani tasol. Yumi laik kisim marasin long bikpela haus sik long taun, em bai *kostim* mani tasol. Mi tok pinis, nau, olgeta samting i save *kostim* yumi mani tasol.

Na mi laik yumi skelim wanpela samting....

### **Taim God Em i adoptim yumi, dispela em i kostim God o nogat?**

Long Efesus 1:4-6 yumi bin stori long hau God, long bipo, taim dispela dispela graun i no kamap yet, Em bin i makim na pikim ol wanwan manmeri bilong kamautim ol long sin na dai. Em i bin makim ol na pasim ol long Krais bai Krais i mekim wok long diwai kros bilong mekim ol i stap holi na i no gat asua long ai bilong God. Na God Em i adoptim ol na Em i mekim ol i kamap pikinini long femili bilong Em yet.

Na bihain, God Em i givim bilip long ol dispela manmeri Em i bin makim, na long dispela as, nau ol i bilipim na trastim ol dispela wok Em i bin mekim long dai bilong Jisas na ol i bihainim Em. Long dispela as, nau sampela bilong yumi i bin tanim bel na i bilipim na trastim wok Jisas i bin mekim na nau ol i bihainim Em.

Olsem na, mi laik yumi – yumi God i bin makim na pasim long Krais na adoptim na givim bilip – yumi i bilipim na trastim feifol wok bilong Jisas na i bihainim Em – mi laik yumi tingting na skelim dispela samting..... Em i kostim God long adoptim yumi na mekim yumi pikinini long femili bilong Em o nogat? Em i gat pe bilong dispela samting o nogat? Em i kostim God sampela samting o nogat?

Taim yupela laik adoptim wanpela pikinini, yupela save kisim nating tasol. Long sampela hap, sapos yu laik adoptim pikinini, bai yu baim mani na yu kisim pikinini. Long sampela hap pasin bilong adoptim pikinini bai kostim mani.

Em olsem na taim God Em i adoptim yumi, Em i baim yumi o Em i kisim yumi fri tasol? Em i kostim God long adoptim yumi o nogat? Na sapos em kostim God long adoptim yumi na mekim yumi pikinini long femili bilong Em, orait em i kostim God hamas long adoptim yumi?

Mi mekim ol dispela kain tok bikos mi laik yumi mas klia olsem.....

**God Em no bin adoptim yumi nating, nogat, Em i bin baim bikpela pe stret na Em i adoptim yumi.**

Lukim **lain 5 na 7**. Taim God Em i adoptim yumi, Em i baim yumi long laip bilong Pikinini bilong Em, Jisas Krai. Em i kostim God laip bilong Jisas bilong baim yumi. Em i kostim God laip bilong Jisas bilong adoptim yumi na mekim yumi pikinini bilong Em.

God Em i no baim yumi long mani. Nogat. Em i baim yumi long blut (laip) bilong dispela Man Em i lavim tumas. Em i baim yumi long blut bilong Jisas Krai, Pikinini bilong God.

Na dispela em i no liklik samting long God. Yumi mas klia olsem, God i no diwai. Em i no ston. Nogat. Taim Jisas i dai long diwai kros, taim blut bilong Jisas i kapsait, ating aiwara bilong God i no isi (mi tok piksa na mi tok, "aiwara bilong God i no isi"). Ating God i pilim bikpela hevi na pen long bel bilong Em taim Em i lukim Pikinini bilong Em i bagarap long diwai kros.

Na yu tingim. Taim wanpela pikinini bilong yu em i dai, yu bin holim em na klinim fes bilong em na yu mekim ol kainkain samting olsem. Na taim pikinini i pulim las win bilong em na pam bilong em i stop na laip bilong em i go aut, long dispela taim yu krai nogut tru na yu pilim bikpela hevi stret long bel bilong yu na aiwara i pundaun moa moa yet. Olsem na, taim pikinini bilong yu em i dai, yu save, dispela em i no liklik samting.

Na wankain olsem long God. Taim Jisas Em i dai long diwai kros, dispela i no liklik samting long God. Nogat tru. Na dispela em i wanpela bikpela bikpela samting moa yet long God bikos dispela pikinini bilong God Em i wanpela gutpela gutpela Man stret na God i bin lavim Em tumas. Dispela Pikinini bilong God Em i pas olgeta wantaim God – em olsem na Baibel i tok olsem, God na Jisas, tupela i olsem wanpela – tupela i pas – pas olgeta. Olsem na, taim Jisas i dai, Jisas i kisim bikpela hevi long diwai kros, na Papa tu i kisim bikpela hevi na sori taim Em i lukim Jisas i dai – taim blut bilong Em i kapsait long diwai kros.

### **Na long wanem as Jisas Em i dai?**

Em i dai bilong baim pe bilong sin bilong yumi God i bin makim bilong adoptim. Em i dai bilong Papa bilong Em i ken i adoptim yumi. Taim God Em i adoptim yumi God i bin baim yumi long blut bilong Jisas Krai. Em i kostim God laip bilong Jisas bilong adoptim yumi. God i bin baim yumi long blut bilong Jisas. Em i no adoptim yumi nating. Nogat. Em i baim yumi long blut bilong Jisas Krai.

### **Na long wanem as God Em i baim yumi long blut bilong Jisas?**

Long wanem as God i no yusim mani o ol narapela samting bilong baim yumi na adoptim yumi? Harim gut. God i baim yumi long blut bilong Jisas bikos i no gat narapela wei bilong God i ken i kamautim yumi long sin na dai na kisim yumi na adoptim yumi na putim yumi insait long femili bilong Em.

Yu tingim. Yumi wanem kain manmeri? Yumi manmeri nogut. Yumi bin sakim tok bilong God na yumi bin givim baksait long God na yumi bin mekim ol kainkain pasin God i no save laikim. Sin em i pulap long yumi. Yumi no naispela manmeri. Tru, yumi no naispela. (Mi tok long mi tu.)



Tasol God Em i wanem kain Man? God Em i wanpela holi holi holi God olgeta. God Em i wanpela stretpela stretpela stretpela God olgeta. Na dispela holi na stretpela God i save hetim ol dispela sin yumi save mekim. Em i hetim olgeta pasin yumi save mekim. (Lukim **Rom 1:18.**)

Long dispela as tasol, God Em i makim bikpela pe nogut bilong manmeri i mekim bin mekim sin. Na dispela pe em i wanem samting? Pe bilong sin em i dai na lus long hel.

Lukim **Efesus 2:1-3.** Long dispela hap ves Pol em i stori long yumi God i bin makim na pasim long Kraus. Em i stori long yumi God i bin baim bek na adoptim na mekim pikinini bilong Em.

Yu save, yumi bin i stap insait tru long ol kainkain rong na sin. Yumi no bihainim God, nogat. Yumi bihainim hetman bilong ol spirit bilong pasin nogut tasol. Yumi amamas long bihainim sin bilong olupela bel bilong yumi na bihainim laik nogut na tingting nogut bilong olupela bel bilong yumi. Bipo yumi bin i stap wankain olsem olgeta manmeri na yumi bin i stap aninit long bel hat bilong God.

Yumi stap laip hia long dispela graun, tasol yumi no gat laip bikos yumi manmeri bilong i dai na lus long hel tasol. Mi tok pinis, yumi no naispela manmeri. Nogat. Yumi dispela kain manmeri tasol. Yumi manmeri nogut tru long ai bilong God na yumi stap insait tru long sin na dai, na God Em i bel hat long sin bilong yumi.

Na hau na bai dispela holi God i kisim na adoptim dispela kain manmeri? Hau na bai dispela holi God kisim na adoptim yumi?

Yumi save pinis, long bipo, taim dispela graun i no kamap yet, God i bin wokim disisen, na Em i makim ol wanwan manmeri bilong kamautim ol long sin na dai na bilong adoptim ol na mekim ol i kamap pikinini bilong Em yet na ol i kisim olgeta gutpela gutpela blesim bilong femili bilong Em.

Tasol hau na bai God i kamautim ol long sin na dai. Hau na bai dispela holi holi God i kisim na adoptim ol dispela manmeri i save mekim pasin God i hetim tumas? Hau na bai God i mekim ol dispela manmeri nogut pikinini bilong Em? Em i hat tru.

**Tasol God Em i kamapim wanpela wei. Na dispela wei i olsem: Jisas i kisim ples bilong yumi.**

Jisas Em i kisim ples bilong yumi. Em i kisim dai na hel bilong yumi. Taim blut bilong Jisas i kapsait long diwai kros, Em i bin kisim ples bilong yumi na kisim dai bilong yumi na hel bilong yumi. God i bin tilim pe bilong sin bilong yumi long bodi na laip bilong Jisas yet. God i bin kapsaitim olgeta bel hat bilong Em long sin bilong yumi long bodi na laip bilong Jisas yet. Em olsem na Jisas i pinisim pe bilong sin bilong yumi, bai yumi no ken i kisim.

Long dispela pasin tasol God i kamautim yumi long sin na dai. Em i kamautim yumi bai yumi no ken i kisim pe bilong sin na dai, bai yumi no ken i stap moa long hevi bilong sin na dai. Em i kisim yumi na kamautim yumi long sin na dai na Jisas i kisim ples bilong yumi insait long sin na dai. Insait long sin na dai Jisas Em i kisim bel hat bilong God long sin bilong yumi, na yumi nogat.

Long dispela pasin tasol God i bin adoptim yumi. Em i baim yumi na adoptim yumi long dai bilong Jisas.

**Long dispela wei God i bin pinisim bel hat bilong Em long olgeta sin bilong yumi.**

Na dispela em i wanpela bikpela bikpela samting olgeta. Long wanem. Taim bel hat bilong God long sin bilong yumi i pinis, orait God i ken i fogivim sin bilong yumi. Yu tingim. Sapos stil God Em i bel hat long yumi long sin bilong yumi, orait hau na bai Em i fogivim yumi? Em i no inap tru.

Em olsem na Jisas i kisim ples bilong yumi na God i bin kapsaitim bel hat bilong Em long sin bilong yumi i go long Jisas. God i tilim pe bilong sin long Jisas. God Em i bel hat long sin bilong yumi na Em i bin tilim pe bilong sin long Jisas bikos Jisas i bin kisim ples bilong yumi. Olsem na, God i kapsaitim bel hat bilong Em i go i go i go na taim Jisas i dai, em nau, bel hat bilong God i pinis olgeta. Taim bel hat bilong God long sin bilong yumi i pinis, orait Em i tanim fes bilong Em i kam long yumi na Em i fogivim yumi na Em i kisim yumi i kam insait long femili bilong Em.

Lukim **lain 7** gen. Harim.....

**God i no save fogivim yumi nating. Nogat. Em i fogivim sin bilong yumi bikos Jisas i bin kisim na pinisim olgeta bel hat bilong God long sin bilong yumi.**

God i ken i fogivim yumi bikos Jisas i bin kisim ples bilong yumi na Em i kisim pe bilong sin bilong yumi na Em i kisim olgeta bel hat bilong God long sin bilong yumi na Em i pinisim pinis ol dispela samting. Bel hat bilong God i pinis olgeta long yumi God i bin makim na pasim long Krais.

Yu tingim. Taim yumi fogivim wanpela man i bin mekim rong long yumi, yumi pasin ai long rong bilong Em, em tasol. Em olsem yumi tok “maski” tasol na yumi larim em tasol. Yumi no pinisim bel hat bilong yumi, nogat. Yumi *daunim* bel hat tasol na yumi no ken i save wanem taim dispela bel hat i ken i kirap gen long dispela man i mekim rong long yumi. Fogivim bilong manmeri bilong dispela graun em i giaman fogivim bikos bel hat bilong ol i stap yet.

Tasol, fogivim bilong God i no olsem. Nogat tru. Fogivim bilong God em i trupela fogivim bikos God i bin *pinisim* bel hat bilong Em. Em i no *daunim* bel hat bilong Em tasol. Nogat. Sapos Em i *daunim* tasol, orait dispela bel hat i stap yet na yumi no ken i save wanem taim dispela bel hat i ken i kirap gen long yumi. Sapos God i *daunim* bel hat bilong Em tasol, na bihain yumi mekim sampela sin moa, orait bel hat bilong God bai kirap gen o nogat, yumi no ken i save!

Na yu save long dispela kain pasin. Taim yumi fogivim wanpela man, em olsem yumi *daunim* bel hat tasol. Na taim em i mekim narapela rong long yumi, orait bel bilong yumi i save paia hariap bikos bel hat bilong dispela bipo rong i kirap gen na em i join wantaim bel hat bilong dispela narapela rong na yumi bel hat moa moa yet long dispela man. Olsem na, sapos God i save *daunim* bel hat bilong Em tasol, orait yumi no ken i save long wanem taim dispela bel hat bai kirap gen na yumi pilim.

Tasol, God i no bin *daunim* bel hat bilong Em. Nogat. Em i bin *pinisim* bel hat bilong Em long olgeta sin bilong yumi. Lukim **Rom 3:25**. Blut bilong Jisas, dai bilong Jisas, i bin *tekewe* bel hat bilong God – blut bilong Jisas, dai bilong Jisas, i bin *pinisim* bel hat bilong God long sin bilong yumi.

Blut bilong Jisas i bin pinisim bel hat bilong God long sin bilong yumi na long dispela as yumi no inap lukim bel hat bilong God long bihain. Bel hat bilong God i no inap kirap gen long sin bilong yumi bikos Jisas, long dai bilong Em, Em i bin tekewe olgeta bel hat bilong God long sin bilong yumi.

Yu save, long dispela wei, dispela holi holi holi God i kamautim yumi long sin na dai na Em i adoptim yumi na mekim yumi pikinini bilong Em. Jisas i bin baim pe bilong sin – Em i bin kisim na pinisim bel hat bilong God long sin bilong yumi. Em olsem na, nau dispela holi God i save fogivim yumi long sin bilong yumi. Nau Em i bel isi wantaim yumi na Em i adoptim yumi na lukautim yumi insait long femili bilong Em.

God Em i no adoptim yumi nating. Nogat. Na Em i no fogivim yumi nating. Nogat. Em i bin baim bikpela pe bilong fogivim yumi na adoptim yumi. Em i bin baim yumi long dai bilong Pikinini bilong Em, Jisas Krai.

### **Las toktok.**

Nau moning mi laik strongim *yupela* God i bin givim bilip na yupela bilipim na trastim feifful wok bilong Jisas. Plis harim. Olgeta taim - olgeta yia na olgeta mun na olgeta de na olgeta aua na olgeta minet na olgeta sekod God i save fogivim sin bilong yu. Long wanem? Jisas i bin kisim ples bilong yumi pinis na God i bin kapsaitim pinis olgeta bel hat bilong Em long sin bilong yumi – Em i kapsaitim olgeta bel hat bilong Em long Jisas taim Jisas i hangamap long diwai kros. Olsem na, bel hat bilong God Em i pinis na Em i save fogivim yumi nau long sin bilong yumi.

Lukim **Efesus 2:13**. Yes, tru tumas, yumi sin manmeri yumi bin i stap longwe long God. Tasol, blut bilong Jisas i bin bringim yumi i kam long God. Blut bilong Jisas i kamapim pasin we God i save fogivim yumi. Blut bilong Jisas i bin kamapim pasin we God Em i adoptim yumi i kam insait long femili bilong Em.

Ol sampela man i save toktok planti long hau yupela mas mekim wok na kamap naispela manmeri na hau Jisas bai kam na kisim bek ol manmeri i mekim ol gutpela pasin na hau yupela yet i mas mekim yupela yet i kamap klin long ai bilong God na hau yupela mas mekim wok na God i ken i fogivim yupela - ol i save mekim kainkain tok olsem.

Tasol, yumi no ken i larim ol dispela kain toktok i bagarapim tingting bilong yumi. Nogat. Yumi no ken i larim ol paul toktok bilong ol i bagarapim yumi moa. Lusim dispela paul tok bilong ol na holim strong ol dispela gutpela na trupela toktok nau God i bin givim yumi.

Gutnius bilong God i no olsem ol sampela man i save tokaut. Nogat. Gutnius bilong God i olsem: God i bin makim yumi bilong kamautim yumi long sin na dai na Em i bin pasim yumi long Krai bai Krai i mekim wok long diwai kros bilong mekim yumi holi na i no gat asua long ai bilong God. Blut bilong Jisas i kapsait na Jisas i dai bilong tekewe bel hat bilong God long sin bilong yumi, na long dispela wei tasol God i save fogivim sin bilong yumi na Em i adoptim yumi na mekim yumi pikinini bilong Em. Yumi mas bilipim na trastim *dispela* gutnius. Na yumi mas lavim na bihainim *dispela* kain God i bin mekim ol dispela gutpela gutpela wok bilong yumi sin manmeri.

Em tasol.

## God i kapsaitim grasia bilong Em moa moa long yumi.

---

### Efesus 1:7-8.

---

Mi laik yumi mas klia gut olsem, dispela toktok long buk Efesus em i no bilong olgeta manmeri. Nogat. Em bilong yumi manmeri i bihainim tru Krai Jisas (lukim **lain 1**). Em bilong yumi i bin tanim bel na i bilipim na trastim wok God i bin mekim long dai bilong Jisas Krai. Na yupela i no tanim bel na i no bilipim na trastim Jisas, orait bilong yupela i gat narapela stori. Tasol, bilong mipela, mi tok pinis, tok i stap insait long buk Efesus em bilong mipela i bihainim tru Krai Jisas. Em olsem na, olgeta taim yumi skelim dispela buk Efesus yumi mas holim tingting long dispela.

Long **lain 7-8** i gat dispela toktok, *“God i kapsaitim grasia bilong Em moa moa long yumi.”* Dispela tok “grasia” em i wanpela bikpela bikpela tok insait long Tok bilong God. Planti saveman bilong Tok bilong God ol i tok olsem, “Grasia em i namba wan tok i stap insait long Tok bilong God.” Ol i tok, “Grasia em i paslain long olgeta narapela tok i stap insait long Tok bilong God.” Na ol i bin tok olsem, “Ol Kristen ol i mas save long dispela grasia, na grasia i mas nambawan samting long laip bilong ol.”

Tasol, long Buk Baibel bilong P.N.G. yumi no inap lukim dispela tok “grasia” insait long em. Long wanem? Ol i bin lusim tok “grasia” na ol i putim tok “marimari” tasol. Long Tok bilong God i gat dispela tupela i toktok i stap insait long em. I gat marimari i stap na i gat grasia i stap. Tasol taim ol man i bin kamapim Buk Baibel ol i bin lusim tok “grasia” na ol i putim “marimari” tasol. Olsem na, taim God i tok “marimari” ol i bin putim marimari. Tasol, olgeta taim God i tok “grasia” ol i putim marimari tasol.

Tasol grasia em i nambawan toktok i stap insait long Tok bilong God na i no gutpela long yumi lusim. Long dispela as planti manmeri insait long P.N.G. ol i no save long grasia bilong God. Olsem na, taim mi tanim tok bilong buk Efesus mi bin kisim grasia i kam bek gen insait long Tok bilong God. Long wanem hap God i tok “marimari” mi putim marimari. Na long wanem hap God i tok “grasia” mi putim grasia.

### Na grasia em i wanem samting?

Bai mi mekim sampela tok bokis bilong helpim yumi klia long dispela samting.

Sapos mi bungim wanpela man na mi givim em K50, na dispela K50 em i bekim bilong wanpela dinau mi bin kisim long em. Taim mi bekim dispela K50, orait mi mekim wanem kain pasin? Mi mekim grasia long em o mi mekim marimari long em o mi mekim narapela samting long em? Yu gat wanem tingting?

Yu save, mi bekim dinau tasol. Mi mekim stretpela pasin long em na mi bekim dinau. Dispela pasin em i stretpela pasin, dispela pasin em i gutpela pasin, tasol dispela pasin em i no grasia pasin na em i no marimari pasin.

Orait. Mi bungim narapela man. Dispela man i no gat gutpela klos na em i hangre nogut tru. Na mi no save long dispela man em i husat, tasol, mi pilim sori long em na mi givim em K50 bilong baim kaikai na ol sampela klos. Taim mi givim dispela mani long em, orait mi mekim wanem kain pasin?

Yu save, mi mekim marimari pasin long em. Mi pilim sori long dispela man i stap nogut na mi helpim em na mi givim K50 nating long em. Em olsem mi marimari long em.

Orait. Mi bungim narapela man. Em tu em i no gat gutpela klos na em i hangre nogut tru. Tasol, mi save long dispela man. Em i bin mekim pasin nogut long mi. Long bipo liklik em i bin hansapim mi long rot na em i stilim hanwas bilong mi na sampela mani bilong mi. Em i bin bagarapim meri bilong mi na ol pikinini bilong mi. Na tu, em save raun long ples na em save mekim tok nogut long mi. Em save daunim nem bilong mi na bagarapim mi.

Orait, mi bungim em na em i hangre nogut tru na klos bilong em i no gutpela, tasol mi helpim em na mi givim K50 nating long em. Orait mi mekim wanem kain pasin long em?

Mi mekim grasia pasin long em. Em i bin mekim birua pasin long mi tasol mi bin helpim em. Em i bin mekim pasin nogut long mi, tasol mi mekim gutpela pasin long em na mi helpim em. Dispela kain pasin em i grasia pasin.

Long fes man, mi mekim *stretpela pasin* long em – mi bekim mani mi bin kisim long dinau.

Long sekon man, mi mekim *marimari* pasin long em. Em i stap nogut na mi sori long em tasol na mi helpim em na mi givim sampela mani nating long em.

Na long namba 3 man, mi mekim *grasia* pasin long em. Em i no man nating olsem sekon man. Nogat. Em i bin mekim pasin nogut long mi na em i mekim birua pasin long mi na em i save tok baksait na daunim mi na egensim mi. Tasol, em i bagarap na mi helpim em. Mi mekim *grasia* long em.

Em i *dispela* pasin God i bin mekim long yumi. **Efesus 1:7-8** i tok olsem, “*God i kapsaitim grasia bilong Em moa moa long yumi.*” God Em i mekim *grasia* long yumi. Em i kapsaitim *grasia* bilong Em long yumi. Em i mekim *grasia* pasin long yumi olsem dispela *grasia* pasin mi bin mekim long dispela namba 3 man.

Yumi mas klia olsem, yumi *olsem* dispela namba 3 man mi bin tok bokis long em. Yumi bin mekim birua pasin long God. Yumi bin givim baksait long Em na yumi mekim pasin nogut long em. Yumi bin tok bilas long Em na yumi bin bagarapim nem bilong Em.

Yu tingim. Yumi bin sakim tok bilong God. Yumi bin mekim pasin God i save hetim. Yumi amamas long yusim olgeta samting bilong God, tasol yumi no tok tenkyu long Em. Long strong bilong God yet yu stap laip, tasol yu bin pulim nus long God na yu tingim olsem, “Long strong bilong mi yet mi stap.” Yu bin rausim God long tingting bilong yu na long laip bilong yu. Yu bin rausim God na yu putim kastem pasin na tumbuna pasin i stap na yu bihainim ol dispela samting tasol. Pasin nogut i pulap long tingting bilong yumi na long laip bilong yumi. Yumi save long tok God i bin mekim, tasol yumi bin sakim na yumi bihainim laik bilong yumi yet.

Na taim yumi mekim ol kain pasin olsem, orait em olsem yumi tok, “God Em i samting nating.” Yumi putim yumi yet i go antap na yumi daunim God na God i stap olsem samting nating tasol long laip bilong yumi. Yumi manmeri i save *egensim* God.

Na yumi mas klia olsem, em i rait long God i ken i bel hat long yumi long ol dispela kain pasin yumi bin mekim. Em i rait long God i makim pe bilong sin em i dai na lus long hel. Yumi mas klia olsem, pe bilong ol dispela kain pasin yumi bin mekim em i no heven. Nogat tru. Pe bilong ol dispela pasin bilong yumi em i dai na lus long hel. Yumi no manmeri bilong heven. Nogat. Yumi manmeri bilong hel.

Yumi bin mekim nogut long God, yumi bin bagarapim nem bilong God, yumi bin daunim God, yumi bin kapsaitim God, yumi bin mekim birua pasin long God, yumi egensim God .....tasol God i helpim yumi. Dispela pasin em i grasia pasin.

God Em i klia long olgeta pasin nogut bilong yumi. God Em i klia hau yumi save kapsaitim Em na daunim nem bilong Em. Tasol, Em i bin makim yumi na pikim yumi bilong kamautim yumi long sin na dai. Dispela em i grasia bilong God. Em i bin pasim yumi long Krai bai yumi stap holi na i no gat asua long ai bilong Em. Dispela em i grasia bilong God. Em i bin adoptim yumi na mekim yumi pikinini bilong Em long femili bilong Em. Dispela em i grasia bilong God.

Long Efesus 1:7 yumi bin skelim hau God i bin givim dispela Pikinini Em i lavim tumas bilong baim pe bilong sin bilong yumi bilong God i ken i fogivim yumi. Blut bilong Jisas i bin kapsait bilong baim pe bilong ol dispela pasin nogut yumi bin mekim, na long dispela wei God i save fogivim olgeta sin bilong yumi. Dispela em i grasia bilong God.

Ol dispela pasin em i grasia bilong God! Dispela pasin i no God i bekim dinau. Nogat. Yu no ken i tingim olsem yumi mekim ol naispela na gutpela pasin na God i lukim na tingim olsem, “Mi mas bekim dispela gutpela pasin bilong ol na kisim bek ol.” Nogat. Dispela pasin God i mekim long yumi em i no God i bekim dinau.

Na tu, dispela pasin God i mekim long yumi em i no marimari pasin. Nogat. Yu no ken i tingim olsem yu gutpela man i stap, tasol yu kisim bagarap nating na God i sori long yu na helpim yu. Nogat. God i ken i sori long yumi, tasol dispela bagarap yumi kisim em i no kamap nating long yumi. Nogat. Yumi mekim sin pasin na yumi sakim tok bilong God na dispela pasin yumi yet i mekim i save bagarapim yumi.

Pasin God i mekim long yumi em i grasia pasin. Yumi egensim God na yumi mekim nogut long God, tasol God Em i mekim gutpela pasin long yumi na helpim yumi. Grasia pasin em i pasin we God i helpim yumi i bin mekim bikpela pasin nogut long Em.

Na yu tingim. Yumi manmeri long ples, yumi ken i sori long narapela manmeri na mekim marimari long em. Tasol, yumi no save mekim grasia pasin. Sapos haus bilong wanpela man i paia, orait yumi ken i sori long em na marimari long em na helpim em long kap spun plet samting. Tasol, sapos wanpela man i stap na em i bin mekim pasin nogut long yu na i bin tok baksait long yu na kapsaitim yu na daunim nem bilong yu, na sapos haus bilong dispela man i paia, orait yu no inap helpim em liklik – yu no inap mekim grasia long em. Nogat. Bai yu larim em i stap insait long hevi bilong em.

Tasol God i no mekim olsem long yumi. Nogat. Yumi bin mekim bikpela pasin nogut long Em, tasol stil Em i makim yumi na pasim yumi long Kraus na Em i adoptim yumi na fogivim sin bilong yumi na mekim yumi pikinini bilong Em long femili bilong Em na Em i givim olgeta blesim bilong heven long yumi. Dispela i soim i yumi grasia bilong God.

Tasol i no dispela samting tasol. Nogat. God i bin salim Jisas na Jisas i bin dai long diwai kros na blut bilong Em i kapsait bilong tekewe sin bilong yumi na tekewe pe bilong sin bilong yumi na tekewe kot bilong sin bilong yumi. Dispela Man God i lavim tumas Em i dai bilong tekewe pe bilong ol dispela pasin nogut yumi save mekim. Long dispela as aposel Pol i tok long **lain 7-8**.... *“Na dispela i soim yumi olsem God i kapsaitim grasia bilong Em moa moa long yumi.”* Harim. Grasia bilong God i no liklik samting. Nogat tru. Em i bikpela samting moa moa moa yet.

Long dispela as tasol, ol saveman long Tok bilong God i bin tok olsem, *“Grasia em i namba wan tok i stap insait long Tok bilong God.”* Long dispela as tasol, ol i tok, *“Grasia em i paslain long olgeta narapela tok i stap insait long Tok bilong God.”* Long dispela as tasol ol i bin tok olsem, *“Ol Kristen ol i mas save long dispela tok grasia, na grasia i mas nambawan samting long laip bilong ol.”*

Grasia bilong God i nambawan samting, na yumi, yumi mas klia long grasia bilong God na tok tenkyu long grasia bilong God na litimapim nem bilong Em na lavim Em.

Mi laik skruim dispela tok liklik na mi laik soim yupela narapela samting long grasia bilong God. Em olsem na mi laik tokim yupela na soim yupela olsem....

### **Grasia bilong God i save tasim olgeta samting.**

God i bin makim yumi na pasim yumi long Jisas bai Jisas i kisim ples bilong yumi, na Em i kisim pe bilong sin bilong yumi bai God i ken i fogivim yumi long sin bilong yumi. God i bin adoptim yumi na putim yumi insait long femili bilong Em. Ol dispela i soim olsem God i kapsaitim grasia bilong moa moa yet long yumi. Grasia bilong God i bin tasim ol dispela samting. Yumi save lukim hanmak bilong grasia bilong God long ol dispela samting.

Tasol, *wantaim* ol dispela samting, God i givim trupela save na tingting bilong Em yet long yumi. (Lukim **lain 7-8** gen.) God Em i givim trupela save na tingting bilong Em long yumi – Em i givim bilip long yumi. Em i bin mekim wok insait long laip bilong yumi na Em yet i kamapim tanim bel na bilip na trastim long yumi.

Na long wanem as Em i mekim dispela long yumi? Em i mekim dispela long yumi bikos yumi yet yumi no fit long kamapim bilip long yumi yet. Yumi no gat strong long tanim bel. Yumi no gat het bilong bilipim tok bilong God. Yumi no tingting long trastim wok bilong Em. Sin i bin bagarapim het bilong yumi na tingting bilong yumi na bel bilong yumi na yumi no fit long tanim bel na bilipim na trastim na bihainim Jisas.

Lukim **Efesus 2:1**. *“Bipo, yupela i stap insait tru long ol kainkain rong na sin, na spirit bilong yupela i no gat laip.”*

Yumi no inap tanim bel na bilipim na trastim wok God i bin mekim long Jisas bikos yumi no gat laip insait long tingting na bel bilong yumi. Bodi bilong yumi i save wok, tasol yumi no gat laip i stap. I olsem tingting

na bel bilong yumi i dai pinis long olgeta samting long sait bilong God. Long sait bilong sin yumi save gohet, tasol long sait bilong ol samting bilong God yumi olsem man i dai pinis – yumi no gat laip.

Na mi askim yupela, man i no gat laip bai i mekim wanem? Yu lukim wanpela man i dai pinis na mi askim yupela, Dispela detbodi i ken i mekim wanem? Em i ken i toktok o nogat? Nogat. Em i ken i kirap na wokabaut o nogat? Nogat. Em i ken i kisim kaukau na kaikai o nogat? Nogat. Em i ken i skelim sampela toktok yu mekim long em o nogat? Nogat. Long bel bilong em, em i ken i bilipim na trastim sampela toktok yu mekim long em o nogat? Nogat. Yu save, man i dai pinis i no inap mekim wanpela samting.

Na wankain olsem, taim yumi stap insait long ol kankain rong na sin yumi no gat laip. Bodi bilong yumi i save wok. Tasol, tingting na bel bilong yumi - spirit bilong yumi - i no gat laip. Yumi dai pinis long olgeta samting long sait bilong God.

Em olsem na, sapos yumi dai pinis insait, orait hau na bai yumi harim tok bilong God na bihainim? Hau na bai yumi tanim bel? Hau na bai yumi skelim ol samting long dai bilong Jisas na bilipim na trastim? Bai yumi no inap tru bikos yumi no gat laip insait long yumi. Bodi i save wok, tasol yumi no gat laip insait long yumi. Yumi no gat strong. Yumi no gat pawa bilong harim tok bilong God na bilipim na bihainim.

Tasol, God Em i opim ai na ia na bel bilong yumi – Em i kamapim laip long yumi – Em i givim trupela save na tingting bilong Em long yumi – Em i givim bilip long yumi bai yumi bilipim na trastim na lavim na bihainim Em.

Na yumi mas save olsem, dispela tu em i grasia bilong God. Yumi bin pasim tingting bilong yumi i go long olgeta pasin God i save hetim, tasol God i givim nupela laip long yumi na Em i givim trupela save na tingting bilong Em long yumi, Em i givim bilip na trastim long yumi bai yumi bilipim na trastim na lavim na bihainim Em.

Dispela tu em i grasia bilong God. Grasia bilong God i save tasim olgeta samting. Pasin we God i kisim bek yu em i wok bilong God “long stat tu pinis”. Pasin we God i kisim bek yu em i grasia bilong God “long stat tu pinis”.

Em olsem na, sapos yu bin tanim bel na yu bilipim na trastim feifful wok bilong Jisas long diwai kros na yu lavim Em na bihainim Em, orait yu mas klia olsem, God i bin mekim grasia long yu na Em i givim dispela bilip long yu na long dispela as nau yu bilipim na trastim na lavim Em.

Na sapos God i bin mekim dispela samting long yu, orait yu ken i save olsem God i bin mekim ol narapela samting long yu tu. Yu ken i save God i bin makim yu long bipo tru na Em i bin pasim yu long Krai na Em i bin mekim yu holi na i no gat asua long ai bilong God na Em i bin adoptim yu na fogivim yu na mekim yu pikinini long femili bilong Em na Em i givim olgeta blesim bilong heaven long yu. God i no inap wokim wanpela na lusim narapela. Nogat. Sapos Em i wokim wanpela, orait dispela i minim olsem Em i wokim olgeta. Olsem na, sapos Em i givim bilip long yu, orait yu ken i klia olsem God i bin wokim ol narapela samting long yu tu.

Olsem na, yumi i bihainim tru Krai Jisas, yumi ken i amamas moa moa yet. Long wanem? God i bin kapsaitim grasia bilong Em moa moa yet long yumi na Em i givim bilip long yumi *wantaim* olgeta narapela



samting tu. Pasin bilong God bilong kisim bek yumi Em i wok bilong God “long stat tu pinis”, em i grasia bilong God “long stat tu pinis”.

Em olsem na, i no gat as long yumi apim yumi yet long ai bilong God na long ai bilong ol sampela manmeri. Na i no gat as long yumi apim nem bilong wanpela misin. Na i no gat as long yumi apim misin pasin na lotu pasin. Nogat. Bai yumi apim God na Jisas tasol. Bai yumi apim nem bilong God na Krai tasol. Bai yumi apim grasia bilong God na Jisas tasol.

Em tasol.

## God i soim yumi as bilong plen bilong Em.

---

### Efesus 1:9-10.

---

Sapos yumi skelim gut bai yumi klia olsem, dispela graun em i no gutpela tumas. Yu tingim. Long planti hap i gat korapsen i stap, na long ol wanwan ples skul na haus sik i pundaun, na rot i bagarap, na long ol wanwan taun na rot ol raskol i save givim hevi long yumi. Pe bilong olgeta samting i go antap, tasol pe bilong kopi i go daun, na i hat long yumi kamapim liklik sop mani bilong lukautim femili bilong yumi.

Yu tingim sindaun bilong yumi. Long ples i gat planti pasin nogut i kamap long sait bilong marit. Planti bois bilong yumi ol i no sindaun gut na ol i save mekim pasin nogut raun nabaut long ples. I gat kros na pait na stil pasin na tok nogut na spak pasin na ol kainkain pasin nogut i save spoilim sindaun bilong yumi olgeta manmeri.

Mi tok pinis, dispela graun i no gutpela tumas.

Tasol, nau moning mi laik strongim yupela, yupela i bin tanim bel na i bilipim na trastim feifful wok bilong Jisas na i bihainim Em, mi laik strongim yupela olsem, yupela no ken i tingting planti long ol dispela samting. Nogat. Long wanem?

**God i gat plen bilong Em i stap na dispela plen bilong Em i no lus na i no pundaun. Nogat. Plen bilong God i wok i go yet.**

Ating sampela taim yumi ken i lukluk long ol pasin nogut i save kamap long P.N.G. na long ples na yumi ken i tingim olsem, olgeta samting i bagarap pinis. Tasol nogat. God i gat plen bilong Em i stap na dispela plen bilong Em i no lus na i no pundaun, nogat, plen bilong God i wok i go yet.

Na long sait bilong tok bilong God, yumi save lukim planti lotu i stap na planti i lusim trupela tok bilong God longtaim pinis na ol i bihainim tingting na tisim bilong ol yet na ol i tingting tasol long bihainim misin pasin tasol na ol i no laik save long God trutru na bihainim Em trutru. Na taim yumi lukim dispela samting yumi ken i tingim olsem, Tok bilong God i pundaun pinis na i bagarap olgeta.

Tasol nogat. God i gat plen bilong Em i stap na dispela plen bilong Em i no lus na i no pundaun, nogat, plen bilong God i wok i go yet.

Lukim **Efesus 1:9-10**. God i gat plen bilong Em i stap. Pastaim dispela plen bilong Em i hait na yumi no klia long plen bilong God. Pastaim yumi no klia long plen bilong God bikos long bipo God i no bin putim plen bilong Em long ples klia. Tasol nau yumi ken i klia long plen bilong God bikos nau God i bin soim yumi plen bilong Em. Pastaim yumi no klia long olgeta samting God i laik wokim, pastaim yumi no klia long olgeta

samting long plen bilong God, tasol nau, God i bin putim olgeta samting bilong plen bilong Em long ples klia na nau yumi ken i save.

Na dispela plen i no lus na i no pundaun. Nogat. Long rait taim stret, taim God i bin makim pinis, long rait taim stret olgeta samting God i bin plenim bai kamap tasol. Sampela taim yumi tingim olsem olgeta samting i bagarap pinis na i pundaun pinis. Tasol nogat. Olgeta samting long plen bilong God i save kamap long taim God i bin makim. God i save bosim na kontrolim olgeta samting bilong mekim olgeta samting bilong plen bilong Em i kamap long taim God i makim.

Lukim **lain 11-12** liklik. God i save bosim na kontrolim *olgeta samting*. Em i no bosim na kontrolim wanwan samting tasol, nogat. Em save bosim na kontrolim *olgeta samting*, na Em save bosim na kontrolim olgeta samting *inap long laik na plen bilong Em*. God i bihainim plen bilong Em tasol na Em i bosim na kontrolim olgeta samting.

Planti manmeri i tok olsem, “Seten em i bosman bilong dispela graun – Seten i save bosim olgeta samting bilong dispela graun.” Tasol dispela i no tru. God yet i bosim na kontrolim olgeta samting. Em i gat plen bilong Em i stap na Em i bosim na kontrolim olgeta samting bilong kamapim olgeta samting Em i bin plenim.

Yumi no ken i lukluk tasol long ol samting bilong dispela graun na larim ol samting yumi *lukim* long ai bilong yumi i stiaim tingting bilong yumi. Nogat. God i gat plen bilong Em i stap na dispela plen bilong God i wok i go yet. Olsem na, yumi mas larim *tok bilong God* i stiaim tingting bilong yumi.

Taim yumi lukim ol samting bilong dispela graun, yumi lukim ol samting long antap skin tasol. Tasol long baksait bilong ol samting yumi lukim plen bilong God i stap, na God i save bosim na kontrolim olgeta samting bilong kamapim olgeta samting bilong plen bilong Em. Yumi no ken i lusim tingting long dispela. Maski wanem samting i kamap yumi mas klia olsem plen bilong God i stap na dispela plen i wok i go yet. Em i no lus na em i no pundaun. Nogat. Em i stap yet na i wok i go yet.

Olgeta samting long plen bilong God bai kamap long taim God yet i bin makim. Olsem na, yumi ken i trastim God na trastim plen bilong God. Yu save, olgeta samting i no bagarap na pundaun, nogat tru. God i bihainim plen bilong Em na Em i wok yet long kamapim olgeta samting bilong plen bilong Em, na olgeta samting long plen bilong Em bai kamap long rait taim God i bin makim. Olsem na, yumi ken i trastim God long olgeta samting, maski wanem samting i kamap long yumi. Yumi ken i trastim plen bilong God. Yumi ken i trastim God bikos Em yet i save bosim na kontrolim olgeta samting bilong kamapim olgeta samting bilong bikipela na gutpela plen bilong Em.

Orait, yumi bin toktok planti olsem, God i gat plen bilong Em i stap. Tasol dispela plen em i wanem samting? God i plenim wanem samting? As bilong plen bilong God em i wanem samting? Orait, as bilong plen bilong God i olsem.....

Lukim **lain 9-10**.

**Olgeta samting bilong heven na bilong dispela graun bai kamap *wanpela* na i stap aninit long wanpela hetman na dispela hetman Em i Jisas Krai.**

God i gat plen, na *as* bilong plen bilong God i olsem, olgeta samting long heven na long dispela graun bai kamap *wanpela* samting na i stap aninit long *wanpela* hetman na dispela hetman Em i Jisas Krai. God Em i laik bungim olgeta samting bilong heven wantaim olgeta samting bilong dispela graun na kamapim wanpela nupela samting. Em i laik kamapim wanpela nupela *komyuniti* we olgeta manmeri bilong dispela nupela komyuniti wantaim olgeta samting bai i stap aninit long wanpela hetman, Jisas Krai. Dispela em i bikpela plen bilong God.

Bihain, dispela graun nau yumi stap long em bai pinis wantaim ol kainkain komyuniti bilong dispela graun. Olgeta bai pinis na wanpela nupela samting bai kamap. Na long dispela nupela samting wanpela nupela komyuniti bai i stap, na *olgeta* manmeri long dispela nupela komyuniti wantaim *olgeta* samting bai i stap aninit tru long Jisas Krai.

Long dispela as tasol, God i bin makim yumi na pasim yumi long Krai na Krai i mekim wok bilong baim pe bilong sin bilong yumi na God Em i fogivim yumi na Em i adoptim yumi na mekim yumi kamap pikinini long femili bilong Em. Yu save, God Em i wokim ol dispela samting bilong kamapim dispela wanpela nupela komyuniti, na bihain God bai bungim dispela nupela komyuniti wantaim olgeta samting long heven, na olgeta bai i stap wanpela tasol, na olgeta bai i stap aninit long Jisas tasol. Olgeta narapela samting bai pinis, na dispela nupela samting wantaim dispela nupela komyuniti bai i stap tasol.

Na yu save, nau olgeta samting i no stap *wanpela*, nau *olgeta* manmeri i no aninit long Krai.

Yu tingim. Wanpela hauslain i save kros pait wantaim narapela hauslain. Wanpela brata i tok nogut long narapela brata. Wanpela femili i mekim nogut long narapela femili. Pikinini i no save rispektim papamama bilong ol na i stap gut wantaim. Long sait bilong marit, man na meri i no save sindaun gut olgeta. Kros i save kamap na paul pasin i save kamap na marit i save bruk. Planti manmeri i save kisim hevi long marit. Na ol yangpela bois i save paul wantaim ol yangpela meri na ol i save spoilim ol yangpela meri.

Olgeta samting long dispela graun i *bruk* pinis. Na yu lukim, planti manmeri i save givim baksait long Krai tasol. Long dispela graun olgeta samting i *bruk* na ol planti manmeri i *givim baksait long Krai*. Dispela samting yumi stap long em, dispela graun, em i nogut pinis.

Tasol God i gat plen bilong Em i stap. Na dispela plen bilong God i olsem, Em bai pinisim ol dispela *olpela* samting na Em bai kamapim ol *nupela* samting. Em bai kisim ol wanwan manmeri long ol wanwan hap na long ol wanwan kala skin na long ol wanwan tok ples na Em bai pasim ol long *wanpela* komyuniti na ol bai i stap aninit tru long Krai. Bai God i pasim olgeta samting bilong heven na olgeta kainkain manmeri bilong dispela graun na Em bai kamapim wanpela nupela samting. Em bai kamapim wanpela nupela komyuniti we olgeta manmeri na olgeta samting i stap aninit tru long wanpela hetman, Jisas Krai. Long dispela nupela samting i no gat gavman i stap. Nogat. Krai Em i olsem “gavman” na olgeta samting bai i stap aninit long Krai tasol.

Dispela em i plen bilong God. God i save bosim na kontrolim olgeta samting bikos bihain long rait taim God i bin makim, Em bai kisim na pasim olgeta samting bilong heven wantaim ol samting bilong dispela graun na kamapim wanpela nupela samting na wanpela nupela komyuniti we olgeta manmeri na olgeta samting bai i stap aninit long Jisas.

**Dispela em i bikpela na gutpela plen bilong God. Na yumi ken i lukim God i wok long bihainim dispela plen bilong Em nau.**

Yes, yumi ken i witisim dispela wok bilong God *nau*. God Em i no sindaun nating na wetim dispela taim Em i bin makim bilong kamapim ol dispela samting, nogat. *Nau* God i save wok long kisim na pasim ol kainkain manmeri long wanpela nupela samting, long wanpela nupela komyuniti we ol i stap aninit tru long Krai. Yumi ken i lukim dispela plen bilong God *nau*. Yumi ken i lukim dispela wok bilong God *nau*.

Mi bin lukim. Mi lukim God i kisim wanpela mejistret bilong ples na Em i kisim wanpela stilman ol i bin kalabusim em long dispela stil pasin bilong em – God i bin kisim dispela tupela man na Em i pasim tupela long wanpela nupela komyuniti. Mi lukim God i kisim wanpela yangpela man na Em i kisim wanpela lapun meri na God Em i pasim tupela long wanpela nupela komyuniti. Mi lukim God i kisim wanpela meri long wanpela hauslain na mi lukim God i kisim wanpela meri bilong narapela hauslain na God Em i pasim tupela long wanpela nupela komyuniti. Mi lukim God i kisim wanpela meri i bin raun long planti misin na God Em i kamautim em long ol misin pasin na Em i pasim dispela meri long wanpela nupela komyuniti.

Yu save long dispela tok bilong mi o nogat? Yes, mi tok long wok God i bin mekim long hia long ples. God i bin kisim ol wanwan kain man na meri na boi na gel na Em i pasim ol long wanpela nupela komyuniti we ol i stap aninit long Jisas Krai.

Na bihain, God bai pasim sampela manmeri moa – ol sampela manmeri bilong ol narapela hauslain bilong PNG. Yu save, dispela em i plen bilong God – God i save wok long kisim ol wanwan manmeri na pasim ol long wanpela nupela komyuniti, na bihain God bai pasim ol dispela nupela komyuniti wantaim olgeta samting bilong heven, na olgeta bai i stap wanpela tasol na olgeta bai i stap aninit long Krai.

Na yu save long nem bilong dispela nupela komyuniti God i wok long kamapim o nogat? Nem bilong em, em i **sios**. Dispela nupela komyuniti em i sios bilong God. Dispela nupela komyuniti God bai bungim long bihain long rait taim Em i bin makim, em i **sios** bilong God.

Tasol tu, taim God i kisim wanwan manmeri na kamautim ol long olupela komyuniti bilong ol long dispela graun na Em i pasim ol long wanpela nupela komyuniti, orait Em i kamapim liklik bilong dispela bikpela komyuniti Em bai bungim long bihain. **Sios** God i wok long kamapim long wanwan hap em i liklik bilong dispela bikpela **sios** God bai kamapim long bihain. Dispela **sios** nau God i wok long kamapim long hia long ples em i liklik bilong dispela bikpela **sios** God bai bungim long bihain long rait taim Em i bin makim.

Olsem na, yumi mas klia olsem, misin em i no sios, na haus lotu em i no sios. Nogat. Ol dispela manmeri God i bin pikim na pasim long Krai bai ol i stap holi na i no gat asua na Krai i dai bilong baim pe bilong sin bilong ol na God i bin adoptim ol na givim bilip long ol na ol i bilipim na trastim feifful wok bilong Jisas na ol i lavim na bihainim Em, ol dispela manmeri ol i sios bilong God. Ol dispela manmeri ol i nupela komyuniti bilong God. Taim God i kisim ol dispela manmeri i kam na bungim ol long nupela komyuniti, em nau, God i kamapim sios.

Olsem na, yumi no ken i tingim sios em i samting we i gat haus lotu i stap, na ol i putim ol naispela klos, na ol i gat paris na seket miting i stap, na ol i save kamapim kemp na ol wanwik bung, na i gat nem na bikpela hetkwatas na ol dispela kain samting i stap. Nogat. Sios bilong God em i dispela nupela komyuniti God yet i

bin makim na pikim na pasim long Krai na Em i kisim ol i kam na pasim ol wantaim na ol i stap nupela komyuniti na ol i stap aninit tru long Jisas Krai.

Na tu, yumi mas klia olsem, God i no save raun long dispela graun bilong grisim ol manmeri long tanim bel na i stap aninit long Em. Nogat! God i no save raun long dispela graun na sekim ol lotu manmeri na ol i stap gutpela manmeri o nogat. Nogat. God i no save mekim olsem. God i no save resis wantaim Seten bilong grisim ol manmeri. Nogat!

God Em i bosim na kontrolim olgeta samting na Em yet i save makim na pikim na wokim olgeta samting bilong kamapim nupela komyuniti bilong Em, bilong kamapim sios bilong Em. Na long rait taim stret Em bai bungim olgeta nupela komyuniti wantaim olgeta samting long heven na long graun, na wanpela samting bai i stap tasol, na wanpela komyuniti bai stap tasol we olgeta manmeri na olgeta samting bai i stap aninit tru long Jisas.

Harim. God Em i wok long dispela samting, na yumi God i bin pasim long dispela nupela komyuniti, yumi mas wok long dispela samting tu. Mi minim olsem, yumi mas sindaun gutpela wantaim. God i bin makim na pikim yumi na Em i pasim yumi long dispela nupela komyuniti bilong Em, olsem na, yumi mas sindaun gutpela wantaim. Yumi no ken i putim wanblut bilong yumi paslain. Nogat. Yumi mas putim ol dispela manmeri God i pasim long nupela komyuniti bilong Em paslain. Yumi no ken i putim hauslain bilong yumi paslain long dispela nupela komyuniti bilong God. Nogat. Dispela nupela komyuniti i mas paslain long hauslain bilong yumi.

Dispela nupela komyuniti bilong God, trupela sios bilong God, em i nambawan samting bilong God. God i save bosim na kontrolim olgeta samting bilong kamapim dispela nupela komyuniti – dispela nupela komyuniti em i as bilong olgeta wok God i save mekim na dispela nupela komyuniti em i mas nambawan samting bilong yumi tu.

Na narapela samting tu. God i bin pasim yumi long dispela nupela komyuniti bai yumi stap aninit long Krai. Olsem na, yumi mas i stap aninit long Krai. Yumi mas harim tok bilong Em na bihainim tok bilong Em. Tok bilong Jisas i mas nambawan samting bilong yumi. Tok Jisas i mekim i mas stiaim olgeta samting bilong sios bilong yumi na long laip bilong yumi.

### **Las toktok.**

Yumi tok pinis, bikpela plen bilong God em bilong kamapim wanpela nupela komyuniti i stap aninit tru long Krai, na dispela nupela komyuniti em i sios bilong God.

Na yu gat wanem plen i stap long tingting bilong yu? Yu pas tru long plen bilong God o yu gat narapela tingting i stap long tingting bilong yu? Long sios bilong yumi bai yumi bihainim tok bilong Jisas o bai yumi bihainim tingting na pasin bilong misin? Bai yu yusim mani bilong yu na strong bilong yu na ol samting bilong yu bai sios bilong God i ken i gohet o bai yu les long yusim ol samting bilong yu? Bai yumi wok wantaim long dispela plen bilong God o bai yu larim ol dispela i stap long han bilong misineri tasol? Yu gat wanem tingting?

Em tasol.

## Sios i stap bilong apim nem bilong God i bikpela na gutpela tumas.

---

### Efesus 1:11-13.

---

Yumi save pinis, dispela graun i no gutpela tumas. Long planti hap bilong dispela graun i gat planti korapsen i stap, na gutpela wok bilong memba i no kamap tumas, na ol gutpela sevis i no kamap bilong helpim ol manmeri. Na long ples bilong yumi tu, i gat planti pasin nogut i stap, na dispela pasin nogut i save spoilim sindaun bilong yumi.

Yumi bin skelim **Efesus 1:9-10** na long dispela hap God i bin tokaut olsem, “Bai Mi rausim ol dispela samting na bai Mi kamapim wanpela nupela samting.” Yu save, God i gat plen bilong Em i stap, na **as** bilong plen bilong God i olsem, “*Olgeta samting long heven na long dispela graun bai kamap wanpela samting na i stap aninit long wanpela hetman tasol. Na dispela hetman Em i Jisas Krai.*” (Efesus 1:9-10)

God bai bungim olgeta samting bilong heven wantaim ol samting bilong dispela graun na Em bai kamapim wanpela *nupela samting*. Em bai kamapim wanpela nupela **komyuniti** we olgeta manmeri bilong dispela nupela komyuniti wantaim olgeta samting bai i stap aninit long wanpela *gutpela* hetman, Jisas Krai.

Bihain, long wanpela gutpela taim God i makim pinis, ol samting bilong dispela graun nau yumi stap long em bai pinis wantaim ol kainkain komyuniti bilong dispela graun. Olgeta bai pinis na wanpela *nupela samting* bai kamap. Na long dispela nupela samting wanpela nupela komyuniti bai i stap, na *olgeta* manmeri long dispela nupela komyuniti wantaim *olgeta* samting bai i stap aninit tru long Jisas Krai.

Na God i wok long kamapim dispela nupela komyuniti *nau*. *Nau* God i wok long kisim na pasim ol kainkain manmeri long wanpela nupela samting, long wanpela nupela komyuniti we ol i stap aninit tru long Krai. Bihain long wanpela gutpela taim God i bin makim pinis bai God i pinisim dispela wok bilong Em. Bihain Em bai kisim ol dispela nupela komyuniti Em i wok *nau* long kamapim na Em bai bungim ol wantaim olgeta samting bilong heven, na olgeta bai kamap wanpela, na olgeta bai i stap aninit long Krai i go i go olgeta.

Na nem bilong dispela nupela komyuniti God i wok long kamapim em i **sios**. Dispela nupela komyuniti em i **sios** bilong God. Dispela nupela komyuniti God i wok long kamapim nau, na bihain Em bai bungim, em i **sios** bilong God.

Orait, em gutpela. Tasol, husat bai i stap long dispela nupela komyuniti bilong God? Wanem manmeri i ken i stap insait long dispela nupela komyuniti bilong God? Husat em i bilong dispela nupela komyuniti bilong God? Wanem manmeri em i sios bilong God?

Nau moning mi laik tokim yupela long dispela samting. Husat em i sios bilong God?...

### Sios bilong God em i ol manmeri God i bin makim na pasim long Krai.

Lukim **lain 11-12**. Aposel Pol i tok olsem, *“God i makim mipela na pasim mipela long Krai bai mipela i stap manmeri bilong God.”* God i bin makim aposel Pol wantaim ol sampela manmeri, na Em i pasim ol long Krai. Long wanem? Em i pasim ol long Krai bai ol i stap *manmeri bilong God*, bai ol i stap *manmeri bilong dispela nupela komyuniti bilong God*, bai ol i stap *sios bilong God*.

God i bin makim na pikim aposel Pol wantaim ol sampela manmeri, *na long dispela wei* ol i kamap manmeri bilong God. Yu save, **God yet i save makim na pikim husat bai kamap manmeri bilong God.** *God yet* i save makim na pikim husat bai kamap manmeri bilong dispela nupela komyuniti bilong God. *God yet* i save makim na pikim husat bai stap sios bilong God.

Na long wanem taim God i makim na pikim ol dispela manmeri? Lukim **lain 11** wantaim **lain 4**. Long **lain 11**, Pol i tok olsem, *“Long bipo tru God i bin makim mipela inap long dispela plen bilong Em.”* Nau yumi lukim **lain 4**. *“Long bipo, taim God i no kamapim dispela graun yet, Em i bin makim yumi na pasim yumi long Krai.”*

God i bin makim na pikim ol wanwan manmeri long bipo, taim dispela graun i no kamap yet - Em i bin makim na pikim ol bilong kamapim dispela nupela komyuniti we ol i stap aninit tru long Jisas. Em i makim na pikim ol bilong kamapim sios bilong God we ol i stap aninit long Pikinini bilong Em, Jisas Krai.

Sampela manmeri i tingim olsem, God i save makim na pikim ol gutpela manmeri. Ol i tingim olsem, God i save raun na lukim husat em i gutpela manmeri na Em save makim na pikim ol dispela manmeri – ol gutpela manmeri. Tasol nogat. God i no mekim olsem.

God i bin pikim ol wanwan manmeri long *bipo tru*, taim wanpela samting i no kamap yet, taim wanpela manmeri i no kamap yet, taim ol i no bin mekim wanpela samting yet. God i bin makim na pikim ol wanwan manmeri long bipo, taim dispela graun i no kamap yet – long dispela bipo taim God i bin makim ol wanwan manmeri – i no nau. Long *bipo*, taim dispela graun i no kamap yet, God i bin makim na pikim wanwan manmeri.

Na narapela samting tu - yu tingim - gutpela manmeri i stap we na God i ken i makim na pikim ol? Yu save, i no gat wanpela gutpela manmeri i stap we God i ken i makim na pikim ol. Nogat. Long bipo, taim wanpela samting i no kamap yet, *God i bihainim amamas na laik bilong Em yet* na Em i makim na pikim ol wanwan manmeri. Long dispela bipo taim God i bihainim amamas na laik bilong Em yet na Em i makim na pikim ol wanwan manmeri. God i makim na pikim ol long laik bilong Em yet – Em i no makim na pikim ol bikos ol i gutpela manmeri. Nogat. Em i bihainim amamas na laik bilong Em yet na Em i makim na pikim ol wanwan manmeri. (Yu ken lukim lain 5)

Na taim God i bin makim na pikim ol, Em i bin pasim ol long Krai. Na bihain Krai i bin mekim wok long diwai kros bilong mekim ol holi na i no gat asua long ai bilong Em. Blut bilong Jisas i bin kapsait bilong baim pe bilong sin bilong ol, na long dispela wei God Em i fogivim ol long sin bilong ol. Na God Em i adoptim ol na mekim ol i kamap pikinini bilong Em yet. Na wantaim ol dispela samting God i bin givim trupela save na



tingting bilong Em yet long ol - Em i givim bilip long ol - na long dispela as ol i bin tanim bel na bilipim na trastim na lavim na bihainim na i stap aninit tru long Jisas.

God i bin mekim ol dispela samting bilong kamapim dispela nupela komyuniti bilong Em we olgeta bai i stap aninit tru long Jisas. God i bin mekim ol dispela samting bilong kamapim sios bilong Em. Ol dispela manmeri God i bin makim na pasim long Krai ol i trupela sios bilong God.

Sampela man i tingim olsem ol yet i ken i kamapim sios. Sampela i tingim olsem, taim ol i wokim haus lotu na ol i grisim ol manmeri i kam bung, em nau, ol i kamapim sios. Tasol sios bilong God i no inap kamap long dispela wei. Nogat tru. God yet i save kamapim sios. Ol dispela manmeri God i bin makim na pikim long bipo na nau ol i tanim bel na bilipim na trastim faitful wok bilong Jisas na ol i lavim Em na i stap aninit long Em, ol dispela manmeri ol i sios bilong God.

Wanpela man i no inap kamapim sios bilong God. Nogat tru. God yet i save kamapim. Wok bilong kamapim sios Em i wok bilong God tasol bikos God tasol i bin makim na pikim ol na God tasol i ken i givim bilip long ol.

Na sapos yu bin tanim bel na yu bilipim na trastim na lavim na i stap aninit tru long Jisas, orait yu ken i klia olsem, God i bin makim na pikim yu na Em i bin givim bilip long yu. Na yu ken i klia olsem yu bilong dispela nupela komyuniti bilong God.

Orait, nau yumi tingim dispela, Long wanem as God i kamapim dispela nupela komyuniti? Long wanem as God i kamapim sios? Long wanem as God i bin makim na pikim yumi na kisim yumi i kam insait long dispela nupela komyuniti bilong Em?

Lukim **lain 12**.

**God i kisim yumi i kam insait long nupela komyuniti bai yumi i stap bilong apim nem bilong God i bikpela na gutpela tumas.**

Long Efesus 1:7-8 yumi bin stori long grasia bilong God. Na grasia bilong God em i pasin we God i mekim gutpela pasin long yumi i bin mekim pasin nogut long Em.

Yu save long pasin bilong ol manmeri bilong dispela graun. Ol i ken i mekim gutpela pasin long ol manmeri i mekim gutpela pasin long ol. Tasol, God i save mekim gutpela pasin long yumi i bin mekim pasin nogut long Em.

Yumi bin sakim tok bilong Em. Yumi bin givim baksait long Em. Yumi bin daunim nem bilong Em. Yumi bin egensim Em. Yumi bin les long bihainim Em. Tasol God i mekim gutpela pasin long yumi. Em i bin makim yumi na pasim yumi long Krai. Na Krai i mekim wok bilong mekim yumi holi na i no gat asua long ai bilong God. God Em i fogivim yumi na Em i adoptim yumi na Em i givim bilip long yumi. Ol dispela i soim yumi grasia bilong God. God i mekim gutpela pasin tru long yumi i bin mekim pasin nogut tru long Em. Em i bin lavim yumi i no bin lavim Em. Ol dispela em i grasia bilong God.

Na yumi i save long grasia bilong God, yumi save tingim olsem, God Em i wanpela bikpela na gutpela God tumas. Bipo, yumi no save tumas long God na long olgeta samting Em i mekim long yumi. Tasol nau yumi klika liklik na yumi tanim het na yumi tingim olsem, God Em i wanpela bikpela na gutpela God tumas. Em nau. God i bin kisim yumi i kam insait long nupela komyuniti bilong Em bilong dispela samting tasol. Em i bin kisim yumi i kam bilong apim nem bilong Em.

God i bin mekim ol dispela wok bilong makim na pikim yumi na pasim yumi long Krai bai yumi ken i save long God na bai yumi amamas long Em na tok tenkyu long Em na litimapim nem bilong Em na lotu long Em. God i kamapim sios bilong Em bai ol manmeri bilong dispela nupela komyuniti i ken i tokaut long olgeta gutpela gutpela pasin bilong God long wok bilong Jisas na litimapim nem bilong Em.

Olgeta wok bilong kamapim sios em i wok bilong God "long stat tu pinis". Em i bin makim na pikim ol na sevim ol na pasim ol long nupela komyuniti bilong Em. Em yet Em i mekim olgeta wok bilong kamapim nupela komyuniti bilong Em. Em i mekim olsem bai ol i no inap apim ol yet long wanpela liklik samting. Nogat. Ol bai litimapim nem bilong God tasol long olgeta samting bikos God yet i bin mekim olgeta wok.

Sios bilong God i stap bilong apim nem bilong God tasol. Olgeta samting God i wokim na God i mekim em bilong yumi ken i save long Em na bai yumi apim nem bilong Em i bikpela na gutpela tumas.

Olsem na, yu tingim. Sios bilong God i no stap bilong kamapim haus sik. Sios bilong God i no stap bilong kamapim skol. Sios bilong God i no stap bilong kamapim ol sampela program long ples. Sios bilong God i no stap bilong kamapim bikpela hauslotu. God i no kamapim nupela komyuniti bilong Em bilong mekim ol dispela samting. Nogat tru!

Sios bilong God i stap bilong apim nem bilong God tasol. Olgeta samting God i wokim na God i mekim em bilong yumi ken i save long Em na bai yumi apim nem bilong Em i bikpela na gutpela tumas.

Long **1 Timoti 3:15** aposel Pol i bin mekim wanpela toktok. Em i tok, "*Hauslain bilong God em i sios bilong dispela trupela God i gat laip. Na sios bilong God em i olsem strongpela graun na strongpela pos bilong holim trupela tok.*"

Na yu tingim. Long wanem as Pol i mekim dispela toktok? Pol i mekim dispela toktok bikos long trupela tok bilong God tasol bai yumi save tru long olgeta samting God i bin mekim long Krai na bai yumi amamas long God na lavim Em na bihainim Em na litimapim nem bilong Em.

Ol sampela lotu i bin lusim trupela gutnius pinis na ol i bihainim tok i no tru. Olsem na, ol i no save long wanem samting God i bin mekim long dai bilong Jisas, na ol i no save long wanem as sios i stap. Ol i bin dropim trupela tok bilong God na ol i bihainim tok ol yet i kamapim. Ol i bihainim giaman tok tasol. Ol i lusim trupela tok bilong God na long dispela as ol i no save long olgeta wok God i bin mekim long dai bilong Jisas, na ol i no save litimapim nem bilong God. Nogat. Ol i save litimapim nem bilong ol yet na ol i save litimapim nem bilong lotu bilong ol tasol.

Na sapos yumi tu yumi lusim trupela tok bilong God, o yumi larim ol lotu pasin i karamapim trupela tok bilong God, orait bai yumi stap olsem ol. Manmeri i lusim trupela tok bilong God ol i no inap save tru long

God, na long dispela as ol i no inap litimapim nem bilong God. Nogat. Bai ol i litimapim nem bilong ol yet tasol.

God i bin givim trupela save na tingting bilong Em yet long yumi, bai yumi save tru long Em na bai yumi lavim Em na amamas long Em na litimapim nem bilong Em tasol. Olsem na, yumi mas strong long holim dispela trupela save na tingting bilong Em. Yumi mas strong long holim trupela tok bilong God. Sios bilong God i mas strong long holim trupela tok bilong God. Na sios bilong God i mas strong bilong autim trupela tok bilong God, bai God tasol i kisim amamas bilong yumi na Em i kisim tok tenkyu bilong yumi, na bai God tasol i kisim biknem.

Long Papua Niu Gini, planti misin i save resis. Ol i save tok olsem, "Mipela trupela sios tasol." Na narapela bai tok olsem, "Nogat, mipela trupela sios." Yu save, ol i resis na planti manmeri long ples i save paul.

Tasol yumi no inap paul bikos yumi save olsem, trupela sios bilong God bai apim nem bilong God tasol. Ol trupela sios bai tokaut long olgeta samting God i bin mekim long dai bilong Jisas na ol bai apim nem bilong God long ol dispela samting. Ol bai tok olsem, "Long wok bilong Jisas Krai tasol God i bin kisim bek mipela. Mipela no mekim wanpela samting na God i kisim bek mipela, nogat. God tasol i mekim olgeta wok bilong kisim bek mipela. Em i wok bilong God 'long stat tu pinis'."

Tasol, giaman sios bai tok olsem, "Mipela gutpela manmeri na mipela save harim lotu, na bihain Jisas i ken i lukim mipela na amamas long pasin bilong mipela na kisim bek mipela." Yu save, long dispela toktok ol i apim ol yet long ai bilong God. Na sapos ol apim ol yet, em nau, ol i daunim nem bilong God tasol. Ol i daunim gutpela grasia bilong God. Olsem na, dispela tok bilong ol i soimaut olsem, ol i no trupela sios bilong God.

Na narapela samting tu. Ol trupela sios bilong God i save stap aninit tru long Jisas. Ol i save harim na bihainim olgeta tok bilong Jisas. Na ol i amamas long i stap aninit long Jisas bikos dispela pasin i save givim biknem long God. Taim ol i stap aninit tru long Jisas, dispela i soim olsem ol i tingim God Em i wanpela bikpela na gutpela God tumas na ol i amamas long i stap aninit long Em. Pasin yumi mekim i soim olsem, God i bikpela na gutpela tumas long yumi, na dispela i save givim biknem long God.

### **Las toktok.**

God i bin makim na pikim na pasim yumi long Krai, na Krai i bin mekim wok long diwai kros bilong mekim yumi holi na i no gat asua long ai bilong Em. Na God Em i adoptim yumi na mekim yumi femili bilong Em. Na Em i givim trupela save na tingting bilong Em yet long yumi. God yet i mekim ol dispela samting bilong kamapim nupela komyuniti bilong Em, bilong kamapim sios bilong Em. Na Em i mekim ol dispela samting bilong yumi ken i stap bilong apim nem bilong God.

Sios God i wok long kamapim i stap bilong litimapim nem bilong God. Olsem na, yumi mas holim strong trupela gutnius bilong God na yumi mas tokaut long olgeta samting dispela bikpela na gutpela God bilong yumi i bin mekim long dispela Man Em i lavim tumas, Jisas Krai. Na long dispela wei nem bilong dispela bikpela na gutpela God bai kamap bikpela insait long PNG.

Em tasol.

# God i givim Holi Spirit long yumi bilong soim olsem Em i bin pasim yumi long Krai.

---

## Efesus 1:13.

---

Planti manmeri ol i no save, tasol yumi save – yumi save long plen bilong God. Yumi save olsem, God bai bungim olgeta samting bilong heven wantaim ol samting bilong dispela graun na Em bai kamapim wanpela *nupela samting*. Em bai kamapim wanpela nupela **komyuniti** we olgeta manmeri bilong dispela nupela komyuniti wantaim olgeta samting bai i stap aninit long wanpela *gutpela* hetman, Jisas Krai.

Na nem bilong dispela nupela komyuniti God i wok long kamapim em i **sios**. Dispela nupela komyuniti God i wok long kamapim *nau*, na *bihain* Em bai bungim, em i **sios** bilong God.

Na husat bai i stap insait long dispela nupela komyuniti? Yumi save pinis olsem, *God yet*, long bipo, taim dispela graun i no kamap yet, Em i bin makim na pikim husat bai i stap insait long dispela nupela komyuniti bilong Em. *God yet* i makim na pikim ol wanwan manmeri na pasim ol long Krai bilong kamapim dispela nupela komyuniti bilong Em. God i bihainim amamas na laik bilong Em yet na Em i makim na pikim ol wanwan manmeri bilong dispela nupela komyuniti bilong Em.

Em olsem na, tasol, ating sampela bilong yumi i ken i pret liklik long dispela tok. Yu save, yumi bin toktok planti long hau *God yet* i save makim na pikim husat bai i stap insait long dispela nupela samting God i wok long kamapim. Olsem na, ating sampela bilong yumi ken i tingim olsem, “God i bin makim na pikim *mi* o nogat? Hau na bai *mi* save long dispela? Hau na bai mi ken i save, God i bin pikim mi o Em i no bin pikim mi?”

Nau bai yumi skelim dispela samting. Long **lain 13** aposel Pol i tokaut long 3-pela samting, na dispela 3-pela samting i ken helpim yu skelim ol dispela. Na fes tok Pol i tokaut long em i olsem....

### 1. Manmeri God i bin makim ol i save harim trupela tok bilong God.

Lukim **lain 13**. “Na yupela tu i pas long ol dispela samting bilong Krai taim yupela i **harim** tok i tru tumas. Dispela tok i tru tumas em i *gutnius* i tokaut long wok God i mekim long Krai bilong sevim yupela.”

Yu save, olgeta manmeri God i bin makim na pikim bilong ol dispela samting bilong Krai, bilong dispela nupela komyuniti bilong Krai, ol bai **harim trupela tok bilong God**. Ol bai harim trupela tok bilong God na ol bai klia olsem dispela tok i tru tumas.

Aposel Pol i no minim olsem, ol i harim nating tasol. Nogat. Em i minim olsem ol bai harim na ol bai klia olsem dispela tok i trupela gutnius bilong God. Ol bai klia olsem, dispela gutnius i tokaut long olgeta wok God yet i bin mekim long dai bilong Jisas em i trupela trupela tok bilong God.

Bai mi stori long wanpela man na nem bilong em Jon. Bipo, Jon i pas long ol sampela lotu nabaut. Na taim ol man i sanap na autim tok, orait Jon i tingim olsem man i autim tok bilong God. Na man yet i save tokim Jon olsem, "Mi autim gutnius bilong God." Jon i bin harim na em i tingim olsem, "Em nau, mi harim tok bilong God."

Tasol, taim *trupela* tok bilong God i kamap long ples, taim *trupela* gutnius bilong Krai i kamap, *dispela trupela gutnius i tokaut long olgeta wok God yet i bin mekim long dai bilong Pikinini bilong Em*, taim dispela *trupela toktok* i kamap, em nau, tingting bilong Jon i senis olgeta na Jon i tanim het na tok, "Nau tasol mi harim trupela tok bilong God." Nau Jon i save tok olsem, "Bipo, taim mi stap nabaut long kainkain lotu mi no bin harim trupela tok bilong God. Tasol nau mi harim."

Jon i harim trupela gutnius i tokaut long feifful wok bilong Jisas long diwai kros, na em i tanim bel na em i bilipim na trastim dispela gutnius na em i bihainim Jisas.

Yu save? Ol manmeri God i bin makim long bipo, ol bai *harim* trupela gutnius bilong God na ol bai save olsem, dispela trupela gutnius em i tru tumas, na ol bai bilipim na trastim feifful wok bilong Jisas na bihainim Em.

God i bin makim na pikim ol wanwan manmeri longtaim pinis, na em ol dispela manmeri bai i stap insait long trupela sios bilong God, insait long nupela komyuniti bilong God. God i wok *nau* long kisim dispela manmeri Em i bin makim i kam insait long dispela nupela komyuniti bilong Em. Tasol.....

***God i mekim wanem na Em i kisim ol manmeri Em i bin makim i kam insait long sios bilong Em?***

Yu tingim. God i save yusim trupela gutnius bilong Em bilong kisim ol i kam insait. God i no save yusim narapela samting. Nogat tru. Em i yusim trupela gutnius, dispela trupela gutnius i tokaut long olgeta samting God i bin mekim long dai bilong Jisas, God i yusim dispela trupela gutnius bilong kisim ol manmeri Em bin makim i kam insait long nupela komyuniti bilong Em.

Harim wanpela toktok aposel Pol i bin mekim long **Rom 10:13-15**. Em i tok,

*"Olgeta manmeri i singaut long BIKPELA bai kisim laip." Tasol, hau na bai ol i singaut long BIKPELA sapos ol i no bilipim na trastim Em? Na hau na bai ol i bilipim na trastim Em sapos ol i no bin **harim tok bilong Em**? Na hau na bai ol i harim tok bilong Em sapos wanpela man i no bin autim tok long ol? Na hau na bai wanpela man i autim tok long ol sapos BIKPELA i no bin salim em i go bilong autim tok long ol? Buk bilong God i mekim dispela tok, "Lek bilong ol man i kam autim gutnius i naispela tru!"*

God i save yusim trupela gutnius bilong Em yet bilong kamapim trupela bilip long ol manmeri Em i bin makim. Pol i tok, "Hau na bai ol i bilipim na trastim Em sapos ol i no bin harim tok bilong Em? Na hau na bai ol i harim tok bilong Em sapos wanpela man i no bin autim tok long ol." Long rot bilong harim tok bilong

BIKPELA, long rot bilong harim trupela gutnius bilong God, bai ol manmeri God i bin makim i tanim bel na bilipim na trastim na bihainim Jisas na i kam insait long nupela komyuniti bilong God.

God i save yusim dispela trupela gutnius bilong bringim ol dispela manmeri Em i bin makim, i kam insait long dispela nupela komyuniti bilong Em, insait long sios bilong Em.

Na tu, yu lukim, God i save yusim yumi, *yumi i kam insait pinis*, long karim dispela trupela gutnius bilong Em i go long ol manmeri bai ol narapela manmeri God i bin makim long bipo i ken i harim na bilip na kam insait long nupela komyuniti bilong God wantaim yumi.

Yumi no save husat God i bin makim. Sapos ol sampela manmeri i harim trupela gutnius na ol i tanim bel na bilipim na trastim dispela trupela gutnius, orait long dispela taim yumi ken i save olsem, God i bin makim ol. Tasol, i gat sampela i no kam insait yet na ol dispela manmeri yumi no save long ol. Olsem na, yumi mas tromoi trupela gutnius bilong God i go long olgeta manmeri na bai ol manmeri God i bin makim i ken i harim na kam insait long dispela nupela komyuniti bilong God na kisim olgeta blesim bilong God wantaim yumi.

Yumi mas tromoi *trupela gutnius*, dispela trupela gutnius i tokaut long olgeta samting God i bin mekim long dai bilong Jisas, na bai ol manmeri God i bin makim i ken i harim na kam insait. Sapos yumi autim tok bilong yumi yet, o sapos yumi autim ol samting long tingting bilong yumi yet, o sapos yumi autim giaman gutnius, orait yumi westim taim bikos ol manmeri God i bin makim ol i no inap harim dispela samting. Nogat. Ol bai harim trupela gutnius i tokaut long olgeta samting *God yet* i bin mekim long dai bilong Jisas Krai. Yumi mas autim dispela kain toktok.

Olsem na, maski grisim ol manmeri long ol sampela samting. Trupela gutnius bilong God tasol bai bringim ol manmeri God i bin makim i kam insait long trupela sios bilong Em.

Long dispela as tasol, mi no bin kam na kamapim haus sik na skul na bikpela haus lotu na mekim ol kain samting olsem. Nogat. Mi save olsem, trupela gutnius bilong God tasol bai bringim ol manmeri God i bin makim i kam insait long trupela sios bilong God. Olsem na, mi bin pultaim long autim trupela gutnius bilong God tasol.

Na yumi i kam insait pinis, yumi tu yumi mas mekim olsem. Taim yu toktok wantaim ol sampela prens bilong yu o long ol sampela manmeri long hauslain bilong yu, God i ken i yusim dispela trupela gutnius bilong bringim ol sampela manmeri God i bin makim pinis i kam insait long trupela komyuniti bilong Em wantaim yu. Taim yumi tokim ol long trupela gutnius bilong God, bai God i yusim dispela trupela gutnius bilong bringim ol sampela manmeri Em i bin makim i kam insait long trupela sios bilong Em.

Olgeta manmeri God i bin makim na pikim bilong ol dispela samting bilong Krai, bilong dispela nupela komyuniti bilong Krai, ol bai **harim trupela tok bilong God**. Ol bai harim trupela tok bilong God na ol bai klia olsem dispela tok i tru tumas.

Orait, em wanpela samting. Narapela samting i olsem.....

## 2. Manmeri God i bin makim bai bilipim na trastim trupela tok bilong God.

Lukim **lain 13** gen. “.....*Na taim yupela bilip.....*” Yu save, ol i harim trupela tok bilong God na ol i klia olsem dispela tok i trupela gutnius bilong God, na taim ol i harim ol i tanim bel na **bilipim na trastim** dispela trupela tok bilong God.

Lukim **Aposel 13:48**. Aposel Pol wantaim Barnabas i stap long taun Antiok na tupela i autim trupela tok bilong God. Lukim lain 48.

*“Na taim ol Jentail manmeri i harim tok bilong tupela (Pol na Barnabas), ol i amamas na i tok, ‘Tok bilong BIKPELA i gutpela tru.’ Na ol manmeri God i bin makim bilong kisim laip i stap oltaim oltaim, ol dispela manmeri i bilip.”*

Ol manmeri God i bin makim bilong kisim nupela laip, ol i bin harim trupela gutnius Pol i bin autim, na ol i **bilipim na trastim** dispela trupela gutnius. Planti manmeri i kam i stap na ol i harim trupela gutnius Pol na Barnabas i autim. Na namel long ol dispela manmeri sampela manmeri God i bin makim long bipo, taim dispela graun i no kamap yet, i stap. Ol i stap, na taim Pol i autim trupela tok bilong God ol dispela manmeri i **harim** na ol i tanim bel na **bilipim na trastim** na bihainim.

Lukim **Aposel 16:13-15**. Harim stori bilong Pol na Sailas na Timoti taim ol i kamap long taun Filipai....

*<sup>13</sup> Na long de Sabat mipela i go outsait long banis bilong taun na mipela go daun long wanpela wara. Mipela tingim olsem, ol manmeri i gat ples bilong prea long dispela hap. Na sampela meri i bung i stap na mipela sindaun na **autim tok** long ol. <sup>14</sup> Na wanpela meri bilong taun Taiataira i sindaun na i **harim** tok bilong mipela, nem bilong em Lidia. Em i wok bisnis long ol purpel laplap, na em save lotu long God. Na **BIKPELA i opim bel** bilong Lidia bilong Lidia i ken i kisim dispela tok Pol i autim. <sup>15</sup> Na taim Lidia wantaim ol femili bilong em i kisim baptais, em i tokim mipela olsem, “Sapos yupela tingim olsem mi **kisim trupela bilip** long BIKPELA, orait plis yupela kam na i stap long haus bilong mi.” Na em i strong tumas na mipela i go stap wantaim em.*

Na yu tingim. Long bipo, taim dispela graun i no kamap yet, God i bin makim na pikim Lidia o nogat? Yes, God i bin makim na pikim Lidia. Hau na yumi ken i save?

Yumi ken i save bikos Lidia i bin *harim* trupela gutnius Pol i bin autim na BIKPELA Em i opim bel bilong em na em i **bilipim na trastim** ol dispela samting God i bin wokim long dai bilong Jisas. Em i bilipim dispela gutnius i tokaut long olgeta samting God i bin wokim long dai bilong Jisas bilong sevim em. Em i harim na em i klia olsem dispela tok i tru tumas, na em i bilipim na trastim dispela tok. Em i bilipim na trastim ol dispela wok God i bin mekim long dai bilong Jisas. Em i bilipim na trastim feitful wok bilong Jisas long diwai kros.

Mi no save long yu, tasol mi save long mi. Bipo, mi no bin harim trupela gutnius bilong God na mi no save long wanem samting God i bin mekim long dai bilong Jisas. Bipo mi bin i stap tasol long misin pasin na laip bilong mi no senis liklik. Tasol, bihain God i bin bringim trupela gutnius bilong Em i kam long mi, na mi harim na mi tingim olsem, “Dispela tok i tru tumas.” Na taim mi harim, orait God i opim bel bilong mi na mi bilipim na trastim dispela trupela gutnius bilong God.

Na God i wokim olsem long yu o nogat? Sapos God i wokim olsem long yu, orait yu ken i save olsem, bipo tru God i bin makim yu na pasim yu long Jisas, bai Jisas i mekim yu stretpela long ai bilong God na God i kisim bek yu.

Manmeri God i bin makim bai harim trupela tok bilong God. Na manmeri God i bin makim bai bilipim trupela tok bilong God.

Orait, yumi skelim tupela samting pinis. Namba 3 samting em i olsem.....

### **3. Manmeri God i bin makim God i bin givim Holi Spirit long ol.**

Lukim **lain 13** gen. *“Na taim yupela bilip God i givim wanpela mak long yupela bilong soim olsem Em i bin pasim yupela long Krai.”*

Yu tingim. Long wanem as yu harim trupela tok bilong God? Na long wanem as yu tingim dispela gutnius i tokaut long olgeta wok God bin mekim em i trupela gutnius bilong God? Long wanem as yu bilipim na trastim dispela trupela tok bilong God? Long wanem as laip bilong yu em i senis na yu tanim bel na bilipim na trastim trupela gutnius bilong God?

Yu tingim **Efesus 2:1**. Yumi dai pinis long olgeta samting long sait bilong God. Hanlek bilong yumi i save wok, tasol long sait bilong olgeta samting bilong God yumi no gat laip.

Olsem na, hau na yu harim trupela tok bilong God? Hau na yu klia olsem dispela gutnius i tokaut long olgeta wok God i bin mekim long dai bilong Jisas em i trupela gutnius bilong God? Hau na yu bin tanim bel na bilipim na trastim ol dispela wok God i bin mekim long dai bilong Jisas? Sapos yu no gat laip, orait hau na yu bin harim na bilipim trupela gutnius bilong God?

Yu bin harim na bilipim bikos God i bin givim Holi Spirit long yu na Em i stap insait long yu. Yu save, ol dispela samting em i hanmak bilong Holi Spirit. Lukim **Jon 16:13**. Jisas i bin tokim ol disaipel bilong Em na Em i tok,

*“...taim Spirit bilong tok i tru olgeta Em i kam, bai Em i stiaim yupela i go long olgeta tok i tru.”*

Yu save? Sapos yu bilipim na trastim faitful wok bilong Jisas na yu bihainim Em, orait yu mas save olsem, Em i Holi Spirit i bin stiaim tingting bilong yu i go long olgeta trupela gutnius bilong God. Em i Holi Spirit i bin opim bel bilong yu na yu bilip long trupela gutnius bilong God. Ol dispela em i hanmak bilong Holi Spirit. Em i Holi Spirit i bin senisim yu na yu tanim bel na bilipim na trastim trupela gutnius bilong God.

Sampela manmeri i bilipim na trastim ol narapela gutnius i no trupela gutnius bilong God. Yu save, ol sampela lotu i autim tok olsem, “Yu yet yu mas i stap stretpela manmeri na bai Jisas i kisim bek yu.” Sampela i tok olsem, “Sapos yu lukautim Sabat o yu kisim baptais o yu kaikaim Lordsapa o yu mekim ol gutpela misin pasin, orait Jisas i ken i lukim ol dispela pasin bilong yu na kisim bek yu long ol dispela samting.”



Tasol, dispela tok bilong ol i no wankain olsem gutnius bilong God i tokaut long olgeta samting *God yet* i bin mekim bilong kisim bek ol manmeri Em i bin makim. Olsem na, ol i autim giaman gutnius tasol – ol i autim tok i no tru. (Aposel Pol i bin mekim wankain tok long **Galesia 1:6-10**. Yu yet yu lukim na skelim.)

Olsem na, planti manmeri ol i bilipim na trastim ol dispela giaman gutnius bilong ol sampela lotu na ol i tingim olsem Holi Spirit i stap long ol. Tasol nogat. Holi Spirit Em i Spirit bilong **olgeta tok i tru**. Olsem na, Em bai stiaim ol manmeri God i bin makim i go long **tok i tru** tasol. Em i no inap stiaim ol sampela manmeri i go long tok i no tru na long ol kain kain misin pasin tasol. Nogat. Wok bilong Holi Spirit Em i bilong opim ai na ia na bel bilong ol dispela manmeri God i bin makim bai ol i *harim na bilipim na trastim trupela gutnius* i tokaut long olgeta samting God i bin mekim long dai bilong Jisas.

Olsem na, sapos yu bin harim na bilipim na trastim trupela gutnius bilong God, orait yu ken i klia olsem, God bin givim Holi Spirit long yu. Na Em i mekim olsem bikos long bipo taim dispela graun i no kama yet, Em i bin makim na pikim yu.

### **Las toktok.**

Na bai yumi mekim wanem? Bai yumi litimapim nem bilong dispela God i bikpela na gutpela tumas. Ol dispela wok Em i wok God i bin mekim “long stat tu pinis”.

Olsem na, larim tingting bilong yu i pulap olgeta long olgeta samting bilong dispela gutpela God. Pulimapim tingting bilong yu long olgeta samting dispela gutpela gutpela God i bin mekim long dai bilong Jisas. Pulimapim tingting bilong yu long ol dispela samting, na yu litimapim nem bilong God wantaim BIKPELA Jisas Krai.

Em tasol.

## Holi Spirit Em i diposit bilong olgeta samting Krai i bin kisim bilong yumi na bihain yumi bai lukim.

---

### Efesus 1:14.

---

Long planti wik yumi bin skelim **Efesus 1:1-13**. Na fes samting aposel Pol i tokim yumi i olsem, em i tok, “Mi salim dispela tok long yupela, ol manmeri bilong God – mi salim dispela tok long yupela manmeri i bihainim tru Krai Jisas.” (Lukim **lain 1-2**) Olsem na, yumi klia olsem, olgeta toktok God i mekim long dispela buk Efesus em bilong manmeri i bihainim tru Krai Jisas, em bilong mipela i bihainim tru Krai Jisas. Dispela tok long buk Efesus em i no bilong olgeta manmeri. Nogat. Em bilong mipela i bihainim tru Krai Jisas. Em bilong yumi i bilipim na trastim feitful wok bilong Jisas na i bihainim Em.

Na Pol i bin tok wanem long **lain 1-13**? Yumi skelim na holim tingting.....

- God i givim olgeta blesim bilong heven long yumi i bilong Krai. Olgeta blesim bilong heven em bilong yu na mi i bihainim tru Krai Jisas. (Lukim **lain 3**)
- Long bipo, taim dispela graun i no kamap yet, God i bin makim na pikim yumi na Em i pasim yumi long Krai. God yet i bin pasim yumi long Krai, na long dispela as tasol nau yumi bilipim na trastim na yumi bihainim tru Krai Jisas. (Lukim **lain 4**)
- Na long wanem as God i bin makim na pikim na pasim yumi long Krai? Em i makim na pikim na pasim yumi long Krai bai Krai i mekim wok long diwai kros bilong mekim yumi holi na i no gat asua long ai bilong God. Yumi sin manmeri na God i bin pasim yumi long Krai bikos Krai tasol i ken i mekim yumi holi na i no gat asua long ai bilong God. (Lukim **lain 4 na 7-8**)
- Pol i tok, Krai i bin mekim wok long diwai kros bilong baim pe bilong sin bilong yumi – bilong baimaut na pinisim pe bilong sin bilong yumi. Long dispela as, nau God i save fogivim yumi long sin bilong yumi. Wok bilong Krai long diwai kros i mekim yumi holi na i no gat asua long ai bilong God. (Lukim **lain 7-8 na 4**)
- God i bin mekim ol dispela wok bikos Em i laik adoptim yumi na mekim yumi pikinini bilong Em long femili bilong Em. Em i bin makim na pikim yumi bilong adoptim yumi na mekim yumi femili bilong Em. (Lukim **lain 5-6**)
- Na wantaim ol dispela samting, God i givim trupela save na tingting long yumi. Long wanem? Em i givim trupela save na tingting long yumi bai yumi klia long ol dispela samting God i bin mekim na bai yumi tanim bel na bilipim na trastim na lavim na bihainim Em. Holi Spirit bilong God i bin opim ai na ia na bel bilong yumi bai yumi ken i save long ol dispela samting God i bin mekim na bai yumi tanim bel na bilipim na trastim na lavim na bihainim Krai. (Lukim **lain 7-8**)

- Na tu, God i bin soim yumi plen bilong Em. Na plen bilong God i olsem, God bai bungim olgeta samting bilong heven wantaim ol samting bilong dispela graun na Em bai kamapim wanpela nupela samting. God Em i wok long kamapim wanpela nupela komyuniti we olgeta manmeri bilong dispela nupela komyuniti wantaim olgeta samting bai i stap aninit tru long wanpela trupela hetman, Jisas Krai. (Lukim **lain 9-10**)
- Na nem bilong dispela nupela komyuniti God i wok long kamapim em i sios. Dispela nupela komyuniti God i wok long kamapim *nau*, na *bihain* Em bai bungim, em i sios bilong God. (Lukim **lain 5**, na tu, yu ken i lukim **1 Timoti 3: 15**)
- Na husat i stap insait long dispela nupela komyuniti bilong God? Yumi. Yumi God i bin makim na pasim long Krai. God i bin makim na pikim ol wanwan manmeri na Em i pasim ol long Krai bilong kamapim dispela nupela komyuniti bilong Em, bilong kamapim sios bilong God. (Lukim **lain 11-13**)
- Na dispela nupela komyuniti i stap, sios i stap, bilong apim nem bilong God i bikpela na gutpela tumas. God i mekim ol dispela wok bilong kamapim wanpela nupela komyuniti we olgeta manmeri bilong dispela nupela komyuniti bai i stap aninit tru long Krai na ol bai amamas tru na litimapim tru nem bilong God na nem bilong Jisas Krai wantaim. (Lukim **lain 6 na 12 na 14**)

Na hau na bai yumi save, yumi stap long ol dispela samting o nogat? Hau na bai yumi save, God i bin makim na pikim yumi na pasim yumi long Krai o nogat? Hau na bai yumi save, God i bin makim na pikim yumi na putim yumi insait long dispela nupela komyuniti bilong Em o nogat?

Long Efesus 1:13 yumi bin skelim dispela toktok. Lukim gen **lain 13** na yumi holim tingting. Long **lain 13** Pol i tok olsem, *“Na yupela tu i pas long ol dispela samting bilong Krai taim yupela i harim tok i tru tumas. Dispela tok i tru tumas em i gutnius i tokaut long wok God i mekim long Krai bilong sevim yupela.”*

Olsem na, yumi ken i klia olsem, manmeri God i bin makim na pikim na pasim long Krai, ol bai harim trupela gutnius bilong God. Na tu, ol bai save olsem dispela trupela gutnius bilong God em i trupela gutnius bilong God.

Na Pol i skruim dispela tok na em i tok long **lain 13** olsem, *“Na taim yupela bilip...”* Yu save, manmeri God i bin makim na pikim na pasim long Krai, ol bai harim trupela gutnius bilong God, na ol bai save olsem dispela gutnius em i tru tumas, na ***ol bai bilipim dispela trupela gutnius bilong God.***

Ol i no inap harim na bilipim na trastim na bihainim ol giaman gutnius ol sampela man i save autim. Nogat tru! Ol bai bilipim na trastim na lavim na bihainim ***trupela*** gutnius bilong God tasol.

Orait, tasol Pol i tokaut long narapela samting long **lain 13**. Em i tok, *“Na taim yupela bilip God i givim wanpela mak long yupela bilong soim olsem Em i bin pasim yupela long Krai. Na dispela mak em i Holi Spirit God i bin promisim.”*

Olsem na, yu tingim. Long wanem as yu bin harim trupela tok bilong God? Na long wanem as yu save olsem dispela trupela tok bilong God i tru tumas? Na long wanem as yu tanim bel na bilipim na trastim na bihainim dispela trupela gutnius i tokaut long feitful wok bilong Jisas?

Yu bin harim na bilipim bikos God i bin givim Holi Spirit long yu na Em i stap insait long yu. Yu save, ol dispela samting em i **hanmak** bilong Holi Spirit. Jisas i bin tok long **Jon 16:13** olsem, “.....*taim Spirit bilong tok tru olgeta Em i kam, bai Em i stiaim yupela i go long olgeta tok i tru.*”

Yu save? Em i Holi Spirit i bin stiaim tingting bilong yupela i go long olgeta trupela gutnius bilong God. Em i Holi Spirit i bin opim bel bilong yupela na yupela bilipim na trastim na bihainim trupela gutnius bilong God. Ol dispela em i **hanmak** bilong Holi Spirit. Em i Holi Spirit i bin senisim yupela i tanim bel na i bilipim na trastim na bihainim trupela gutnius bilong God.

Ol dispela **hanmak** bilong Holi Spirit i soim olsem, Holi Spirit i stap insait long yu. Na dispela i soim yu olsem, God i bin makim na pikim na pasim yu long Krai. Taim yu lukim ol dispela **hanmak** bilong Holi Spirit long laip bilong yu, orait yu ken i save olsem, Holi Spirit i stap insait long yu, na dispela i soim yu olsem, God i bin makim na pikim na pasim yu long Krai.

Na dispela em i gutpela tru. Tasol aposel Pol i skruim dispela tok i go yet long **lain 14**. Na em i tok olsem, “*Holi Spirit i olsem **diposit** bilong olgeta samting Krai i bin kisim bilong yumi na bihain yumi bai lukim.*”

Orait, nau yumi save long tupela samting bilong Holi Spirit God i bin promisim. Fes samting i olsem....

God i givim Holi Spirit long yumi na Holi Spirit i stap insait long yumi bilong soim yumi olsem, God i bin makim na pikim yumi na pasim yumi long Krai.

Na sekon samting i olsem....

**Holi Spirit Em i *diposit* bilong olgeta samting Krai i kisim pinis bilong yumi na bihain yumi bai lukim.**

Na ***diposit*** em i wanem samting? Mi tok piksa pastaim.....

Yu save long pasin bilong baim meri. Taim yupela makim wanpela meri na yupela laik baim, orait yupela bai toktok wantaim papa bilong dispela meri na yupela bai pasim toktok long pe bilong em.

Em olsem na, sapos yupela makim pe olsem K1,500, orait papa bilong meri bai tok olsem, “Yupela putim **diposit** pastaim na long dispela wei mi ken i save olsem yupela no giaman.” Olsem na, yupela bai putim K200 or K300 **diposit** na olgeta manmeri i ken i save olsem, yupela baim pinis dispela meri, na papa i no ken i givim dispela meri i go long narapela lain. Yu save, taim yupela putim **diposit** long baim meri, em olsem yupela baim dispela meri pinis. Na ol lain bilong meri i ken i save olsem, yupela no giaman long baim meri, na ol i ken i save olsem, bai yupela pinisim dispela pe long bihain long sampela taim.

Na wankain olsem, Holi Spirit Em i ***diposit***. Taim God i givim Holi Spirit long yumi, i olsem God i tok, “Hap mi putim nau na bihain bai yupela kisim olgeta blesim bilong heven.” Holi Spirit Em i ***diposit*** bilong olgeta samting Krai i bin kisim bilong yumi na bihain yumi bai lukim.

Krais, long dai bilong Em, Em i bin kisim olgeta blesim bilong heven – Em i kisim ol dispela samting bilong givim yumi, tasol yumi no kisim yet. Em olsem tasol God i givim wanpela blesim long yumi **nau**, Em i dipositim wanpela blesim long yumi **nau** bilong soim yumi olsem, olgeta blesim bilong heven em bilong yumi. God i givim Holi Spirit long yumi **nau**, olsem diposit, bai yumi ken i klia olsem, olgeta blesim bilong heven em bilong yumi na bai yumi lukim na kisim.

Olsem na, taim yumi lukim hanmak long Holi Spirit long laip bilong yumi, orait yumi ken i save olsem, dispela em i diposit, na bihain bai yumi lukim na kisim olgeta blesim bilong heven.

Na mi save olsem, sampela taim ol man bai kisim bek diposit ol i putim bilong baim meri o ol lain bilong meri i salim diposit i go bek gen bikos ol i senisim tingting bilong ol na ol i no laik ol i baim meri pikinini bilong ol.

Tasol, Pol i tok long **lain 14** olsem, *“...Holi Spirit bai i stap wantaim yumi manmeri bilong God inap long taim God i kisim bek yumi na yumi stap fri wantaim Em.”*

Harim. God i no inap kisim bek diposit bilong Em. Nogat tru. God i no inap rausim Holi Spirit long yumi. Nogat tru. God i no inap rivesim ol samting Em i bin mekim long yumi. Nogat tru. God i givim Holi Spirit long yumi bikos Em i bin makim na pikim na pasim yumi long Krais longtaim pinis. Holi Spirit Em i diposit bilong olgeta samting God i bin mekim long yumi na redim bilong yumi. Olsem na, Holi Spirit i no inap lusim yumi. Em bai stap i go i go i go inap long taim God i bin makim bilong kisim yumi na putim yumi long ples bilong Em.

Sapos yu lukim hanmak bilong Holi Spirit long laip bilong yu, orait yu mas klia olsem, God i bin givim diposit long yu bilong soim yu olsem, yu bilong God na bai yu kisim olgeta samting Krais i bin kisim bilong yu.

Sampela manmeri i save sutim tok long yumi, na ol i tok olsem, “Yupela manmeri i lusim bikpela misin na yupela bihainim tok Waitman i autim, bai yupela lus long hel.” Na sampela manmeri i tok olsem, “Yupela manmeri i lotu aninit long diwai, orait yupela lain bilong Seten tasol.” Yu save, planti manmeri i makim yumi na tok, “Yupela Seten lain tasol.” Na sampela taim dispela kain toktok i ken i pretim yumi, a?

Tasol, yu tingim. Sapos yu harim trupela Gutnius bilong God na yu save olsem, dispela gutnius em i trupela gutnius, na yupela bilipim na trastim na lavim na bihainim dispela trupela gutnius, orait yupela mas save olsem, dispela em i hanmak bilong Holi Spirit tasol. Em i no hanmak bilong Seten. Nogat. Em i hanmak bilong Holi Spirit. Dispela i soim yu olsem, God i bin givim Holi Spirit long yu na Holi Spirit Em i diposit bilong olgeta blesim bilong heven. Olsem na, yupela no ken i pret long toktok bilong ol manmeri. Ol i no save.

Na sampela manmeri i save tok olsem, “Yupela no stap long trupela misin. Yupela lus lain tasol.” Tasol, hau na bai mipela lus? Sapos yumi lukim hanmak bilong Holi Spirit long laip bilong yumi, orait hau na bai yumi lus? Yumi no inap bikos God i givim Holi Spirit long yumi bilong soim yumi olsem, God i bin makim na pikim na pasim yumi long Krais longtaim pinis. Holi Spirit Em i diposit bilong olgeta blesim Krais i kisim bilong yumi na bai yumi lukim.

Harim. Yumi no ken i harim tok ol manmeri i mekim. Nogat. Yumi no ken i harim tok ol sampela manmeri bilong sampela misin i mekim. Nogat. Yumi mas harim tok **God** i mekim. Yumi mas luksave long hanmak bilong Holi Spirit long laip bilong yumi na yumi mas trastim tok God i mekim long dispela samting. Sapos yu harim na bilipim na trastim na bihainim trupela gutnius bilong God, orait dispela em i hanmak bilong Holi Spirit na dispela i soim yumi olsem God i bin pasim yumi long Krai. Dispela em i diposit bilong olgeta blesim God i givim yumi i bilong Krai.

Sampela manmeri i save amamas na pas long lotu na ol i bisi long bihainim lotu pasin na bihainim ol wanwik bung na ol dispela kain samting. Tasol, long bihain, ol i les na lusim lotu gen na i stap nating. Na sampela taim yumi pret long dispela kain pasin na yumi tingim olsem, "Bihain, bai mi tu mi givap na lusim dispela gutpela gutnius bilong God o nogat?"

Harim. Ol trupela lain bilong God i no inap givap na lusim olsem ol sampela lotu manmeri i save mekim. Nogat tru. Holi Spirit bai stap wantaim ol manmeri bilong God i go i go i go olgeta na bai ol i lukim olgeta blesim bilong God. Manmeri we Holi Spirit i bin opim ai na ia na bel bilong ol na ol i bilipim na trastim trupela gutnius bilong God, ol i no inap lusim na i stap nating. Nogat. Ol bai i stap na bihainim dispela gutnius i go i go i go olgeta bikos Holi Spirit i stap wantaim ol na Holi Spirit i no inap lusim ol. Holi Spirit Em i diposit bilong soim yumi olsem, God bai holim yumi i go i go i go inap long taim Em i kisim yumi i go long ples bilong Em.

(Yu yet, long haus bilong yu, yu ken i lukim tok bilong God i stap long **Rom 8:18-27**. Dispela tok i sapotim toktok i stap long **Efesus 1:13-14**.)

Holi Spirit Em i diposit bilong olgeta samting yumi bai i stap long em long bihain. Holi Spirit Em i wanpela gutpela blesim nau bikos Em i bin kamapim trupela bilip long yumi, na Em i save opim ai na ia na bel bilong yumi na nau yumi save olsem, yumi bilong God na bai yumi lukim olgeta samting bilong heven.

Long dispela as yumi save amamas tru. Ol sampela lotu i save mekim giaman amamas bikos ol i amamas long paitim gita na ol i amamas long haus lotu bilong ol na ol i amamas long ol kain samting olsem. Tasol yumi amamas bikos Holi Spirit i wok insait long yumi na Em i kamapim samting yumi no fit long kamapim – em i kamapim trupela bilip long yumi. Yumi amamas bikos God i givim diposit long yumi pinis bilong soim yumi olsem, Em i bin sevim yumi na olgeta blesim bilong heven em bilong yumi.

Las tok Pol i mekim long **Efesus 1:14** i olsem, "*God i mekim ol dispela samting bilong apim nem bilong Em i bikpela na gutpela tumas.*" Ol dispela samting God i tokaut long em long lain 1 i kam daun long lain 14, ol dispela samting God i mekim bilong apim nem bilong Em i bikpela na gutpela tumas. Yumi God i bin makim na pikim na pasim long Krai, yumi save pinis God Em i bikpela na gutpela tumas. Olsem na, yumi tasol i ken i amamas tru na litimapim tru nem bilong God.

Olsem na, las toktok mi laik mekim long yupela nau dispela moning i olsem.....

**Amamas long God tasol na litimapim nem bilong God na nem bilong Jisas Krai.**

Em tasol.

**Rom 8:18-27**

<sup>18</sup> Taim mi tingting long glori God bai soim yumi long bihain, mi save tingim olsem ol hevi nau yumi save pilim em i liklik samting tumas. <sup>19</sup> God i bin wokim ol samting antap na Em i wokim dispela graun, na ol dispela samting i strong long wetim taim we ol pikinini bilong God i kamap ples klia. <sup>20-21</sup> Ol samting antap na ol samting bilong dispela graun ol tu i save pilim hevi bilong sin. Ol i no mekim wanpela rong na kisim dispela hevi. Nogat. God i putim ol dispela samting insait long hevi bilong sin. Tasol ol dispela samting i no inap i stap olsem i go i go. Nogat. Bihain, ol dispela samting bai fri long hevi bilong sin na dai, na ol bai kam insait long glori bilong God wantaim ol pikinini bilong God. <sup>22</sup> Yumi save ol samting bilong antap na ol samting bilong dispela graun i pilim hevi kain olsem meri i pilim hevi taim em i laik karim pikinini. Na ol i pilim dispela hevi i kam i kam long nau. <sup>23</sup> Em i no dispela samting tasol i pilim hevi i go i go. Nogat. Yumi we Holi Spirit i karim sampela kaikai pinis long laip bilong yumi, yumi tu i pilim olsem. Em olsem na yumi save pilim hevi bilong sin na yumi strong long wetim taim we God bai kamapim nupela bodi bilong yumi. Na taim bodi bilong yumi i kamap nupela, em nau yumi kamap pikinini bilong God olgeta. <sup>24</sup> Taim God i kisim bek yumi, yumi bin tingting strong long dispela samting God i laik mekim long bihain. Yumi no kisim yet, olsem na yumi tingting strong long ol dispela samting. <sup>25</sup> Tasol sapos yumi no kisim yet, orait yumi mas bel isi i stap na wetim ol dispela samting yumi tingting strong long kisim.

<sup>26</sup> Na tu, Holi Spirit i save helpim yumi. Yumi no gat strong, tasol Em i save helpim. Taim yumi laik prea yumi bai askim God long wanem samting? Yumi no save gut. Tasol Holi Spirit i pilim tru ol hevi bilong yumi, na dispela i dip tumas na i winim toktok, na Em i save karim hevi bilong yumi i go long God. <sup>27</sup> God Em i klia long olgeta tingting bilong yumi na Em i klia long tingting bilong Holi Spirit. Olgeta taim Holi Spirit i save bihainim laik bilong God. Olsem na, taim Em i wok long askim God long helpim yumi, orait olgeta askim bilong Em i pas tru long laik bilong God.

## Trupela bilip wantaim pasin bilong lavim tru ol manmeri bilong God em i nambawan.

---

### Efesus 1:15-16.

---

Tingim. Sapos Jisas i laik kam lukim yumi long sios bilong yumi, orait Em bai amamas long lukim wanem samting? Sapos Jisas i laik visitim sios bilong yumi, orait Em bai i laik lukim wanem samting i stap?

- Jisas i laik lukim bikpela haus lotu i gat kapa i stap, a?
- Jisas i laik lukim sios bilong yumi i kamap bikpela na i winim ol narapela sios long ples, a?
- Jisas i laik lukim yumi i putim ol naispela naispela klos na mekim gras bilong yumi i kamap bikpela na yumi kam harim lotu, a?

Yu tingim olsem Jisas i laik lukim ol dispela kain samting i kamap long dispela sios bilong yumi, a? Ating mi mas tok klia long yupela olsem, Jisas i no interes long lukim ol dispela kain samting. Nogat tru.

Na dispela i no minim olsem ol dispela samting em i samting nogut. Na dispela i no minim olsem ol dispela samting i tambu. Nogat. Haus lotu em i gutpela samting. Na sapos planti manmeri i kam harim Tok bilong God wantaim yumi, orait dispela tu em i gutpela samting. Na sapos yumi laik waswas na putim gutpela klos na kam harim lotu, orait dispela em i gutpela na yumi ken i amamas.

Tasol, ol dispela samting i no nambawan samting. I no gat tambu long ol dispela samting, tasol ol dispela samting i no bikpela samting. Ol dispela samting i no nambawan samting.

Orait, wanem samting em i nambawan samting? Wanem samting em i bikpela samting? Lukim **Efesus 1:15-16**. Pol i bin harim wanem stori long sios i stap long taun Efesus? Em i harim tupela samting....

1. Em i harim stori long bilip bilong ol long BIKPELA Jisas,
2. Em i harim stori long hau ol i lavim olgeta manmeri bilong God.

Na taim Pol i harim stori long bilip bilong ol long BIKPELA Jisas na hau ol i save lavim olgeta manmeri bilong God, em i mekim wanem?

Em i bin tok tenkyu long God! Taim Pol i laik mekim prea em i save holim tingting long sios i stap long taun Efesus na em i holim tingting long hau ol i save bilip tru long BIKPELA Jisas na hau ol i save lavim ol manmeri bilong God i stap long sios bilong ol, na em i amamas long dispela tupela samting i kamap long ol na em i tok tenkyu long God.



Yu save, dispela tupela samting em i nambawan samting long trupela sios bilong God. Dispela tupela samting em i bikpela samting long trupela sios bilong God. Na taim Pol i harim stori olsem dispela tupela samting i kamap long sios i stap long Efesus, orait em i kisim bikpela amamas na em i tok tenkyu long God.

Nau yumi bai skelim dispela tupela samting na bai yumi klia long wanem samting i mas i stap nambawan samting long sios bilong yumi.

Olsem na, fes toktok yumi skelim i olsem....

### **1. Long trupela sios, ol manmeri bilong God ol i save holim trupela bilip.**

Yupela save pinis, long Papua Niugini i gat planti grup nabaut i stap, na ol i tokaut olsem, "Mipela sios". Long ples i gat ol wanwan misin i stap, na olgeta i tok olsem, "Mipela sios". Long Goroka na long Lae na long Mosipi i gat ol Jehova Witnis na ol Moman na ol kainkain grup olsem i stap, na ol dispela grup tu i tok olsem "Mipela sios".

Olsem na, hau na bai yumi ken i klia olsem, husat i trupela sios bilong God na husat i no trupela sios bilong God? Yumi ken i save bikos long trupela sios bilong God ol manmeri bilong God bai holim *trupela bilip*. Ol manmeri bilong God bai holim *trupela bilip* God i givim ol. Ol manmeri i holim *trupela bilip* ol i *trupela sios* bilong God.

Orait, em gutpela, tasol *trupela bilip* em i wanem samting? Wanem samting em i *trupela bilip*?

Long wanpela taim long narapela wik wanpela man i bin kam long ofis bilong mi na mitupela i bin stori long Tok bilong God. Dispela man em i no pasta, tasol em i save autim tok long lotu bilong em. Mitupela stori i stap na em i tokim mi olsem, "Mi bilip long Jisas." Em i tok olsem, "Mi bilip olsem, God i stap na Jisas i stap na Jisas Em i wanpela bikpela man na Em i dai long diwai kros." Na em i skruim tok bilong em olsem, "Mi bilip olsem, sapos mi stap gut na mi mekim gutpela wok insait long misin na mi lukautim femili bilong mi, orait taim Jisas i kam Em bai lukim dispela gutpela pasin bilong mi, na long dispela gutpela wok bilong mi Em bai kisim bek mi."

Na dispela man i holim trupela bilip o nogat? Harim wanpela tok Jems i bin mekim long **Jems 2:19**. Em i tok olsem, "Yu save bilip olsem, 'Wanpela God tasol i stap.' Em gutpela. Tasol, yu tingim, ol spirit nogut ol tu i save bilip olsem, na ol i guria nogut."

Ol wokboi bilong Seten ol i save pinis God i stap na Jisas i stap na Jisas i dai long diwai kros, tasol ol i no lain bilong God. Nogat tru!

Yu save, dispela *kain bilip* i no trupela bilip olsem Jisas i tokaut long em. Planti manmeri i bilip olsem, God i stap na Jisas i stap na Jisas i dai long diwai kros, tasol dispela *kain bilip* i no olsem bilip Jisas tokaut long em. Harim, ol wokboi bilong Seten ol tu ol i gat dispela *kain bilip*. Ol i save olsem, God i stap na Jisas i stap na Jisas i dai long diwai kros. Ol i save, ol i bilip, tasol dispela *kain bilip* i no trupela bilip olsem Jisas i save tokaut long em.

Tingim gen bilip bilong dispela man mi bin stori long em – dispela man i bin kam long ofis bilong mi. Em i bilip olsem, “Sapos mi stap gut na mi mekim gutpela wok insait long misin na mi lukautim femili bilong mi, orait taim Jisas i kam Em bai lukim dispela gutpela pasin bilong mi, na long dispela gutpela wok bilong mi Em bai kisim bek mi.” Tingim. Bilip bilong em i go nau long samting i no tru. Tingting bilong em i pas long samting i no tru. Na dispela i no gutpela.

Lukluk gen long **Efesus 1:11-13**.

Ol manmeri God i bin makim na pikim bilong putim i go insait long sios bilong Em, ol i save bilipim na trastim trupela gutnius *i tokaut long wok **God i mekim long dai bilong Krai bilong kisim bek ol***. Trupela gutnius i tokaut olsem, God i kisim bek sin manmeri long feifful wok bilong Jisas long diwai kros tasol na Em i no inap kisim bek wanpela sin manmeri long ol gutpela wok bilong ol. Nogat tru!

Long trupela sios, ol trupela manmeri bilong God, ol bai bilipim na trastim na lavim na bihainim trupela gutnius na dispela trupela gutnius i tokaut long olgeta wok *God i bin mekim long dai bilong Krai bilong baim bek ol na bilong sevim ol na bilong adoptim ol na bilong bringim ol i kam insait long olgeta blesim bilong heven*. Ol i save olsem, God i stap na Jisas i stap, tasol ol bai bilipim na trastim na lavim na bihainim trupela gutnius i tokaut long olgeta samting **God i mekim long feifful wok bilong Jisas long diwai kros bilong kisim bek ol**.

Dispela manya i bin kam long ofis bilong mi, em i no bilip olsem. Nogat. Em i bilip God i stap na Jisas i stap na Jisas i dai long diwai kros. Tasol, em i no bilipim na trastim God long kisim bek em long feifful wok bilong Jisas long diwai kros tasol. Nogat. Em i tingim olsem, God bai kisim bek em long ol gutpela pasin bilong em yet. Em i tingim olsem, em yet i ken i kamapim stretpela pasin God i save laikim na God bai kisim bek em long dispela samting tasol. Em i bilip olsem, “Mi yet mi mas kamapim ol gutpela pasin na bai God i kisim bek mi long dispela samting mi yet i wokim.” Em i no bilipim na trastim gutnius bilong God i tokaut long hau God i save givim stretpela pasin long yumi na hau God i kisim bek yumi long feifful wok Jisas i bin mekim tasol.

Yumi save pinis long plen bilong God, na dispela plen em i olsem, God bai kamapim wanpela nupela komyuniti na olgeta manmeri bilong dispela nupela komyuniti bai i stap aninit tru long Jisas Krai. Na yumi save olsem, nem bilong dispela nupela komyuniti bilong God em i sios. Na yumi save olsem, God i wok long kamapim dispela nupela komyuniti nau. Tasol, yu tingim, God i yusim wanem samting bilong bringim ol manmeri Em i bin makim i kam insait long sios bilong Em?

Em i yusim trupela gutnius bilong Em. God i save givim Holi Spirit long ol manmeri Em i bin makim, na Holi Spirit i save opim ai na ia na bel bilong ol, bai ol i ken i harim trupela gutnius bilong God – **dispela gutnius i tokaut long olgeta wok God i bin mekim long dai bilong Jisas bilong kisim bek ol**, na bai ol i luksave long olgeta wok God i bin mekim long dai bilong Jisas, na bai ol i bilipim na trastim na lavim na bihainim **dispela gutnius**. Ol i bilip olsem, God i no inap kisim bek ol long ol gutpela wok bilong ol yet, nogat, God bai kisim bek ol long feifful wok bilong Jisas long diwai kros tasol.

Long trupela sios, ol manmeri bilong God ol i save bilipim na trastim na lavim na bihainim trupela gutnius bilong God. Ol i holim trupela bilip long trupela wei bilong God.

Harim. Yumi no ken i pasim tingting bilong yumi. Nogat. Planti manmeri i tok olsem, “Mi bilip God i stap na Jisas i stap na Jisas i dai long diwai kros.” Tasol dispela i no minim olsem ol i bilip tru. Nogat. Skelim tok bilong ol – ol i trastim wanem samting?

Sapos ol i trastim stretpela pasin bilong ol yet, orait ol i no bilip long trupela gutnius bilong God na ol i stap autsait long trupela sios bilong God. Sapos wanpela misin i save skulim ol kongregesen olsem, “Yupela yet i mas kamapim stretpela pasin na bai God i ken i kisim bek yupela long dispela stretpela pasin bilong yupela.” Sapos ol i autim na bihainim dispela kain tok, orait yu mas save olsem, ol i no bilipim na trastim trupela gutnius na dispela i minim olsem, ol i no trupela sios bilong God.

Long trupela sios, ol manmeri bilong God ol i save bilipim na trastim na lavim na bihainim trupela gutnius bilong God. Ol i holim trupela bilip long trupela wei bilong God. Ol i save trastim olgeta wok God i bin mekim long dai bilong Jisas bilong kisim bek ol. Ol i trastim God long kisim bek ol long faithful wok bilong Jisas tasol.

Taim Pol i harim stori bilong trupela bilip bilong ol manmeri i stap long sios long taun Efesus, em i amamas na em i tok tenkyu long God. Long wanem? Em save olsem, sios bilong taun Efesus em **i kamap inap long trupela wok bilong God**. Em i kamap inap long trupela wok bilong God bikos ol i bilipim na trastim na bihainim trupela gutnius bilong God. Ol i gat trupela bilip. Na ol lotu i no bilipim na trastim trupela gutnius, orait yumi ken i save olsem, ol i no kamap long wok bilong God. Nogat. Ol i kamap long wok bilong ol man bilong dispela graun tasol.

Mi tok pinis. Trupela bilip em i wanpela bikpela samting tru long trupela sios bilong God. Olsem na, yumi mas holim strong dispela trupela bilip na yumi no ken i larim wanpela liklik giaman bilip i kamap insait long sios bilong yumi.

Orait, em wanpela samting. Narapela samting i olsem.....

## **2. Long trupela sios, ol manmeri bilong God ol i save lavim ol narapela manmeri bilong God i stap long sios.**

Long **Jon 13:34-35** Jisas i bin mekim wankain toktok. Em i tokim ol disaipel bilong Em olsem, “*Wanpela nupela lo Mi givim yupela: Yupela mas lavim ol narapela manmeri bilong God. Wankain olsem Mi bin lavim yupela, orait yupela mas lavim ol olsem. Na long dispela pasin bilong lavim ol narapela manmeri bilong God, bai olgeta manmeri i klia olsem, yupela disaipel bilong Mi.*”

Hau na bai yumi klia olsem wanpela sios i trupela sios bilong God o nogat? Yumi tok pinis olsem, trupela sios bai bilipim na trastim trupela gutnius bilong God. Tasol tu, ol manmeri long trupela sios, ol bai lavim ol narapela manmeri bilong God, em ol manmeri i bilipim na trastim trupela gutnius bilong God. Dispela em i wanpela bikpela mak bilong ol trupela lain bilong Jisas.

Na Jisas i tok olsem, “Yupela mas lavim ol narapela manmeri bilong God wankain olsem Mi bin lavim ol.” Na Jisas i bin lavim ol olsem wanem? Em i mekim wanem kain pasin long ol? Hau na Jisas i bin lavim ol?

Lukim **Jon 15:13**. *“Man i lusim laip bilong em yet bilong helpim ol frens bilong em, em i lavim ol tru, na i no gat wanpela lavim i winim dispela lavim.”*

Yu save, Jisas i no tingim Em yet. Nogat. Em i tingim ol manmeri God i bin makim na pikim na pasim long Em. Em i tingim ol na Em i lusim laip bilong Em bilong mekim ol i kamap holi na i no gat asua long ai bilong God na bai God i kisim bek ol na putim ol i go insait long olgeta gutpela gutpela blesim bilong heven.

Jisas, long blut bilong Em, long dai bilong Em, Em i baim pe bilong sin na nau yumi stap fri long pe bilong sin, yumi fri nau na yumi no inap fesim kot na pe long sin bilong yumi. Jisas i lusim laip bilong Em bilong helpim ol frens bilong Em. (Lukim **Efesus 1:7-8**.)

Na husat em i ol frens bilong Jisas? Ol manmeri God i bin makim na pasim long Krai. Pastaim ol i no frens bilong Jisas. Nogat. Pastaim ol i save givim baksait long Jisas na ol i les long bihainim Jisas na ol i no kea tumas long ol samting bilong Jisas. Tasol, God i bin pasim ol long Krai na Krai i bin lusim laip bilong Em yet bilong helpim ol. Na bihain Holi Spirit i bin wok insait long ol na ol i tanim bel na bilipim na trastim na lavim na bihainim Jisas. (Lukim **Efesus 2:4-5**.)

Na Jisas i tok olsem, “Yupela mas lavim ol narapela manmeri bilong God olsem Mi bin lavim yupela.”

Yumi no ken i tingting long yumi yet. Nogat. Yumi mas tingting long ol narapela manmeri bilong God na mekim gutpela pasin long ol. Yumi mas putim ol i go paslain long yumi yet. Yumi mas putim wanem hevi bilong ol i go paslain long hevi bilong yumi yet. Yumi mas mekim gutpela pasin long ol bipo yumi ken i mekim gutpela pasin long yumi yet.

Yumi no ken i bel hat long ol o mekim sampela pasin bilong givim sem long ol. Na taim ol i mekim rong long yumi, orait yumi ken i stretim, tasol yumi no ken i holim tingting long dispela rong i go i go na kros long ol insait long tingting bilong yumi.

Sapos yu lavim brata susa bilong yu i pas long Krai, orait yu no inap pasim ai long sin bilong ol. Nogat. Bai yu toktok wantaim ol na helpim ol long tanim bel long sin bilong ol na helpim ol long bihainim ol gutpela pasin. Yu no inap sapotim pasin nogut bilong ol. Nogat. Bai yu sapotim gutpela pasin tasol. Long dispela pasin yu lavim ol.

Harim dispela toktok i stap long **1 Korin 13:4-7**.

<sup>4</sup> Manmeri i lavim narapela manmeri, em i save bel isi long ol oltaim, na em i save mekim gutpela pasin long ol. Manmeri i lavim narapela manmeri em i no save jelas, na em i no save apim em yet, na em i no pilim olsem em yet em i bikpela. Nogat. <sup>5</sup> Na em i no save mekim pasin bilong givim sem long narapela manmeri, na em i no save mekim selfis pasin, na em i no save bel hat hariap, na em i no save holim tingting long rong ol i bin mekim long em. <sup>6</sup> Manmeri i lavim narapela manmeri em i no save amamas long pasin nogut bilong ol. Nogat. Em i amamas na wanbel long trupela tok. <sup>7</sup> Man i lavim narapela manmeri, em i save karim olgeta hevi, na em i save bilip i go i go, na em i save hop olgeta taim, na em i no save givap.

Sampela manmeri i save tok olsem, "Mipela lain bilong lavim ol manmeri." Tasol ol i toktok tasol na ol i no mekim. Yumi trupela lain bilong God yumi no ken i toktok. Nogat. Yumi mas mekim. Yumi mas lavim tru ol narapela manmeri bilong God. Yumi mas mekim long ol wankain pasin Jisas i bin mekim long yumi.

Mi laik givim tupela toktok long yupela bilong helpim yupela lavim ol narapela manmeri i holim trupela bilip olsem yu.

- **Yumi ken i lavim ol narapela manmeri bilong God *bikos* yumi save long lavim bilong God.**

God i bin lavim yumi na Em i bin mekim olgeta wok bilong bringim yumi i kam insait long nupela komyuniti bilong Em. Yumi no gutpela manmeri na God i bringim yumi i kam insait. Nogat tru. Yumi manmeri nogut na yumi bin mekim pasin God i save hetim. Tasol, Em i bin lavim yumi na Em i mekim olgeta wok inap pinis long dai bilong Jisas bilong bringim yumi i kam insait long femili bilong Em na insait long olgeta blesim bilong heven.

- **Na yumi ken i lavim ol narapela manmeri bilong God *bikos* nau yumi save olsem, ol dispela manmeri ol i brata na susa trutru bilong yumi.**

Yu save long plen bilong God. God i wok long kamapim wanpela nupela komyuniti nau na bihain dispela nupela komyuniti tasol bai i stap na olgeta olupela komyuniti bai pinis. Olsem na, brata na susa trutru bilong yumi ol i no ol sampela hauslain bilong dispela graun. Nogat. Ol trupela lain bilong yumi em i olgeta manmeri i tanim bel na i bilipim na trastim na lavim na bihainim trupela gutnius bilong God. Ol trupela lain bilong yumi em i ol manmeri God i save bringim i kam insait long nupela komyuniti bilong Em. Ol trupela lain bilong yumi em i ol manmeri God i save bringim i kam insait long trupela sios bilong Em.

### **Las toktok.**

Aposel Pol i bin harim stori bilong bilip bilong ol lain bilong God i stap long Efesus na hau ol i save lavim olgeta narapela manmeri bilong God i stap long sios bilong ol. Na em i bin givim bikpela tok tenkyu long God long dispela samting.

Na yumi? Bai yumi holim strong trupela bilip long BIKPELA Jisas, a? Bai yumi lavim ol narapela manmeri bilong God i stap long sios bilong yumi, a? Wanem kain stori bai i go aut long dispela sios na ol narapela manmeri i harim?

Na wanem samting i nambawan samting bilong yu? Bikpela haus lotu, a? Pulim planti manmeri na lotu bilong yumi i mas winim ol narapela lotu, a? Harim. Trupela bilip wantaim pasin bilong lavim tru ol manmeri bilong God, dispela em i nambawan. Yumi mas askim God long helpim yumi holim trupela bilip na bihainim wei bilong lavim ol brata na susa i bilip tru long Kraus.

Em tasol.

## God i laik yumi mas save long Em moa yet.

---

### Efesus 1:17.

---

Long Efesus 1:17 mi gat wanpela tok tasol mi laik tokim yupela. Na dispela tok i olsem....

#### God i laik yumi mas save long Em moa yet.

Lukim **Efesus 1:15-16** pastaim. Aposel Pol i gat bikpela amamas long sios i stap long taun Efesus. Em i bin harim stori long hau sios bilong Efesus i bihainim trupela bilip long BIKPELA Jisas na hau ol i lavim olgeta manmeri bilong God i stap long sios bilong ol. Em olsem na em i amamas long harim dispela stori bikos dispela 2-pela samting i soim olsem, sios i stap long Efesus i no kamap long wok na strong bilong ol man. Nogat. Sios bilong Efesus i kamap long wok na strong bilong God tasol.

God yet i bin mekim wok na Em i bin makim ol pastaim na Em i bin pasim ol long Krai na Krai Em i dai bilong mekim ol i kamap holi na i no gat asua long ai bilong God. Na God i givim Holi Spirit long ol na Holi Spirit i bin opim ai na ia na bel bilong ol, bai ol i bilipim na trastim na lavim na bihainim na aninit tru long Jisas Krai.

Long dispela wei God i bringim ol i kam insait long nupela komyuniti bilong Em – insait long sios bilong Em. Na mak bilong trupela komyuniti bilong God i olsem, ol i bihainim trupela bilip long BIKPELA Jisas na ol i lavim ol manmeri bilong God i stap insait long nupela komyuniti bilong God. Long dispela as Pol i gat bikpela amamas na em i tok tenkyu long God bikos God yet i bin mekim olgeta wok na Em i kamapim sios i stap long Efesus.

Em gutpela. Tasol wok bilong God – wok bilong Holi Spirit - i no pinis. Nogat. Sapos yu tanim bel pinis na yu bilipim na trastim na bihainim Jisas, orait yu no ken i tingim olsem, taim God i bringim yu i kam insait tru long sios bilong Em, em tasol na i no gat narapela samting. Yumi no ken i tingim olsem, yumi stap nating tasol na wetim kambek bilong Jisas. Nogat. Lukim **Iain 17**.

Pol i gat bikpela amamas long wok bilong God long laip bilong ol manmeri bilong God long sios i stap long Efesus na dispela i mekim Pol i holim ol long prea. Na taim em i prea long ol em i prea olsem, ***ol i mas save long God moa yet.***

Mi tok pinis....

#### God i laik yumi mas save long Em moa yet.

Mi givim sampela askim long yupela, em yupela i bilipim na trastim feitful wok bilong Jisas, yupela i pas trutru long Krai, na yupela skelim na tingting gut. Long wanem as God i bin makim na pikim yupela na pasim yupela long Krai? Long wanem as God i salim Jisas i kam dai bilong mekim yupela holi na i no gat asua long ai bilong Em? Long wanem as God Em i adoptim yupela? Long wanem as God i soim as bilong plen bilong Em long yupela? Long wanem as God i givim Holi Spirit long yupela? Long wanem as Em i opim ai na ia na bel bilong yupela? Long wanem as God i bringim yupela i kam insait long sios bilong Em?

Em i mekim ol dispela wok long yumi bai yumi ken i save gut long God na yumi ken i save moa yet long God. God i laik yumi mas save gut long Em. God i laik yumi mas klia long Em na save long Em. Em i no laik yumi stap longlong long Em. Nogat. Em i laik putim Em yet long ples klia long ai bilong yumi, bai yumi ken i save long Em na bai yumi amamas long Em na lavim Em na pas trutru long Em.

Tru, yumi i bin tanim bel pinis na i bilipim na trastim Jisas, Holi Spirit i bin mekim wok insait long yumi pinis na Em i bin opim ai na ia na bel bilong yumi na yumi klia pinis long ol sampela samting bilong God na yumi harim tok bilong Em pinis long ol sampela samting bilong Em na yumi bilipim na trastim pinis ol sampela samting bilong God. Olsem na, yumi save pinis long ol sampela wei bilong God na God Em i wanem kain Man. Tasol, God i laik yumi mas save **moa yet** long Em.

Yumi mas holim tingting olsem, God i bin adoptim yumi na kisim yumi i kam insait long femili bilong Em, bai yumi i stap pikinini bilong Em. Em i no kisim yumi i kam insait nating tasol. Nogat. Em i stap Papa bilong yumi nau na Em i laik yumi mas save long Papa. Em i laik yumi mas klia gut long olgeta samting bilong Em. Em i laik yumi mas klia olsem, Em i wanem kain Man na Em i gat wanem kain tingting na Em i save mekim wanem kain pasin.

Nambawan samting long Kristen laip bilong yumi i olsem, yumi mas kisim moa save long God. Na taim yumi kisim save moa long God, orait dispela save bai senisim tingting na pasin bilong yumi na hau yumi sindaun wantaim ol narapela manmeri. Taim yumi kisim moa save long God, orait bai yumi litimapim nem bilong Em moa yet.

Orait, God i laik yumi mas save moa long Em. Tasol hau na bai yumi save moa long God? Pol i tokaut long 2-pela samting.

### **1. Yumi mas kisim trupela save.**

Long **lain 17** Pol i prea long God, bai God i ken i givim trupela save long ol lain bilong God i stap long Efesus.

Sampela manmeri i tingim save bilong ol waitman em i trupela save. Tasol nogat. Pol i no tok long dispela samting. Save bilong ol waitman em i gutpela na ol i save long planti samting, tasol Pol i no tok long dispela kain save – dispela kain save em i no trupela save olsem Pol i tokaut long em. Na tu, Pol i no tok long save ol skul manki i save kisim. Save ol skul manki i kisim em i gutpela na yumi no ken i daunim dispela kain save. Tasol, Tok bilong God i no minim ol dispela kain save em i trupela save. Nogat. Pol i no tokaut long dispela samting.

Long **Buk Song 111:10** i gat dispela toktok i stap. *“Sapos yu pret long God, orait dispela em i stat long yu kisim trupela save. Olgeta manmeri i bihainim wei bilong God ol i gat gutpela tingting. Long God tasol yumi mas givim biknem oltaim oltaim.”*

**Pret long God** em i stat bilong trupela save. Taim wanpela man o wanpela meri i tingim God Em i trupela God tumas, na em i pret long God, na em i tanim bel na sindaun aninit tru long God na i bilipim na trastim na bihainim olgeta tok bilong God, em nau em i stat long kisim trupela save. *Dispela* em i trupela save bikos God yet Em i oana na bos bilong olgeta samting nau yumi stap long em. *Dispela* em i trupela save bikos laip na dai bilong olgeta manmeri i stap long han bilong dispela trupela God. Olsem na, sapos yu gat trupela save na yu gat trupela smat, orait, bai yu tingim dispela God i bin wokim yu na i givim win long yu na i givim olgeta samting long yu, na bai yu pret na stap aninit tru long Em.

Yu save, planti manmeri i givim baksait long God. Ol i no kea long God. Olsem na, ol i stupit manmeri tasol bikos ol i no tingim trupela God i stap na laip na dai na olgeta samting i stap long han bilong dispela God. Olsem na, sapos yu givim baksait long dispela God, orait yu stupit tasol na het bilong yu em i paul tasol. Sapos God Em i samting nating tumas long laip bilong yu, orait yu stupit na trupela save i no stap long yu.

Em olsem na, manmeri i kisim trupela save na ol i pret long God na ol i klia olsem God Em i oana na bos bilong olgeta samting na olgeta samting i stap inap long strong bilong God tasol, na ol i daunim ol yet na i stap aninit long God na i bilipim na bihainim wanem toktok God i mekim, orait dispela manmeri i stat nau long kisim trupela save.

Save bilong dispela graun em i gutpela na i ken i helpim yumi. Tasol, pret long God em i trupela save na dispela save bai helpim yumi moa moa moa yet. Bihain, save bilong dispela graun bai pinis wantaim dispela graun. Tasol trupela save long God - pasin we yumi pret long God na yumi i stap aninit long Em na harim tok Em i mekim na bihainim na i stap aninit long dispela tok bilong Em - ol dispela em i samting trutru na ol dispela samting bai i stap tasol i go i go i go oltaim oltaim.

Olsem na, yumi i tanim bel pinis, yumi mas wok i go yet long kisim save moa long God. Yumi mas yusim trupela save na yumi wokabaut long laip bilong yumi. Yumi no ken i wokabaut olsem ol haiden manmeri. Nogat. Yumi save pinis, trupela God i stap na Em i bin mekim gutpela wok pinis long dai bilong Jisas bilong kisim bek yumi sin manmeri. Yumi save pinis, God i no inap kisim bek yumi long ol feifful wok yumi i mekim. Nogat. Em i kisim bek yumi long feifful wok Jisas i mekim tasol. Olsem na, yumi mas holim dispela save na yusim dispela save long wokabaut long laip bilong yumi.

Na yupela i no tanim bel yet, orait yupela mas stat na kisim trupela save long God. Yupela no ken i longlong i stap. Yupela no ken i stupit i stap. Nogat. Yupela mas pret long dispela trupela trupela God na yupela daunim yupela yet na tanim bel na bilipim na trastim olgeta samting Em i tokim yumi long bilipim na trastim na yupela stap aninit tru long God. Olsem na, yupela no ken i trastim feifful wok yupela i mekim moa. Nogat. Lusim dispela kain bilip bilong yupela na yupela trastim God long kisim bek yupela long feifful wok Jisas i mekim tasol. Tanim bel, na bilipim na trastim feifful wok bilong Jisas na bihainim Em.

Orait, em wanpela samting. Yumi mas kisim trupela save na bai yumi save gut long God. Na narapela samting i olsem.....



## 2. Yumi mas klia long as na minim bilong Tok bilong God.

Long wanem as yumi mas klia long as na minim bilong Tok bilong God? Yumi mas klia long as na minim bikos i no gat narapela wei bai yumi save tru long God.

Yu tingim. Sapos yu lukim wanpela piksa bilong mi – wanpela foto long mi - orait yu tingim. Taim yu lukim piksa bilong mi, em nau yupela ken i save long mi, a? Nogat. Taim yu lukim piksa yu no inap save olsem, mi gutpela man o mi man nogut, na yu no inap save long tingting bilong mi, na yu no inap save long wok bilong mi, na yu no inap save long wanem toktok mi save mekim na bihainim, na yu no inap save olsem, mi ken i laikim yupela o nogat. Yu save, wanpela piksa, wanpela foto, i no inap helpim yupela save long mi.

Orait, hau na bai yu save long mi? Mi mas **tokim** yupela long olgeta samting bilong mi. Mi ken i **tokaut** long wanem kain toktok mi save autim, na mi ken i **tokaut** long wanem kain bilip mi save bihainim, na mi ken i **tokaut** long wanem kain tingting mi gat, na mi ken i **tokaut** long wanem as mi kam hia long PNG, na mi ken i **tokaut** long hau mi save lukautim ol femili bilong mi. Yu save? Mi mas **tokaut** na bai yupela save long mi.

Na ol sampela manmeri i ken i mekim toktok. Ol i ken i tokim yupela olsem, Glenn em i kam long PNG bilong paulim tingting bilong yupela, na Glenn em i man nogut, na Glenn i no gat gutpela tingting, na Glenn em i olsem olsem, na ol i ken i mekim planti toktok olsem. Tasol yu save long pasin bilong ol manmeri. Ol i ken i giamanim yupela. Olsem na, sapos yu laik save gut long mi, orait mi yet mi mas tokim yu. Hau na bai yu klia gut long mi? Mi mas sindaun wantaim yupela na autim tingting bilong mi. Mi mas toktok long yupela na bai yupela save long mi.

Na wankain olsem long God. Ol man ol i ken i tok, God Em i olsem olsem olsem. Tasol, ol i ken i giamanim yumi. Yumi no ken i trastim toktok bilong ol manmeri. Nogat. Harim. I gat wanpela wei tasol long yumi ken i save long God. God yet i mas tokim yumi. God yet i mas opim maus na toktok long yumi na tokaut long olgeta samting bilong Em.

God Em i wanpela bikpela Man tumas na yumi no fit long skelim tingting bilong yumi yet na yumi save long God. Nogat tru. God yet i mas tokim yumi. Na Em i tokim yumi pinis – **Tok bilong God – Baibel** - em i toktok bilong God yet. **Tok bilong God – Baibel** - em i stori God yet i givim yumi, bai yumi ken i save gut long Em.

Taim God i givim Tok bilong Em i kam long yumi, em nau, God i putim Em yet long ples klia. God Em i hait na yumi no inap lukim Em - God Em i spirit na yumi no inap lukim Em. Tasol yumi ken i save long Em. Hau? Em i bin tokaut long ol samting Em i laik yumi mas klia long em. God i no givim Tok bilong Em nating. Nogat. Em i givim bikos Em laik yumi mas save long Em.

God Em i laik yumi mas klia gut long Em. Na i gat wanpela wei tasol na bai yu save gut long God, na dispela wei em i **Tok bilong God – Baibel** - tasol.

Olsem na.....

Maski driman na maski profet toktok bilong ol sampela manmeri. Yumi no nidim ol dispela samting bikos yumi i gat **Tok bilong God** yet i stap – yumi i gat **Baibel** i stap. Yumi no ken i trastim tok bilong ol man o driman bilong ol man. Nogat. Yumi ken i trastim Tok God yet i bin givim yumi.

Harim tok bilong God i stap long **Buk Song 119:105**. *“Tok bilong Yu i olsem lam bilong helpim mi long wokabaut stret, na em i olsem lait bilong soim rot long mi.”*

*Tok bilong God – Baibel* - em i lam bilong soim yumi trupela wei bilong God na em i lait bilong soim trupela rot long yumi. Yumi no nidim driman na tok profet bilong ol sampela lotu manmeri. Nogat. Yumi gat Tok bilong God i stap – yumi gat Baibel i stap.

Ating sampela manmeri i no interes tumas long toktok God i bin mekim. Nogat. Ol i interes tumas long toktok misin bilong ol i bin mekim na ol i interes tumas long driman bilong ol sampela misin manmeri. Tasol yumi no ken i mekim olsem. Nogat. Yumi mas givim baksait long toktok bilong ol man na yumi mas lainim olgeta tok God i bin givim yumi. Sapos yumi laik save gut long God, orait i gat wanpela wei tasol – **Tok bilong God – Baibel tasol**.

#### **Las toktok.**

Orait, mi tok pinis olsem, God em i laik yumi mas save moa long Em. Em i laik yumi mas kisim trupela save, na Em i laik yumi mas kisim klia tingting long as na minim bilong Tok bilong God. Long dispela wei bai yumi save moa long God.

Planti manmeri ol i no tingim Tok bilong God. Ol i no laik kisim save long God. Nogat. Ol i laikim ol misin pasin tasol. Ol i laikim lotu we ol i ken i putim ol naispela klos and paitim gita na singim song na raun long wanwik bung na kisim fri kaikai na stori wantaim ol frends na ol kain samting olsem. Ol i les long harim Tok bilong God. Ol i les long kisim save long God. Ol i les long bilipim na trastim rot God i wokim long faithful wok bilong Jisas long diwai kros.

Bikpela samting long laip bilong yumi i Kristen trutru em i no ol misin samting. Nogat tru. Bikpela samting bilong yumi i trupela Kristen em i God. Yumi mas holim strong trupela Tok bilong God tasol, na harim Tok bilong God tasol, na yumi mas wok hat long kisim moa save long God tasol. Maski ol misin pasin. Yumi mas save moa yet long God na bai dispela save i senisim laip bilong yumi, na bai yumi litimapim nem bilong Em trutru.

Taim yumi kisim save long ol wok bilong God long faithful wok bilong Jisas long diwai kros, bai yumi lavim God moa na bai yumi litimapim nem bilong God wantaim nem bilong Jisas Krai tasol.

Em tasol.

## God i ken i givim lait long tingting na bel bilong yumi.

---

### Efesus 1:18-20.

---

Aposel Pol em i wanpela gutpela misineri stret. Long wanem? Em i no mekim wok long sait sait. Nogat. Em i mekim wok stret. Em i no bisi long ol narapela samting. Nogat. Pol em i bisi tasol long mekim gutpela wok i pas tru long wei bilong God.

Yu tingim. Pastaim Pol i bin **skulim** ol manmeri bilong God i stap long taun Efesus. Em i skulim ol stret long olgeta samting God i bin mekim bilong kisim bek ol na bringim ol i kam insait long sios bilong God. Long **Efesus 1:1-14** Pol i skulim ol gut tru. Na yumi tu yumi bin kisim gutpela skul long dispela hap bilong Tok bilong God.

Tasol tu, aposel Pol em i **prea** long ol manmeri bilong God i stap insait long kongregesen bilong taun Efesus. Em i **skulim** ol gut long Tok bilong God na ol i ken i save gut long olgeta samting God i bin mekim bilong ol long dai bilong Jisas, na em i **prea** long God, bai God i mekim wok i go yet insait long laip bilong ol na bai ol i klia moa yet long God na long olgeta wei bilong Em.

**Em i skulim ol na em i prea long ol.** Olsem na, mi tok pinis, aposel Pol em i wanpela gutpela misineri stret. Dispela em i wok tru bilong misineri.

Na aposel Pol i mekim wanem kain prea long ol? Em i askim God long mekim wanem samting long ol?

Long **lain 17** yumi bin skelim hau Pol i bin askim God long givim *trupela save* na givim *klia tingting long as na minim bilong Tok bilong God* long ol manmeri i stap long kongregesen i stap long taun Efesus.

Long **lain 18** Pol em i skruim prea bilong em na em i askim God long givim **lait long tingting na bel bilong ol**, bai ol i ken i klia long ol sampela samting God i bin wokim bilong ol.

Olsem na, *pastaim* Pol i prea long ol i ken i klia moa yet long God, na *sekon* em i prea long ol i ken i klia long olgeta samting *God* i bin mekim long ol.

God i no laik ol lain bilong Em i stap long tudak long tingting na bel bilong ol. Nogat. Em i laik ol i mas ai klia na tingting na bel bilong ol i mas klia. Em i laik lait i mas i stap long tingting na bel bilong ol, bai ol i klia long *olgeta* samting God i bin wokim bilong ol.

Yu save, long biknait yu no inap lukim olgeta samting insait long haus bilong yu, nogat, em i tudak tumas. Tasol, sapos yu laitim lam bilong yu, em nau olgeta samting i ken i kamap ples klia na yu ken i lukim na klia long em. Na wankain olsem, Pol em i prea olsem, God i ken i onim lait insait long tingting na bel bilong ol manmeri bilong God, bai ol i klia long *olgeta* samting God i bin wokim bilong ol.

Na Pol em i no prea olsem, save i ken i kam pulap long het bilong ol. Nogat. Em i prea olsem, lait i ken i kamap long bel bilong ol, na tingting na bel bilong ol i ken i klia long olgeta samting God i bin mekim bilong ol.

Em olsem na, taim lait i kamap long tingting bilong ol na long bel bilong ol, orait ***ol bai laikim tru God na ol bai laikim tru olgeta wei bilong Em***. Na yu save, taim ol i laikim tru God na olgeta wei bilong Em, bai ol i *bihainim tru* God na olgeta wei bilong Em. God i laik bel bilong ol i *senis*, na long bel bilong ol, bai ol i *laik* bihainim God na bai ol i *amamas* long olgeta wei bilong God.

Yu save, long bipo, ol i stap insait long tudak bilong kastem pasin na insait long tudak bilong ol manmeri long ples. Bipo ol i olsem ol narapela manmeri na ol i pasim tingting na bel bilong ol na ol i pas tasol long ol wei bilong ples tasol. Bipo ol i putim tingting bilong ol i go long ol hait toktok na ol mejek toktok na pret toktok ol manmeri long ples i save mekim. Bipo, ol i no laikim wei bilong God na ol i no amamas long bihainim Em. Ol i stap long tudak na ol tudak tingting i save stiaim tingting bilong ol na wokabaut bilong ol na laip bilong ol.

Aposel Pol em i save long wei bilong ol manmeri long ples na em i prea long God, bai God i givim lait long tingting na bel bilong ol. Long dispela wei bai ol i senis long tingting na bel bilong ol, na bai ol i laikim wei bilong God na amamas long bihainim Em. Long dispela wei olgeta samting bilong God bai stiaim tingting bilong ol na wokabaut bilong ol na laip bilong ol.

Mi tok pinis. Pol em i gutpela misineri na em i laik ol lain bilong God i mas gohet na ol i mas klia moa yet long God, na ol i mas klia moa yet long olgeta samting God i bin mekim long ol bilong bringim ol i kam long Em. Em i laik ol i mas kisim lait long tingting na bel bilong ol. Ol i no ken i stap kanaka tasol. Nogat. Ol i mas gohet na ol i mas kisim trupela save na klia long olgeta as na minim long Tok bilong God. Ol i mas kisim lait long tingting na bel bilong ol, na bai dispela lait i stiaim toktok na wokabaut na pasin na laip bilong ol.

Orait. Yumi bin tok pinis. Fes, Pol i laik yumi mas save moa yet long God. Na sekon, em i laik yumi mas klia gut tru long olgeta samting God i bin mekim long yumi. Long **lain 18-20** em i tokaut long 3-pela samting yumi mas klia long em. Em i laik God i givim lait long tingting na bel bilong ol, bai ol i ken i klia long 3-pela samting. Na fes samting em i olsem....

## **1. Yumi mas klia long olgeta samting God i bin kisim yumi i kam long em.**

Na ol dispela lain bilong God i stap long Efesus, God Em i kisim ol i kam long wanem samting? God Em i kisim ol i kam long olgeta samting bilong Em yet. Em i no kisim ol i kam long ol misin pasin na long ol lotu samting. Nogat tru. Em i kisim ol i kam long Em yet. Em i kisim ol i kam insait long femili bilong Em. Em i kisim ol i kam insait long nupela komyuniti bilong Em – na yu holim tingting – em i nupela komyuniti bilong God bai i stap oltaim oltaim oltaim – em i nupela komyuniti bilong God, God bai pasim wantaim olgeta samting bilong heven.

Na sapos yu bin tanim bel na yu bilipim na trastim feitchful wok bilong Jisas na yu i stap aninit tru long Em, orait yu ken i save olsem, God i bin bringim yu tu i kam long ol dispela samting. Em i no kisim yu i kam long ol misin samting na ol lotu samting. Nogat. Em i kisim yu i kam long Em yet.

Sapos yu pas long Krai, orait yu mas save olsem, God i kisim yu i kam long Em yet. Bipo yumi stap longwe long God na yumi no save. Bipo yumi givim baksait long God. Bipo yumi giaman long bihainim Em na trastim Em. Bipo yumi bilipim na trastim feitchful wok bilong yumi yet. Bipo yumi tingim olsem, God bai kisim bek yumi long ol gutpela pasin bilong yumi yet. Tasol nau, God i bin bringim yumi i kam tru long olgeta samting bilong Em. Em i kisim yumi i kam tru long Em yet.

Olsem na, dispela i minim olsem, Em i kisim yumi i kam long olgeta wei bilong Em – long olgeta pasin Em save laikim – Em i kisim yumi i kam long Em yet, bai yumi lainim ol wei bilong Em, na bai yumi bihainim ol dispela wei bilong Em. Em i kisim yumi i kam, bai yumi i stap pikinini bilong Em na bihainim olgeta pasin bilong Em.

God Em i kisim yumi i kam long trupela laip. Planti manmeri i tok olsem, “Bai mi go long heven o nogat, mi no save, God yet i save.” Yu save, ol i no klia long wanem samting God i save kisim ol lain bilong Em i kam long em. God Em i laik yumi mas klia olsem, wok Em yet i bin mekim long dai bilong Jisas long diwai kros i save kisim yumi i kam insait long trupela laip we yumi no inap lus long hel na yumi no inap sanap long kot na kisim bagarap long ples paia. God i laik yumi mas save olsem, Em i bin sevim yumi pinis – Em i bin kisim yumi i kam pinis insait long laip – yumi gat nupela laip **nau** – yumi stap insait long nupela laip **nau** – sapos yumi bilong Krai.

Na yumi mas klia olsem, **God i bin kisim yumi i kam long ol dispela samting.** I no yu, yu kisim yu yet i kam. Nogat. Holim tingting long tisim yumi kisim pinis long **Efesus 1:3-14.**

God i bin makim na pikim yu. Long bipo, taim yu no bon yet, Em i bin makim na pikim na pasim yumi long Krai. God i bin salim Krai i kam dai long yu, bai yu i stap holi na i no gat asua long ai bilong God. God tasol i bin adoptim yu na kisim yu i kam insait long femili bilong Em – insait long nupela komyuniti bilong Em – insait long sios bilong Em. God tasol, long wok bilong Holi Spirit insait long laip bilong yu, Em i bin bringim yu i kam long ol dispela samting na nau yu save long wei bilong God na yu tanim bel na bilipim na trastim feitchful wok bilong Krai na yu bihainim na i stap aninit tru long Jisas Krai. I no yu, yu kam. Nogat. God tasol i bin kisim yu i kam.

**Ol frens bilong mi, plis harim. Sapos yu bin tanim bel na yu bilipim na trastim na bihainim feitchful wok bilong Jisas na yu i stap aninit tru long Jisas Krai, orait yu mas save long wanem samting God i kisim yu i kam long Em.**

Sapos yu no klia, orait yu mas stadi moa yet long tok bilong God. Yu no ken i slek long kam harim tok bilong God long olgeta Sande. Na sapos yu no save long rit na rait, orait yu kam long rit na rait skul bilong mipela. Na sapos yu save lusim tingting hariap, orait i gat ol kaset i stap na kaset pilaia i stap na yu ken i kisim na harim Tok bilong God gen – olgeta tok mi autim long yupela mi save putim long kaset, bai yupela ken i harim gen sapos yupela laik. Long dispela wei bai yupela klia gut long Tok bilong God. Yu save, i no gat eksklus long yu i stap longlong long Tok bilong God.

Na sapos yu klia pinis long wanem samting God i bin kisim yu i kam long em, orait yu mas stadi moa bikos ol dispela samting bilong God i bikpela samting tru na bai yu lainim i go i go i go i go inap long yu dai na God i karim yu i go long heven. Na long heven bai yu lainim i go i go i go moa yet. Sapos yu save liklik long ol samting God i bin kisim yu i kam long em, orait yu ken i amamas na tok tenkyu long God na litimapim nem bilong God - na yu lainim moa i go yet.

Na yupela i no kam yet – askim God long kisim yupela i kam. Na sapos God i opim ai na ia na bel bilong yu, orait yu tanim bel hariap na yu bilipim na trastim faitful wok bilong Jisas na yu bihainim na i stap aninit long Jisas – na bai yu klia long wanem samting God i kisim yu i kam long em wantaim mipela.

## **2. Yumi mas klia olsem, ol samting God i redim bilong ol lain bilong Em, em i gutpela gutpela samting tumas.**

Na God i redim wanem samting bilong yumi i kamap lain bilong Em? Aposel Pol i bin givim het tok long yumi long **Efesus 1:3** na em i tok olsem, “Olgeta blesim bilong heven em bilong yumi i bilong Krai.” Olsem na, yumi ken i save olsem, God i bin redim olgeta blesim bilong heven bilong yumi i bilong Krai.

Na God i laik yumi mas klia olsem, ol dispela blesim Em i redim pinis bilong yumi i pas long Krai em gutpela gutpela samting tru. Ol dispela blesim God i bin redim, yumi no klia tru ol dispela samting em i wanem samting stret. Tasol, God i laik yumi mas klia olsem, ol dispela samting em i gutpela samting tumas.

Ating, yumi bilong dispela graun, yumi tingim ol samting bilong dispela graun em i gutpela samting tumas. Em olsem na yumi *hangre* long olgeta samting bilong dispela graun na yumi laik ol misin i mas kisim ol dispela samting i kam givim yumi.

Ol sampela samting bilong dispela graun em i gutpela, tasol em i no gutpela gutpela tumas. Yu save, God i no laik yumi pasim tingting bilong yumi long ol sampela samting bilong dispela graun. Nogat. Long wanem? Ol samting bilong dispela graun, bai yumi yusim liklik taim tasol na bihain ol dispela samting bai pinis na bihain bai yumi sindaun long olgeta blesim bilong heven na bai yumi sindaun long dispela samting i go i go i go olgeta.

Yu save, trupela ples bilong yumi i no long hia. Nogat. Trupela ples bilong yumi em i heven. God i bin mekim planti bikpela wok long dai bilong Jisas bilong kisim yumi i kam long olgeta blesim bilong heven, na ol dispela blesim bilong heven i winim moa moa yet ol samting bilong dispela graun.

Olsem na, yumi i bilong Krai, yumi no ken i hangre long ol samting bilong dispela graun. Yumi ken i yusim, tasol yumi no ken i hangre long kisim ol sampela samting bilong dispela graun.

Sapos God i givim ol sampela samting bilong dispela graun long yu, orait yusim tasol long gutpela wei bilong helpim femili bilong yu na bilong sapatim wok bilong God. Yumi ken i tok tenkyu long God long ol dispela samting. Tasol yumi no ken i *hangre* long ol dispela samting na pas tumas long ol dispela samting. Nogat. Na yumi no ken i jelas long ol man i gat ol sampela samting bilong dispela graun. Nogat. Mobeta yumi tingting long olgeta samting God i redim long yumi we ros na binatang na stilman i no inap bagarapim. (Yu ken i lukim **Matyu 6:19-20**)

### **3. Yumi mas klia olsem, strong bilong God i winim olgeta strong na Em save yusim dispela strong bilong helpim yumi i bilong Em.**

Yu tingim. Long histori bilong dispela wol, husat i gat strong bilong kirapim wanpela man long matmat? Yu save, God wanpela tasol i gat dispela kain strong. Ol Amerika i gat strong long mekim pait, na ol Japan i gat strong long kamapim mani, na ol Australia i gat strong long kamapim ol gutpela marasin, tasol i no gat wanpela i gat strong long kirapim wanpela man long matmat. Nogat tru. God wanpela tasol i gat dispela kain strong.

Na yumi skelim gut dispela strong bilong God. Taim God i kirapim Jisas long matmat, orait long dispela taim God i kapsaitim Seten na brukim strong bilong Seten na Em i kisim bek ol manmeri Em i bin makim na pikim na pasim long Krai. Bipo Seten i bin holim ol. Tasol God i smasim strong bilong Seten na Em i kisim bek ol lain bilong Em. Taim God i kirapim Jisas long matmat Em i smasim Seten na Em i bin sevim hamas tausen tausen manmeri – em ol dispela manmeri God i bin makim na pikim na pasim long Krai long bipo taim.

Yu save, dispela strong bilong God long kirapim Jisas long matmat i soim yumi olsem, God i gat strong bilong winim sin na winim kot bilong sin na winim pe bilong sin na winim *bikhet pasin bilong yumi* na kamapim dispela nupela komyuniti na femili bilong Em. Strong bilong God i winim olgeta strong na God i save yusim dispela strong bilong helpim yumi Em i bin kisim i kam insait long femili bilong Em.

Na yu tingim. Sapos God i gat strong long mekim ol dispela samting, orait Em i gat strong bilong senisim yu!

Hamas taim mi harim tok olsem, “Yupela waitskin i ken i mekim olsem olsem, tasol mipela blakskin mipela narapela lain.” Na minim bilong dispela toktok i olsem, “Ol waitman i ken i senis na bihainim ol wei bilong God, tasol mipela blakskin mipela no inap senis.”

Tasol yupela mas klia olsem, mipela no senis long strong bilong mipela. Nogat. God i bin senisim mipela bikos God i save yusim strong bilong Em bilong helpim ol lain bilong Em. Na sapos yu bilong God, orait God i ken i yusim dispela strong bilong senisim yupela tu! Em i bin yusim strong bilong Em bilong sevim yu na Em i ken i yusim dispela strong bilong senisim yu.

Yupela no ken i daunim wok bilong God long laip bilong yupela. Nogat. Yupela no ken i givim hevi long Holi Spirit. Taim yupela tok olsem, “Mipela blakskin, mipela het strong lain tumas na mipela no inap senis.” Taim yupela mekim dispela kain toktok, em nau, yupela givim hevi long Holi Spirit bikos Holi Spirit – God – i gat strong bilong senisim yupela tasol yupela no laik.

Harim gut. God i gat strong na Em i save yusim dispela strong bilong helpim yumi senis na kamap manmeri em i laik yumi mas kamap.

#### **Las toktok.**

Pol em i prea long ol lain bilong God i stap long Efesus, bai God i ken i givim lait long tingting na bel bilong ol, na bai ol i klia long olgeta samting God i bin kisim ol i kam long em, na bai ol i klia olsem ol samting God

bin redim bilong ol i gutpela gutpela samting tumas, na bai ol i klia olsem strong bilong God i winim olgeta strong na God i save yusim dispela strong bilong helpim ol.

Ol dispela samting i no samting bilong ol waitman tasol i ken i klia long em, o, ol bikpela manmeri long hetkwatas tasol i ken i klia long em, o, ol pasta tasol i ken i klia long em. Nogat. Ol dispela samting em i samting yumi nomal manmeri i ken i save long em. Em i samting bilong yumi "gras roots" manmeri i ken i save na klia long Em.

Taim yumi save moa yet long God na yumi klia moa yet long olgeta wok God i bin mekim bilong yumi, orait laip bilong yumi bai senis olgeta, na bai yumi stap olsem God i laik yumi mas i stap.

Prea olsem, God i ken i givim lait long tingting na bel bilong yu yet. Na prea olsem, God i ken i givim lait long tingting na bel bilong ol narapela manmeri bilong God i stap long sios bilong yumi.

Em tasol.



# God i mekim Krai i stap het tru bilong olgeta samting.

---

## Efesus 1:21-23.

---

Nau mi laik tokim yupela long 3-pela samting. Na fes toktok i olsem.....

### 1. Jisas Krai Em i het bilong olgeta samting *nau* na long *bihain* tu.

Lukim na ritim **sapta 1 na lain 21-22.**

Dispela toktok i minim olsem, Jisas Krai Em i bos bilong olgeta samting – Em i bos bilong olgeta samting *nau*, na Em bai i stap bos bilong olgeta samting long *bihain* tu.

God i givim olgeta pawa na strong long Jisas. Olsem na, wanpela man long dispela graun, o wanpela samting long antap, o wanpela samting daunbilo, wanpela samting i no inap winim Jisas Krai.

God i givim olgeta pawa na strong long Jisas na Jisas i stap bos bilong olgeta samting. Em i het na bos bilong olgeta hetman na bosman bilong dispela graun. Em i het na bos bilong olgeta gavman, na long olgeta king, na long olgeta man i gat namba long dispela graun, na long olgeta man i gat nem long dispela graun. Olgeta i stap aninit long lek bilong Jisas Krai *nau*, na olgeta bai i stap aninit long Jisas Krai long *bihain* tu.

Tasol, yumi save olsem, planti manmeri i no save stap aninit long Jisas *nau*. Planti i save sakim tok bilong Em na ol i no kea liklik long Jisas Krai. Na planti misin manmeri tu ol i no stap aninit long Jisas. Ol i tok olsem, “Mipela bihainim Jisas.” Tasol, ol i giaman. Ol i save sakim tok bilong Jisas na ol i strong tasol long bihainim laik bilong misin tasol na bihainim laik bilong ol yet tasol.

Na dispela i olsem wanem? Pol i tok long ol manmeri Efesus olsem, “*God i putim olgeta samting aninit long lek bilong Krai na Krai i stap het tru bilong olgeta samting.*” Tasol, yumi lukim planti manmeri i no stap aninit long lek bilong Krai na i luk olsem, planti manmeri ol i no stap aninit long Krai na Krai i no stap het tru bilong ol. Na long sios bilong yumi tu i luk olsem, planti manmeri ol i no stap aninit long Krai na Krai i no bos bilong ol.

Em olsem na dispela i minim olsem Jisas i no bos na Jisas i no het bilong olgeta samting *nau*, a? Nogat. Harim. **Jisas Krai Em i het na bos bilong olgeta manmeri, maski ol manmeri i tingting long aninit long Em o nogat.**

Harim wanpela toktok i stap long **Filipai 2:6-11**.....

<sup>6</sup> *Krais Em i wankain tru olsem God,  
tasol Em i no tingim dispela em i samting Em i ken i yusim  
bilong apim nem bilong Em yet. Nogat.*

<sup>7</sup> *Em i daunim Em yet,  
na Em i mekim Em yet i kamap wankain tru olsem wanpela wokboi nating.  
Em olsem na Em i kamap wankain tru olsem ol man.*

<sup>8</sup> *Em i kamap wankain tru olsem wanpela man,  
na Em i daunim Em yet*

*na Em i bihainim tru laik bilong God na Em i dai.  
Yes, Em i bihainim tru, maski Em i dai long diwai kros.*

<sup>9</sup> *Na long dispela as God i litimapim Em na putim Em i go antap tru long olgeta samting,  
na Em i givim Em nem i winim olgeta nem.*

<sup>10</sup> *God i mekim olsem, bai olgeta manmeri, taim ol i harim nem bilong Jisas, ol bai brukim skru long Em,  
olgeta i stap long heven na long dispela graun na olgeta i stap daunbilo tu,*

<sup>11</sup> *na olgeta bai tokaut klia olsem, Jisas Krais Em i BIKPELA.  
Na God, Papa, bai kisim biknem stret.*

Harim. Sapos yu no laik brukim skru long Jisas *nau*, orait *bihain* bai yu brukim. Mi minim olsem, sapos *nau* yu no laik klia olsem Jisas Krais Em i BIKPELA bilong olgeta samting na yu no laik tanim bel *nau* na bilipim na trastim na i stap aninit long Em na bihainim Em *nau*, orait *bihain* bai Jisas Krais i **fosim** yu long tokaut olsem, “Jisas Krais Em i BIKPELA.” Bihain bai yu lukim olgeta pawa na strong bilong Em na bai yu tokaut olsem, “Yes, i tru, Jisas Krais Em i het na bos bilong olgeta samting.” Tasol, long dispela taim em i tuleit long yu long tanim bel.

Harim narapela tok i stap long **Aposel 17:30-31**.....

<sup>30</sup> *Pastaim God i larim ol manmeri i no gat save na i stap nating. Tasol nau, Em i tok strong long  
olgeta man long olgeta hap bilong dispela graun olsem, ‘Yupela i mas tanim bel.’* <sup>31</sup> *Long wanem, Em i bin  
makim wanpela de we Em bai kotim olgeta manmeri. Em bai mekim olsem long stretpela pasin bilong Em.  
Na Em i makim wanpela man na Em bai i stap jas bilong dispela kot. Na taim God i kirapim dispela man  
long matmat Em i soim olgeta manmeri dispela i tru tumas.*

Jisas Krais Em i **jas** bilong olgeta manmeri *i no laik* tanim bel *nau* na i stap aninit long Jisas *nau*. Jisas Em i **helpim** bilong olgeta manmeri i tanim bel na i bilipim na trastim wok bilong Em *nau*, na Em i **jas** bilong olgeta manmeri i no laik tanim bel na i stap aninit long Jisas *nau*.

Jisas Krais Em i het na bos bilong olgeta samting – i no gat wei bilong yu abrusim dispela samting. Jisas Krais Em i het na bos. Na i gat taim we olgeta manmeri long olgeta hap bai brukim skru long Jisas. Sampela bai amamas long brukim skru long Em na sampela God bai fosim ol long brukim skru. Tasol olgeta bai brukim skru long Jisas bikos Jisas Em i het na bos bilong olgeta samting.

**Em olsem na:**

- **Em i no gutpela long yu givim baksait long Jisas Krai.**

Mobeta *nau* yu brukim skru long Jisas Krai. Mobeta *nau* yu tingim na yu tanim bel na yu bilipim na trastim na i stap aninit tru long Jisas na bihainim Em. Mobeta *nau* yu brukim skru long Jisas bikos long *bihain*, sapos *nau* yu no mekim olsem, God bai fosim yu long brukim skru long Jisas Krai – tasol long dispela taim em i tuleit long yu tanim bel. Jas bilong yu bai salim yu i go long hel na yu no inap stopim Em long salim yu i go long hel. Na long hel bai yu tokaut olgeta taim, “Jisas Krai Em i BIKPELA.” Long hel bai yu safa i go i go bikos yu no laik tanim bel na bilipim na trastim feitul wok bilong Jisas na i stap aninit long Jisas Krai long dispela laip bilong yu nau.

Olsem na, mi tok pinis, mobeta nau yu tingim na yu tanim bel trutru na yu bilipim na trastim feitul wok bilong Jisas Krai na yu stap aninit long Em na bihainim Em.

**2. Jisas Krai Em i het na bos bilong sios nau na long *bihain* tu.**

Orait, yumi tok pinis olsem, Jisas Krai Em i het na bos bilong olgeta samting – olgeta samting long heven na long dispela graun na long daunbilo tu. Na em i *dispela* hetman God i mekim het bilong sios.

Lukim na ritim **sapta 1 lain 22**.

Yu save, em i no wanpela man nating Em i het bilong sios. Nogat tru. Em i dispela BIKMAN we olgeta manmeri bai brukim skru long Em na tokaut, “Jisas Krai Em i BIKPELA,” em i dispela BIKMAN Em i het na bos bilong sios.

Na yu save long sios. Sios em i no misin. Nogat tru. Sios em i ol manmeri God i bin makim long bipo na pasim long Krai, na Krai i dai bilong mekim ol i stap klin na stret long ai bilong God. Sios em i ol dispela manmeri God Em i adoptim na putim ol i stap insait long femili bilong Em. Sios em i ol manmeri Holi Spirit i opim ai na ia na bel bilong ol na ol i tanim bel na bilipim na trastim Jisas Krai na ol i stap aninit tru long Em na bihainim Em. Sios em i nupela komyuniti na femili bilong God.

Na yupela i stap sios tru - yupela i bin tanim bel na i bilipim na trastim feitul wok bilong Jisas na i bihainim Em. Orait yupela mas save olsem, wanpela bikman stret Em i het na bos bilong yumi – Em i Jisas Krai tasol.

Yumi tok pinis olsem, Jisas i gat pawa na strong – lukim na ritim **sapta 1 lain 19-20**. Em i gat pawa na strong, na Em i save yusim dispela pawa na strong bilong helpim sios – bilong helpim ol manmeri bilong nupela komyuniti bilong Em. Olsem na, Em i no *jas* bilong yumi i bilip. Nogat. Em i *sevy*a bilong yumi – Em i Man bilong sevim yumi (*sevy*a/*saviour*).

Dispela strongpela strongpela het na bos bilong dispela wol Em i het na bos bilong sios. **Yumi i stap insait long sios trutru, yumi amamas long brukim skru long Jisas** bikos yumi klia pinis olsem, Jisas Krai Em i BIKPELA na Em i het na bos bilong yumi.

God i mekim Jisas Krai het na bos bilong sios.

***Olsem na, dispela i minim olsem:***

- **Sios i mas harim na bihainim tok bilong Jisas tasol.**

Yu tingim. Planti manmeri long ples i save mekim tok olsem, “Sios i mas helpim ol manmeri, na sios i mas kamapim ol sevis long komyuniti, na sios i mas mekim wok taim wanpela man i dai, na sios i mas wokim ol wanwik bung, na sios i mas wok long stopim ol lain i laik pait, na sios i mas mekim olsem olsem olsem.....”

Ating ol i pilim olsem ol yet i het na bos bilong sios. Ol i no tingting long i stap aninit long Jisas Krai na harim na bihainim tok bilong Em. Nogat. Ol yet i gat tingting na ol i laik sios i mas bihainim tingting bilong ol tasol.

Ol sampela lain i tok strong long mipela olsem, “Yupela mas prea pastaim na autim tok bilong God. Sapos yupela no mekim olsem, ating yupela no trupela lotu.” Na long wanem as ol i mekim tok olsem? Jisas i mekim dispela toktok long yumi, a? Nogat. Ol yet i kamapim dispela kain toktok na ol i laik fosim ol manmeri long bihainim tingting bilong ol tasol.

Yu lukim ol sampela lain nabaut i save kolim ol yet “sios”. Skelim ol lida bilong ol. Jisas Krai i bin tok klia long husat i ken i kamap lida bilong trupela sios bilong Em – long **1 Timoti sapta 3 Pol** i putim dispela toktok long ples klia na olgeta manmeri i ken i save. Tasol, yu lukim. Ol planti lotu lain i no rispektim dispela toktok. Ol i no bihainim dispela. Nogat. Ol i save makim ol man long laik bilong ol yet.

Harim. Ol misin ol i no ken i stiaim pasin bilong sios. Nogat. Yumi no ken i lukim ol sampela misin na bihainim pasin bilong ol. Nogat tru. Yumi mas bihainim Krai tasol. Wanem tok Krai i mekim long sios, orait sios i mas harim na bihainim.

Jisas Krai Em i het bilong yumi na Jisas Krai tasol mas stiaim pasin bilong sios bilong yumi. Wanem samting i pas long tok bilong Jisas Krai, bai yumi mekim. Na wanem pasin i no pas long tok bilong Jisas Krai, yumi no inap mekim. Jisas Krai Em i bos bilong sios na bai yumi bihainim Em tasol, maski toktok bilong ol manmeri. Ol i laik krosim yumi o daunim yumi, em i orait. Tasol yumi bihainim wei bilong hetman bilong yumi, Jisas Krai, olgeta taim.

- **Yumi i sios bilong Jisas yumi ken i save olsem trupela sios bilong Jisas bai stap tasol.**

Yumi bin tok pinis olsem, em i no man nating Em i het na bos bilong sios. Nogat tru. Em i dispela bikpela hetman i save stap het na bos bilong olgeta samting Em i het na bos bilong sios. Na yu tingim. Dispela strongpela hetman i save yusim olgeta pawa na strong bilong Em bilong helpim sios.

Harim. Yumi no gat nem na ol sampela lotu i laik tok bilas long yumi. Tasol, het bilong yumi Em i wanpela bikpela man stret – Em i helpim bilong yumi, na Em i jas bilong ol manmeri i giaman long bihainim Em. Yumi no ken i pret o sem long bilas toktok bilong ol sampela manmeri. Nogat. Sios bilong Jisas bai i stap

bikos het bilong sios Em i het bilong olgeta samting. Tok bilas bilong ol sampela manmeri i no inap stopim trupela sios. Nogat tru. Trupela sios tasol bai i stap na bihain ol manmeri bai lukim na save.

### 3. Jisas Krai Em i as bilong laip bilong sios.

Lukim na ritim **sapta 1 lain 23**.

Yumi no westim taim, taim yumi stap aninit long Jisas Krai. Long wanem? Jisas Krai Em i as na minim bilong laip bilong sios na Em i as na minim bilong olgeta samting nau yumi stap long Em. God i bin kamapim olgeta samting, bai Krai i stap het bilong olgeta samting. Jisas Krai Em i as na minim bilong laip. I no gat narapela samting.

**Olsem na:**

- **Yumi mas lusim tingting long wei bilong dispela graun na putim tingting bilong yumi i go long as bilong laip.**

God i bin wokim yu, bai yu i stap aninit long Jisas Krai na bihainim Em. I no gat narapela samting i bikpela samting na yu ken i bisi long mekim na bihainim. Nogat. Jisas Krai Em i as na minim bilong laip na Em i as na minim bilong laip bilong sios. Sios i stap tasol bilong Jisas Krai. Olsem na, yumi mas lusim tingting long wei bilong ol manmeri bilong dispela graun na yumi mas putim tingting bilong yumi i go long wei bilong Krai tasol.

Wei bilong Jisas Krai i mas pulimapim tingting bilong yumi. Maski wei bilong taun na maski wei bilong ples na maski wei bilong waitman. Jisas Krai tasol Em i as bilong sios na as bilong olgeta samting. Olsem na, yumi mas tingim dispela na larim dispela i stiaim wokabaut bilong yumi. I no gat narapela samting i winim Jisas Krai. Olsem na, mobeta nau yumi tingting na nau yumi bihainim Em tru.

*“Yu mas lavim Bikpela, God bilong yu. Yu mas lavim Em long bel bilong yu olgeta, na long laip bilong yu olgeta, na long tingting bilong yu olgeta, na long strong bilong yu olgeta.” (Yu ken lukim **Mak 12:28-31**.)*

Em tasol.

